

CBETA電子佛典集成

CBETA Chinese Electronic Tripitaka Collection
ebook

X71n1405

石溪心月禪師語錄

(侍者)住顯·宗煥·祖定·
宗菴·光玉·仁安·應儼·
永珍·祖森 編

目次

- [編輯說明](#)
- [章節目次](#)
 - [No._1405-A](#)
 - [石溪和尚語錄目次](#)
 - [石溪佛海禪師初住建康府報恩禪寺語錄](#)
 - [住建康府能仁禪寺語錄](#)
 - [住建康府蔣山太平興國禪寺語錄](#)
 - [住平江府虎丘山雲巖禪寺語錄](#)
 - [住臨安府景德靈隱禪寺語錄](#)
 - [臨安府徑山興聖萬壽禪寺語錄](#)
 - [秉拂](#)
 - [清涼冬節秉拂](#)
 - [焦山冬節秉拂](#)
 - [焦山結夏秉拂](#)
 - [蔣山冬節秉拂](#)
 - [蔣山結夏秉拂](#)
 - [蔣山解夏秉拂](#)
 - [靈隱冬節秉拂](#)
 - [小參](#)
 - [石谿佛海禪師住建康府報恩禪寺小參](#)
 - [建康府能仁禪寺小參](#)
 - [建康府蔣山太平興國禪寺小參](#)
 - [平江府虎丘雲巖禪寺小參](#)
 - [臨安府靈隱景德禪寺小參](#)
 - [臨安府徑山興聖萬壽禪寺小參](#)
 - [普說](#)
 - [蔣山告香普說](#)
 - [垓藏主為父母請普說](#)
 - [天童西堂寮受牌普說](#)
 - [天童西堂寮結夏普說](#)
 - [靈隱首座寮結夏普說](#)
 - [徑山告香普說](#)
 - [法語](#)
 - [示圓上人](#)

- [示源侍者](#)
- [示圓闍梨](#)
- [示徹侍者](#)
- [示念禪人](#)
- [示深禪人](#)
- [示思禪人](#)
- [示照寂巖](#)
- [示達州惠禪人](#)
- [示泉都莊](#)
- [示逸侍者](#)
- [示清禪人](#)
- [示宗侍者](#)
- [示心侍者](#)
- [示徹首座](#)
- [示喜長老出世祥符](#)
- [示南泉化主](#)
- [示海上人](#)
- [示靈藏主](#)
- [示應禪人](#)
- [示德侍者](#)
- [示元上人](#)
- [示規知客](#)
- [示明講主](#)
- [示海禪人](#)
- [示秀上人](#)
- [題跋](#)
 - [跋龍王請佛十六應真圖](#)
 - [跋觀音頌軸](#)
 - [跋諸方拈古](#)
 - [為承天真藏主跋諸老墨蹟](#)
 - [題遯庵與明首座書後](#)
- [偈頌](#)
 - [寄蔣山癡絕和尚](#)
 - [和掃破庵塔](#)
 - [送楊尚書](#)
 - [送李國史](#)
 - [示上元主簿](#)
 - [送趙鳳臺知府](#)

- [損翁](#)
- [送一默翁入浙](#)
- [送寂照庵歸蜀](#)
- [溪翁](#)
- [\[一 / \(一 * \)\]生](#)
- [和偃溪](#)
- [送金州禪人](#)
- [送達州惠禪人見徑山無準](#)
- [劔堂](#)
- [無隱](#)
- [送僧過金山](#)
- [無照](#)
- [清溪](#)
- [送心非庵](#)
- [月潭](#)
- [無象](#)
- [送僧之浙東](#)
- [送僧過碧雲見北磻](#)
- [雪牛](#)
- [鐵壁](#)
- [送寅乙上人歸蜀](#)
- [石門](#)
- [送知無見](#)
- [送祥上人之道場](#)
- [璞翁](#)
- [送悟上人入廣兼簡塗提刑](#)
- [雪山](#)
- [彭檢法號仍舊](#)
- [玉侍者出世鹿苑](#)
- [石鏡](#)
- [慵衲](#)
- [送覺上人歸隆興](#)
- [南窓](#)
- [善禪人登徑山侍癡絕](#)
- [無諍](#)
- [送日本合上人](#)
- [鎮湯頭](#)
- [方巖](#)

- [送僧之雙林](#)
- [無瑕](#)
- [送鎮知客](#)
- [寄日本國相模平將軍](#)
- [送丁高士](#)
- [刺血寫法華](#)
- [開諸方語](#)
- [淨髮](#)
- [行者德山改名德止](#)
- [示天童幹延壽化士](#)
- [再刊大慧語](#)
- [明鑑先生](#)
- [水茶磨](#)
- [甜瓜](#)
- [見性堂](#)
- [立雪方丈](#)
- [菩提橋](#)
- [一葦亭](#)
- [寶華法堂](#)
- [見山亭](#)
- [讚佛祖](#)
 - [出山相](#)
 - [水月觀音](#)
 - [思惟相觀音](#)
 - [開眼入定](#)
 - [趙通判請贊觀音](#)
 - [魚婦](#)
 - [馬郎婦](#)
 - [草衣文殊](#)
 - [文殊](#)
 - [維摩](#)
 - [布袋](#)
 - [須菩提](#)
 - [豐干 寒拾](#)
 - [達磨](#)
 - [六代祖師](#)
 - [寶公和尚](#)
 - [北宗](#)

- [明上座](#)
- [荷澤](#)
- [雪峰直覺禪師](#)
- [普化](#)
- [蜺子](#)
- [政黃牛](#)
- [郁山主](#)
- [言法華](#)
- [十六羅漢](#)
- [過河尊者](#)
- [朝陽穿破衲](#)
- [待月了殘經](#)
- [船子和尚](#)
- [亮座主](#)
- [宗道者](#)
- [靈照女](#)
- [贊禪會圖](#)
 - [黃蘗掌沙彌](#)
 - [趙州不下禪床接二王](#)
 - [國一見代宗起立](#)
 - [文宗嗜蛤蜊](#)
 - [莊宗中原之寶](#)
 - [李翱見藥山](#)
 - [裴休捧佛請安名](#)
 - [韓愈請益大顛](#)
 - [龐居士見馬大師](#)
 - [靈照對丹霞](#)
 - [說無生話](#)
 - [靈照看日早晚](#)
 - [龐大倚鉏而化](#)
 - [讚東山五祖和尚](#)
 - [寂崑忠和尚](#)
 - [北磻和尚](#)
 - [癡絕和尚](#)
 - [廣福聰長老書無準頂相請贊](#)
- [自讚](#)
 - [東林徹長老請贊](#)
 - [虎丘惠長老請贊](#)

- [祥符喜長老請贊](#)
- [圓通師孫福長老請贊](#)
- [資壽溱長老請贊](#)
- [西竺淨長老請贊](#)
- [楊居士請贊](#)
- [小師正恭寫松源掩室并師山行圖請贊](#)
- [小佛事](#)
 - [石田和尚入祖堂](#)
 - [枯椿和尚入祖堂](#)
 - [無準和尚入塔](#)
 - [癡絕和尚入祖堂](#)
 - [逢庵源首座入塔](#)
 - [昭覺十庵圭和尚起骨](#)
 - [智回首座鎖龕](#)
 - [淑副并下火](#)
 - [清上座下火](#)
 - [吉州信上座下火](#)
 - [堅莊主鎖龕](#)
 - [榮上座起龕](#)
 - [覺上座下火](#)
 - [宗侍者下火](#)
 - [理大師下火](#)
 - [海維那下火](#)
 - [涇水頭下火](#)
 - [源侍者下火](#)
 - [印上座下火](#)
 - [撰塔主下火](#)
- [No. 1405-B 新添](#)
 - [降魔圖序](#)
 - [書遯齋居士題後](#)
 - [開光明藏疏](#)
 - [示無象](#)
 - [山偈奉餞九江純禪者歸東林受業](#)
- [No. 1405-C 御書傳衣菴記](#)
- [No. 1405-D 雲頂演和尚送石谿出關見雲居掩室和尚法語](#)
- [No. 1405-E](#)
- [卷目次](#)
 - 1.

- 2
- 3
- [贊助資訊](#)

編輯說明

- 本電子書以「CBETA 電子佛典集成 Version 2023.Q1」為資料來源。
- 漢字呈現以 Unicode 3.0 為基礎，不在此範圍的字則採用組字式表達。
- 梵文悉曇字及蘭札字均採用羅馬轉寫字，如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題，歡迎來函 service@cbeta.org 回報。
- 版權所有，歡迎自由流通，但禁止營利使用。

景定元年夏四月。徑山比丘正彬。袖一編書。過余而言曰。吾師石溪佛海禪師之沒。且六年矣。門弟子錄其語鋟梓。而未有敘引。無以傳不朽。惟公知吾師為深。願以為請。余於是竊有感焉。文公朱夫子。初問道延平。篋中所携。惟孟子一冊。大慧語錄一部。公於異端。闢之甚嚴。顧獨尊信其書如此。是豈無所見而然哉。

方秦檜柄國。自公卿大夫。無敢違忤。大慧藐然一衲子。乃能援復讎大義。抗言無諱。至語檜云。曹操挾天子。以令天下。今公挾夷狄。以令天子。雖身被南遷之禍。而名震海內。與張橫浦胡忠簡輩。相頡頏。

蓋嘗竊窺其書。其要言精義。往往多與孟子合。所謂貧賤不能移。威武不能屈者。大慧有焉。文公之所取。固在此而不在彼也。石溪之在蔣山也。有王氏子。實介甫苗裔。挾權貴勢。規取山中地。為墓田。石溪爭之不得。則鳴鼓說偈而去之。以為是其先世。以學術誤天下者。而吾徇其請。獨不為山靈笑乎。乃往趨東浙。徧遊佳山水。將終老焉。自是名重一時。不惟搢紳諸公知之。聖天子亦知之。主名山。錫徽號。寵靈赫奕。視大慧所遭遇無間。嗚呼老檜之兇。舉世畏之。而大慧能抗之。介甫之遺孽。當路主之。而石溪能排之。雖其用力有難易。而卓見偉識。如出一人。自非聰明才智。有學問識道理。疇克爾耶。然則是編也。與大慧語錄。並行於世可也。若夫傳松源祖衣。紹楊岐正脉。說八萬四千偈。談三十二義法。此袈裟下事。非余所能知。獨取其超絕於流俗。而有補於世教者。表而出之。冠於篇首。是亦朱夫子之遺意也。

師眉山人。名心月。姓王氏。家世業儒云。

是歲七月既望。中奉大夫。宗正少卿。兼國史院編修官。實錄院檢討官。渤海劉震孫序。

石溪和尚語錄目次

- 卷上
 - 序
 - 建康府報恩禪寺語錄
 - 建康府能仁禪寺語錄
 - 建康府蔣山太平興國禪寺語錄
 - 平江府虎丘山雲巖禪寺語錄
 - 臨安府靈隱景德禪寺語錄

- 臨安府徑山興聖萬壽禪寺語錄
- 卷中
 - 秉拂
 - 小參
 - 普說
 - 法語
- 卷下
 - 題跋
 - 偈頌
 - 讚佛祖
 - 自讚
 - 小佛事
 - 新添
 - 跋

石溪和尚語錄目次(終)

No. 1405

石溪和尚語錄卷上

石溪佛海禪師初住建康府報恩禪寺語錄

侍者 住顯 編

入院。指三門。不立孤危。不坐平實。轉身有路。舉步超方。正在報恩門外。且如何入得報恩門。喝一喝。

佛殿。前佛後佛。一身多身。總在這裏。插香云。以此為驗。

踞方丈。百煉不變。一槌便成。還同頑鈍爐鞴。若為施工。見解玄微。機鋒峭峻。正是膏肓良醫。如何發藥。新報恩。雖非爐鞴。又非良醫。狹路相逢。拍禪床云。放過不可。

拈帖。寰中天子勅。塞外將軍令。佛祖出頭。也須乞命。今日合作麼生。度帖與維那云。將逐符行。

拈疏。渾崙擲撲不破底句。如風吹水。自然成文。雖然。切忌向口角瀾翻處薦取。

拈法衣。披拈牛皮。輓瞎驢隊。帶水拖泥。東倒西[仁-二+雷]。黃梅七百無人會。

指法座。此座高廣。吾不能陞。舍利弗敗闕猶可。若佛若祖天下老師。高陞此座。敗闕愈甚。今日不免為他拔本去也。便陞座。

拈香云。此一瓣香。恭為今上皇帝。祝延 聖壽。萬歲萬歲萬萬歲。

次拈香云。此一瓣香。奉為 權府都運大卿。泊諸司官僚。資陪祿筭。

次拈香云。此一瓣香。奉為前住雲居。後住紫金。掩室先師大和尚。用酬法乳之恩。遂就座。

乃云。從前把定。一切人性命。在月上座手裏。今日放行。月上座性命。在一切人手裏。莫有放不過者麼。

僧問。暫輟鍾山板首。來登報恩道場。四眾咸臻。願聞法要。師云。石城東畔冶城西。進云。大眾欣然去也。師云。今日不著便。進云。如何是最初句。師云。大地載不起。進云。如何是末後句。師云。倒腹傾腸說向誰。進云。此句。在雲居得。雲頂得。師云。浮生穿鑿不相關。僧禮拜。

師云。過去已過去。未來則未至。正當見在靈山單傳之旨。少林直指之宗。還有分付處也無。還有荷擔分也無。有則東土不傳西祖印。無則今日一會坐立儼然。月上座雖則翻著戲衫。入此戲場。要且不打者鼓笛。莫有辨明得底麼。出來橫身擔荷。和者場子一時掀翻。要見佛法。有所分付。直饒與麼。也未與你點頭在。何故。一百五十難放君 復舉。首山和尚示眾云。佛法付與國王大臣。且道付箇什麼。須是迦葉師兄始得。

師云。首山與麼提唱。大似重處偏墜。殊不知。付囑國王大臣底。五百年前。被昇元閣與御街裏人說了。直得一四天下。和氣靄然。且道說箇什麼。須是首山老人始得。

當晚小參。問答不錄。師云。有即是無。無即是有。捩轉鼻孔眼睛。纔擬與麼。便不與麼。換盡心肝五臟。咬斷去住。裂破古今。自然花衢柳巷。鬧浩浩處。古佛家風。古寺閑房。冷湫湫時。道人活計。同聲相應。同氣相求。剔起眉毛。面目見在。只如僧問曹山。佛未出世時如何。山云。曹山不如。出世後如何。不如曹山。且道。出世未出世。如與不如。諂訛在什麼處。善能切磋底。道一句子。救取新長老。有麼。良久云。長因送人處。憶得別家時。復舉。寶公令人傳語思大。何不下山。教化眾生。目視雲漢作麼。思大云。三世諸佛。被我一口吞盡。有甚眾生教化。

師云。思大向孤峰頂上。自謂多少奇特。被人於十字街頭。飛片瓦一擊。便乃和身掇轉。要知麼。不圖打草。也要驚蛇。

道舊至。上堂。遂舉拂子云。高山流水。擊節者稀。石火電光。交肩者少。將拂子。復安舊處云。不得草堂諸故人。泊合一場懨懨。臘八上堂。先覺六年苦行。於臘八明星現時。成等正覺。良久云。八十翁翁鞦韆毬。不顧通身是泥水。

元朝上堂。拈拄杖云。元正啟祚。萬物咸新。山形主丈子。只麼黑鱗皴。時來也解笑翻身。卓主丈云。倒腹傾腸為君說。唱歌須是帝鄉人。

上堂。正月又過半了也。跛跛挈挈。還得相應也未。若謂開口道著。信步踏著。三歲孩兒。也解恁麼道。且通途合轍一句。作麼生。理能伏豹。

掩室和尚忌。燒香云。甌峯一句。聲前密布。佇思停機。熱喝出去。於此見先師。未識先師。識先師。未見先師。而今要見先師。識先師麼。插香云。先師過去久矣。

上堂。忌口自然諸病減。多情未免有時勞。貧居動便成違順。只得清閑一味高。報恩今日事。為什麼被白雲祖師道了也。拍禪床云。好日多同。

上堂。十五日已前。知有道不得。家居芳草渡。身在杏花村。十五日已後。道得不知有。一家有事百家忙。河裏失錢河裏攏。正當十五日。天朗氣清。惠風和暢。首座大眾。各惟萬福。西家已富憂不足。東老雖貧樂有餘。無角鐵牛眠得穩。一生不用暗嗟吁。

上堂。終日忙忙。那事無妨。如何是那事。會得入地獄如箭。若也不會。終日忙忙。那事無妨。

佛生日上堂。連城之璧本無瑕。何事生來便撒沙。跛脚阿師知落處。好冤家有惡冤家。

結夏上堂。四月十五日。建康府城西古寺某。與見前徒屬。若聖若凡。情與無情。以拂子打圓相云。同向者裏禁足安居。於一切時。姪坊酒肆。魚市鷄行。出沒卷舒。縱橫自在。苟或未然。且向鬼窟裏作夢。

上堂。過去底。以手劃一劃云。一劃劃斷。只今兩眼對兩眼。喚作寐語得麼。更說未來底作麼生。還曾夢見也未。試頂省看。三十年後。開眼尿床。切莫鈍置好。

上堂。金烏飛玉兔走。目前事看不透。十日前五日後。喝一喝云。誰敢咳嗽。

上堂。說得歷歷落落。絕涓滴滲漏。未必能行。行得綿綿密密。無絲毫間斷。未必能說。說到行到。咄。悔不慎當初。

謝職事上堂。長期百二十日。九十日已過。此事得不得。拈向一邊。雖曰開市門頭。主丈子可曾動著。道伴交肩。語意俱足。鹽貴米賤。寺主自知。翻手雲覆手雨。且落在阿誰分上。良久云。赤心片片。

上堂。無背面有孔竅。轉相親轉料掉。鳳臺平石城小。喝一喝云。日下孤燈。果然失照。

散夏上堂。報恩住院。方第一夏。二時粥鉢麤疎。有甚氣力。管他二千年前。靈鷲山頭。是非得失。只見六月十六。七月十二日。大風吹雨。從東北來。駕起潮頭。傷損甚眾。惟城西。地勢稍高。殊無霑濕。遂高聲云。諸上座。照顧脚下。

謝道舊上堂。門內有君子。門外君子至。江西馬大師。却道。六耳不同謀。相逢不下馬。各自奔前程。趙州又道。道人呈漆器。平常辯似懸河。到此也難分雪。何故。坐中盡是江南客。

開爐上堂。舉僧問葉縣。自遠趨風。乞師一接。縣夾火示之云。會麼。僧云不會。縣云。爐中添炭猶嫌冷。路上行人只守寒。師云。好一爐宿火。輕輕觸著。烈焰熾然。今日香匙火筴。一時分付了也。夜深一撥。燎却面門。莫言不道。

壽慶節上堂。威音已前。空劫那畔。消息未兆。正體全彰。殊勝吉祥。盡在於是。以何為驗。九天瑞氣曉盤礴。四海同觀奉母儀。上堂。橫按主丈云。便與麼去。如渴得漿。如旱得雨。喜從何來。憂從何去。卓主丈云。野老不知堯舜力。鼕鼕打鼓祭江神。

上堂。昨日同木上座。遊鍾山回。極目田疇。栽插俱畢。今秋得熟。一飽可期。何幸如之。何喜如之。更願邊城無鼓鼙。太平曲子大家吹。舉主丈云。是何曲調。

上堂。一人出沒於寒暑之中。寒暑不能及。一人優游於寒暑之外。寒暑不可禁。且道二人中。那箇有長處。

上堂。不動步而行。不動口而說。少室巖前。因什麼伎倆俱盡。良久云。恩大難酬。

上堂。竺土大僊心。東西密相付。拈主丈云。者裏知得來處。劈脊一棒。我亦不惜。若也躊躇。謹白參玄人。光陰莫虛度。

上堂。九年少室。懸鼓待槌。一宿曹溪。如膠投漆。若與麼會。三十年後。滿面慚惶。喝。

謝金山法屬上堂。拈主丈云。主丈子。拈起也。列列挈挈。攪楊子江千丈之洪波。放下也。澄澄泠泠。注中[泳-永+靈]泉一滴之止水。且道。拈起是。放下是。卓主丈一下。

上堂。舉拂子云。此經為最上乘者說。若人受持。成就第一希有之法。即名荷擔阿耨菩提。大眾。先聖立地相待。還覺眼瞞耳熱麼。以拂子。擊禪床。下座。

元日上堂。昨日送殘年。東村王老夜燒錢。今朝賀新歲。張翁喫酒李翁醉。輕如泰華。重若鴻毛。佛法商量。世諦流布。一任一任。只如能為萬象主一句。作麼生。看取令行時。

謝首座舊住上堂。拈主丈云。此是太白峰前。交肩共用底句。別來浙東西。江南北。浩浩地。總未曾動著。今幸水雲再會。未免風月平分。卓一下云。若非正菴。大難委悉。

上堂。與麼則易。不與麼則難。不與麼則易。與麼則難。金烏飛上玉欄干。眨上眉毛子細看。

四月八上堂。二千餘年前。迦毗羅園。有則公案。百億四天下。阿蘭若地。不改條章。今朝為他翻欵去也。便下座。

謝知事上堂。上刀山。攀劒樹。雙暗雙明。裂開捻聚。倒跨楊岐三脚驢。踢斷巖頭末後句。誰是其人。目前薦取。

上堂。盡大地是清淨猊臺。極萬象為廣長舌相。演說是法。曾無間然。正與麼時。誰是毗盧師。誰為法身主。喝一喝。

結夏上堂。四月十五。西天此土。四七二三。面面相覩。更相告曰。自今結制之後。坐臥經行。循規蹈矩。照顧水牯牛。莫教犯人苗稼。侵他水土。中有一人。拊掌兩下云。低聲低聲。皇天無親。唯德是輔。

上堂。一即三。三即一。剩則不足。少則有餘。相續得去底。道將一句來。自代云。七十三八十四。

青苗會上堂。憶昔東山演祖有云。每日起來。驅為山牛。扶地藏犁。拄臨濟棒。擔仰山鍬。耕白雲田。七八年來。漸成家業。是則是。大似打獨弄雜劇。未免手忙脚亂。不若使為山驅牛。地藏扶犁。仰山擔鍬。臨濟拄棒。白雲耕田。歲歲年年坐收花利。何故。他家自有好兒孫。祖父從來不出門。

上堂。有巴鼻沒消息。匙挑不上。針筭不入。少室九年看不出。立雪斷臂。用盡心力。也只懣懣懣懣。三拜依位而立。直至而今無處覓。舉手云。屋力。

上堂。開口道得著道不著。總是第二句。去却藥忌。還我第一句來。

謝陳知縣施法鼓上堂。虛空為鼓。須彌為槌。知音之士。携手同歸。報恩今日也打一槌。拈主丈。卓一下云。直得群聾皆聳。諸夢自除。又卓一下。非唯觀世音。我亦從中證。又卓一下。

上堂。纔擬恁麼。便不恁麼。不假一槌。還同懣懣。只如玄沙未徹。雲門話墮。又作麼生。拍禪床一下。

解夏上堂。一葉落天下秋。布袋今朝又解頭。古路不曾生寸草。慈明何事過汾州。

上堂。虛空無邊故。世界無邊。世界無邊故。眾生無邊。眾生無邊故。心行差別。亦復無邊。橫按主丈云。虛空世界。眾生心行。在什麼處。劃一劃云。若不得流水。還應過別山。

上堂。無頭無尾。無背無面。知之則隔。向之則遠。見之則瞎。言之則謬。隔則半合半開。遠則同出同處。瞎則全體作用。謬則一句提持。乃顧視左右云。會麼。劒去久矣。

上堂。目前無法。意在目前。三平二滿。七穴八穿。不是目前法。非耳目之所到。枯木龍吟。觸髅虎嘯。要見夾山麼。風回京口潮未平。月在華亭人已老。

至日上堂。南天台北五臺。牛頭沒馬頭回。昨夜三更舉手相賀。且喜六陰俱剝。一陽復來。但願荊棘林。變為松栢栽。拈主丈云。水邊林下人。管什麼來不來。栽不栽。卓一下。只麼聊聞猛提取。縱饒確觜也花開。

座主至上堂。衲僧家。橫擔主丈。天下江山。無處不到。甚處是亮座主隱身處。十經五論。無一不知。那裏是良遂知處。明暗色空。無有不見。如何是德山見處。直饒知得親。見得到。三十棒未到你在。

佛涅槃上堂。花開世界春。春歸花自合。釋迦老子七十九年。大似勞而無功。有能著隻眼於開謝之表。則異色殊香。不妨將錯就錯。道舊至上堂。到處築著磕著。為什麼到處推尋不見。終日寂寂寥寥。為什麼終日排遣不暇。不因道伴來相訪。欲剖斯心誰得知。謝維那上堂。巖頭大師道。却物為上。逐物為下。大似嚼飴餒嬰兒。性燥底。一槌定當。高登法戰場中。因甚不入者保社。喝一喝。

結夏上堂。百草顛微塵裏。聖與凡同居止。示實相談妙義。九旬中不出是。會也無。莫過於此。

上堂。結夏半月了也。一句子。全開全合。全暗全明。拈來分兩破。放下又渾崙。若道只這便是昇元閣。曾未點頭。喝一喝云。又向甚處去也。

上堂。舉東山演祖示眾云。以四大海水。為一枚硯。以須彌為一管筆。有人向虛空裏。書得祖師西來意五字。老僧大展坐具。禮他三拜。若寫不得。佛法無靈驗。

師云。直是好笑。東山年臘最高。偏事禡筆硯。又不破錢買紙。却教人。於空中。描邈祖師西來意。報恩雖是晚生。今日看來。這般老婆心。也不消得。何故。文彩全彰。

上堂。舉別峯示眾云。不是風動。不是幡動。盧行者命若懸絲。仁者心動。訝郎當漢。又恁麼去。或者易後語云。救得一半。果若如此。魚目亂明珠。有屈無雪處。大眾。不是風動。不是幡動。高聲云。不是心動。莫有全身奉重者麼。

上堂。乾坤之內。宇宙之間。中有一寶。掛在壁上。達磨九年。不敢正眼覷著。而今衲僧要見。劈脊便打。雪竇大似詞窮理盡。腕頭有餘力者。出來。試扶持看。

蔣山癡絕和尚至。上堂。昔在白雲山中。得一則因緣。覓些縫罅。了不可得。今鍾山尊叔光臨。未免。借水獻花。貴圖家聲不墜。上

大人丘乙己。化三千七十士。爾小生八九子。佳作人。噫。忘却末後句了也。良久云。好語不可說盡。便下座。

中秋上堂。舉玄沙示眾云。世尊云。吾有正法眼藏。付囑摩訶大迦葉。猶如話月曹溪。豎拂猶如指月。鼓山出眾云。月[吃-乙+小]。沙云。這阿師。就我覓月。山不肯。歸眾云。道我問他覓月。師云。作家相見。因甚有肯。有一肯。莫是玄沙。搆不得他鼓山麼。莫是鼓山。識不破玄沙麼。若與麼。未可稱曹溪門下。若解撥開細霧。放出清光。自然南瞻部洲。北鬱單越。

臘八上堂。夜寒錯認定盤星。金屑霏霏翳眼睛。教壞平人至今日。惺惺剗地不惺惺。且甚處不惺惺。你諸人。還曾點檢麼。開眼也著。閉眼也著。

上堂。顧視左右云。利刀剪却。令人愛。便下座。

元宵上堂。教中道。譬如一燈。然百千燈。燈燈無盡。如何是最初一燈。或道。山河大地。日月星辰。此正是他影子。向光未發已前。倒轉舌頭。答我一問來。

掩室和尚忌。燒香云。者老凍[身*農]。無擒虎兇底爪牙。無辨龍蛇底眼腦。無奔流度刃底手脚。無嗅土知機底巴鼻。昔年狹路偶相逢。只有一些不賭。是如今冷地思量。揭諦揭諦。波羅揭諦。借庵遺書至。上堂。葉落歸根。來時無口。會得恁麼說話。最初末後。不離于今。海角天涯。總在這裏。石虎沿江走。泥牛入海眠。蹤跡既無。消息亦絕。阿呵呵。見也麼。等閑拗折蒼龍角。移身[跳-兆+亭]跳過新羅。大眾。借庵來也。錯。

上堂。舉趙州問僧。曾到此間麼。僧云。曾到。州云。喫茶去。又問僧。曾到此間麼。僧云。不曾到。州云。喫茶去。院主遂問云。曾到。喫茶去。不曾到。為什麼也喫茶去。州召院主。主應喏。州云。喫茶去。

師云。趙州如餓虎當途。遇物即噬。院主橫身。果遭一口。而性命猶在。

艮巖首座至。上堂。頻頻喚汝不歸家。貪向門前撮土沙。每到年年三月裏。滿城開盡牡丹花。箇是為未到家者說。能冷眼一覷。則東山老人。隱身無路。報恩今日。為到家者舉。還知麼。遂府出鉢盂。

結夏上堂。九旬禁足。三月護生。護生須殺。禁足須行。雲收天迥。雨過山青。出門句裏入門句。鼻直眼橫眉亦橫。

上堂。一夏三箇月。已過兩箇月。子細好生觀。只餘一箇月。說與林下人。莫空度歲月。或云。好箇頌子。不合落韻。只向道。一任檢責。

上堂。一九二九。百拙千醜。昨日今朝。地迥天寥。少林門下客。立處雪齊腰。千載令人恨不消。

元宵上堂。紹定癸巳。上元佳節。室內一盞燈。寒光迥然別。獵師神箭。挑之不焰。毗嵐猛風。吹之不滅。諸佛眾生。在其光中。出沒舒卷。日月星辰。在其光中。互相燦發。豈獨建鄴一城人。觀之不足。亦使盡大地人。見之歡悅。忽有人道。今年常住無收。不應如是點照。只向他道。今佛放光明。故作如是說。

掩室和尚忌。燒香。打圓相。女人拜。老楊岐。偏捏恠。依稀兔子喫牛糞。今日薰香瀹盞茶。豈是貧人思舊債。

上堂。空劫已前。綿綿密密。既往莫追。空劫已後。密密綿綿。未來且置。正當空劫。綿綿處密密。密密處綿綿。以何為證。攀卷枯樹子。春信在其中。

上堂。一夜春風浩浩。拂盡千花百草。十二危樓一倚欄。珊瑚枝頭日杲杲。

上堂。舉雲門示眾云。聞聲悟道。見色明心。乃舉手云。觀世音菩薩。將錢買胡餅。放下手云。却是饅頭。

師著語云。方始瞥地。

東山云。聞聲悟道。見色明心。引手作打杖鼓勢云。搯八囉扎。師著語云。熟處難忘。復云。此二老。一人推倒見聞。不離見聞。一人扶起聲色。不墮聲色。乃舉拂子云。還免得麼。擊禪床云。不因紫陌花開早。爭得黃鶯下柳條。

上堂。拈主丈云。主丈子。無規繩。有准則。長不得短不得。恰好亦不得。畢竟如何。作是觀時為正觀。若他觀者即邪觀。

佛生日上堂。釋迦老子道。天上天下。唯吾獨尊。若能直下承當。正好東潑西潑。

上堂。結夏五日了也。寒山子作麼生。眼倒生筋。水牯牛又作麼生。昨夜今朝又明日。主人翁擗。諾。笑殺傍觀。

蔣山和尚至。上堂。(是年水滂)華藏世界。有二十重。外有浮幢王剎。莫測涯涘。此娑婆世界。正在第十三重。初祖泛巨舟。自西天三周寒暑。而至金陵。舉此一端。餘皆可見。如今撮在主丈頭上。拈主丈云。有時洪波浩渺。有時一滴也無。換了多少人眼睛。贏得北山尊叔不滿一笑。且笑箇什麼。一灘高百尺。十灘高百丈。斫額望成都。成都在天上。

上堂。新學用工。猶如習射。彎弓架箭時。手眼俱親。久久自然。破塵破的。今日山僧。試放一箭。遂舉手云。看看。眾舉目。乃云。中也。

開爐上堂。得也與麼。未得也與麼。寒灰燒殺人。冷地不可臥。今與諸人。撥紅爐向活火去也。丹霞燒木佛。因甚院主眉鬚墮。參。

上堂。乾峰示眾云。法身有三種病。二種光。一一透得。始解歸家穩坐。餌不虛拋。雲門云。菴內人。為甚不見菴外事。一釣便上。後來僧問雲門。如何是透法身句。門云。北斗裏藏身。可謂頭正尾正。只如三種病二種光。作麼生。喝一喝云。又是從頭起。

道舊至。上堂。昨日遊山。一夜困睡。至五更三點。有三客。同至相見。就坐因問。近離甚處。一人曰。長蘆。問雅諱。曰不識。為甚不識。曰達大道兮過量。通佛心兮出度。又問其次。曰近離。鍾山。問雅諱。曰不知。因甚不知。曰內外中間覓總無。境上施為渾大有。又問其次。曰近離鄮峰。問雅諱。客便喝。因甚便喝。曰有節非干竹。三星遶月宮。山僧隨聲。亦與一喝。張觀察在傍曰。賓主相逢。此何理也。山僧不免向道。自古上賢猶不識。造次之流豈可明。

冬至上堂。并謝道舊。六陰剝。一陽復。寒谷交肩。春容可掬。少室山高難措足。斷絃須是鸞膠續。

上堂。鬧中靜悄悄。靜中鬧浩浩。側耳聽不聞。舉步行不到。沒語訛勿尋討。鷓作鷓鳴。鵲作鵲噪。

上堂。舉雲門問僧。光明寂照徧河沙。豈不是張拙秀才語。僧云是。門云話墮也。

師云。將軍費盡腕頭力。射中那知是石頭。

天基節上堂。至人無己。言猶在耳。萬法作本根。天地相終始。畢竟以何為驗。一占帝與九齡夢。三聽山呼萬歲聲。

遷祖堂。上堂。九年面壁。有理難伸。三日耳聾。無辭可措。堪悲堪笑。自昔自今。盡道以心傳心。一向將錯就錯。年代深遠。欵案難稽。既然呷汁罪同。合與一狀領過。

上堂。此一坐具地。內無王稅。復無征徭。己曾和中心樹子。隨契券。一時交付。畢竟那邊一至。與誰為鄰。

浴佛上堂。佛在母胎中一轉語。幸自可憐生。出母胎來。一向隨婁溲打之遶。輾一身泥水。累及後人。一年一度。以一盆湯洗之。則且置。母胎中一轉語。作麼生。依依稀稀水三點。曲曲彎彎月一鉤。

上堂。髑髏前成團成塊。一喚便回。脚跟下絕毫絕釐。三撥不動。且過在什麼處。

上堂。月不破五。歲不滿百。窄處放教寬。寬處捻教窄。如冲天之俊鷄。如當路之白額。敢有近傍者麼。骼。

結夏上堂。九十日安居。二千年聖制。念念三世十方。步步十方三世。何如鬧市裏。保壽面目全露。肉案頭。盤山自心密契。喝一喝云。使府近有指揮。不許攀條援例。

青苗會上堂。若論此事。如人作田相似。須知者一片田地。祖翁活業。努力深耕。及時下種。忽逢甘澤。自然發生。旱則澆灌。澇則疎通。滋養靈苗。俟其秀實。以南泉鎌子。收刈將來。普化連枷。從頭打過。麤舂細割。既有盧公淨淘熟炊。寧無雪嶠。渾家一飽。頓忘百飢。報恩因齋慶讚。也是家常。畢竟所種底。是穀是麥。若道總在裏許。可煞瞞肝。要端的麼。但願有錢留客醉。也勝騎馬傍人門。

上堂。機先領旨。海晏河清。句下明宗。天回地轉。剷除在我。建立非他。阿呵呵。豎拂子云。見也麼。擊禪床云。鷓子過新羅。

上堂。六月火邊坐。有眼無耳朵。鐵蛇鑽不入。鐵牛衝不破。畢竟如何。有眼無耳朵。六月火邊坐。

上堂。散夏餘五日。那事穩也未。爭似長汀子。低頭打覺睡。不管你。金烏東昇。玉兔西墜。生死到來。甚處回避。搖手云。低聲低聲。墻壁有耳。

上堂。古人底今人底。道著道不著。一場沒巴鼻。象王回旋。師子遊戲。拍禪床云。泊合扶不起。

上堂。去年今年。八月九月。一樹兩樹。丹桂離披。三枝四枝。黃花漏泄。於斯見面不相逢。於斯相逢復相別。老豐甘心未歇。騎箇無齒大虫。只管見人饒舌。阿呵呵。南北東西。一團生鐵。

元正上堂。元正啟祚。千門萬戶。眾物咸新。山間水濱。堂中首座。千花包裹。泊諸大眾。卷舒同用。各各伏惟尊候萬福。鎮海明珠。崑山美玉。豈不見。摩醯首羅天人。擘破面皮。豎亞三目。堪與人天為軌躅。

上堂。一處是。千處百處。非而亦是。一處非。千處百處。是而亦非。是而亦非。非而亦是。此兩句語。以那句為主。拍禪床云。是非裏薦取。

上堂。古德道。暫時不在。如同死人。且道不在。却在什麼處。喝。大好不在。

掩室和尚忌燒香。甌峰布鐵連陣。我曾長袖拂開。甌峰擲金剛圈。我曾鐵鞭擊碎。沒仇讎處起仇讎。無怨對中作怨對。今日何以報之。插香云。報之以此為最。

上堂。露柱燈籠。為諸人說底。是第二句。國師良久。是第二句。真實第一句作麼生。擬將心意學玄宗。大似西行却向東。

結夏上堂。以大圓覺。為我伽藍。過去諸佛。罪不重科。見在菩薩。理無曲斷。未來學人。咄。切忌草裏鞦。

上堂。舉趙州訪一菴主。問云。有麼有麼。主豎起拳頭。州云。水淺不是泊船處。又訪一菴主。問云。有麼有麼。主亦豎起拳頭。州云。能縱能奪。能殺能活。遂禮拜。

師云。能縱能奪。能殺能活。也是慣得其便。
上堂。喝一喝云。者裏不許。鑽龜打瓦。便下座。
上堂。機先轉步。句下騰身。與夫睡來合眼。鉢來開口底。相去幾何。莫有善窺鞭影者麼。
上堂。直下猶難會。尋言轉更賒。拈主丈云。不得喚者箇作主丈子。莫有轉身吐氣者麼。不得亂走。
解夏上堂。去年七月十五。去去留之不住。今年七月十五。住住推之不去。去也師子翻身。住也象王回顧。且道。去年底是。今年底是。若有道得。分一半與之。若道不得。一時分付。且分付箇什麼。一時分付與春風。
上堂。舉僧問曹山。雪覆千山。為什麼。孤峰不白。山云須知有異中異。僧云。如何是異中異。山云。不墮眾山色。
師云。混不得類不齊。六爻宛轉見重離。夜深下視千山白。不是其中人不知。
山堂。我有一言。徹根徹源。舉之不全。聽之不圓。擬問如何。蒼天蒼天。
上堂。我有一語。通今貫古。全主全賓。全規全矩。直下承當。未敢相許。
上堂。我有一機。對面提持。石火莫及。電光罔追。乃仄掌云。咦。
上堂。我有一要。千差齊照。未曾拈花。不勞微笑。擬問如何。雲橫海嶠。
上堂。我有一句。非默非語。日用見成。一時分付。拍禪床云。依前罔措。
上堂。舉東山演祖道。今夏諸莊旱損。吾總不憂。堂中一百禪人。不會狗子無佛性話。深以為憂。
師云。荷擔大法。不得不然。報恩諸莊旱損。亦何足憂。堂中五七兄弟。盡會狗子無佛性話。深以為憂。何故。鑊湯無冷處。
辭報恩上堂。跛跛挈挈。列列[造/火][造/火]。跛跛挈挈處。匙挑不上。列列[造/火][造/火]時。炎天散雪。十有二年。來住此地。楊岐家風。未曾漏泄。今漏泄。秤鎚元是一團鐵。

住建康府能仁禪寺語錄

侍者 宗煥 編

入院。踞方丈。烹金之爐。鑄人之模。淨名一默。國師三呼。雖然如是。你諸人。又向甚麼處摸索。喝一喝。

拈帖云。青山白雲。紅塵鬧市。見成公案。理當即行。為什麼不知有。度帖與維那云。公驗分明。

陞座。拈香。祝聖罷。遂就座。

僧問。馬祖陞堂。百丈卷席。意旨如何。師云。非父不生其子。進云。只如馬祖歸方丈。又作麼生。師云。還見馬大師麼。進云。雪竇道。正令不行。拗曲作直。又且如何。師云。又得傍人證明。進云。能仁門下。忽有箇漢。出來卷却席。和尚如何祇對。師云。落在第二。僧禮拜。

師乃云。掩關摩竭。三七日思惟不能。面壁少林。一九年推窮不到。如將折筯。攪動滄溟。只要魚龍知水為命。知則知矣。還曾夢見麼。新能仁因行掉臂。將金彈子。作泥彈子。撒向諸人面前了也。面赤不如語直。眼親曷若手親。莫有手眼俱親者麼。良久云。若無。新能仁今日失利。

舉五洩參石頭云。一言相契則住。不契則去。石頭據坐。五洩拂袖便行。頭召上座。洩回首。頭云。從生至老。只是這箇。回頭轉腦作什麼。五洩大悟。遂拗折拄杖。

師云。五洩問頭。如猛虎出穴。石頭據坐。似獅子當門。拂袖便行。令人疑著。末後因甚向三婆兩嬾。哆哆和和處。方悟去。還曾夢見麼。

當晚小參。山遙海闊古蘭若。月白風清老比丘。萬象森羅總賓客。相逢莫不小低頭。乳峰道。一花開大地春。古佛為什麼不著便。你若透得。也許伊是箇金毛獅子。

師云。阿呵呵。與麼說話。正是作賊人心虛。山僧不是普州人。斷不入這保社。因甚數日來。泥裏水裏。直得眼不見鼻孔。與麼不著便。莫有出手相救底麼。良久云。把梢把柂并搖櫓。分付同舟共濟人。復云。出得塵來又入塵。休論便重復便輕。試看門外清溪水。動靜由來一樣清。

開爐上堂。一番風雨送寒來。底事開爐爐未開。寄語參玄諸上士。冷湫湫處且相隈。所以道。休去歇去。古廟香爐去。冷湫湫地去。古人與麼道。也是寒灰燒殺人。喝一喝。

上堂。冠蓋駢闐。已為諸人。說不可思議法門。拈拄杖云。今請木上座。從頭註破。卓一下。

上堂。張智慧弓。發堅固箭。重重鐵壁。疊疊銀山。那邊更那邊。一透一切透。忽被雄師百萬。劍客三千。打一圍遶時。却如何轉身。咄。眼若不睡。諸夢自除。

上堂。厨庫對僧堂。三門朝佛殿。南來與北來。一見一切見。見後如何。客是主人相師。

臘八上堂。晝見日夜見星。妙高山色青又青。便與麼去。不惟打失鼻孔。亦乃失却眼睛。且過在於何。黃河從源濁。

上堂。舉汾陽示眾云。識得主丈子。一生參學事畢。

師云。古人略露星兒。可謂一了百了。能仁今日別作箇商量。舉主丈云。者箇是主丈子。諸人那箇不識。既已識得了。宜善護持。

上堂。青蘿夤緣。直上寒松之頂。白雲淡泞。出沒太虛之中。國師在諸人眼睛裏出頭來。眉毛上翻身去。若也見得分明。始知萬法本閑。惟人自鬧。

聖節上堂。黃河清聖人生。君臨四海。子育群情。還會麼。從茲擊鼓臥邊城。永日寥寥賀太平。

上堂。吾有大病。非世所醫。

茗溪老人。言猶在耳。是什麼病。攢簇不得底病。扶持不起。人人皆有。莫謗他好。正覓起處不得。咄咄。諸佛不病。為伊惺惺。惺惺正是病。眾生若病。即非眾生。曾為宕子。偏念客情。曹山可謂識病者。今日山僧。也要與茗溪相見。他道。吾有大病。非世所醫。只向道。請歸方丈歇去。管取病者不病者識病者。瓦解冰消。掩室和尚忌燒香。甌阜山頭。龍蛇陣上。將頭不猛。累及三軍。自此江西湖南。便與麼去。吳山蜀水。紛紛紜紜。重城夜月。青山白雲。一度思君復恨君。

江東陳招捕制置。為陣亡請陞座。問答不錄。

靈山舉花。飲光微笑。少林面壁。神光點頭。自爾四七單傳。二三直指。不與物我為侶。不與聖凡同塵。寂爾忘緣。超然自得。曹溪之後。江西已來。明大機顯大用。倒使司農印。高提王庫刀。掃蕩欃槍。剪除寇賊。肅清寰宇。建立太平。乃顧視大眾云。者裏承當得去。功不浪施。苟或未然。淮山雨過添新綠。疑是將軍破虜心。復有一偈。赤心報國丈夫兒。進退存亡已自知。盖世英雄寧畏死。一時忠勇更無誰。冶城夜月將軍墓。蔣岳春雲武帝祠。從此龍光山下寺。龜哥也著載豐碑。

佛涅槃上堂。十五日已前佛生。佛未曾生。你諸人在我這裏。不得起攀仰之心。十五日已後佛滅。佛未曾滅。你諸人在我這裏。不得起追思之想。正當今日。攀仰之心既無。追思之想亦寂。你諸人在我這裏。合作麼生。喝一喝。

上堂。三月二十五。芳春餘幾許。一道平常心。顛言及倒語。謾道舉手摘楊花。那知漫空飛柳絮。趁流光猛提取。喫粥了也。洗鉢盂去。

上堂。舉世尊。見文殊在門外立。乃云。文殊文殊。何不入門來。文殊云。我不見一法在門外。何得教我入門來。

師云。說得道理好。頌云。不見一法在門外。平地無端自活埋。若是金毛師子子。急須移步入門來。咦。

上堂。禪禪萬萬千。眉插鬢耳垂肩。千花影裏。百草頭顛。或時虛空裏釘橛。或時旱地上生蓮。引得寒山子笑掀天。吟得新詩一兩聯。足成三百篇。喝一喝。習氣猶在。

謝莊主上堂。青山為家。白雲作戶。穩密田園。鴉飛不度。鼓腹臺前一轉頭。不覺四月二十五。

上堂。長安甚鬧。我國晏然。古人一期酬對。不妨奇特。未有出身之路。喚什麼作我國。縱遇鋒刀常坦坦。假饒毒藥也閑閑。

上堂。九十日克期取證。八十日已過。有預通箇消息底麼。良久云。異獸藏頭角。靈禽惜羽毛。

解夏上堂。舉僧問風穴。九夏賞勞。請師言薦。穴云。出岫拂開龍洞雨。汎波僧涌鉢囊花。

師云。論功惜賞。總未作家。若問能仁。只向道。好將一滴曹溪水。散作人間三日霖。

上堂。一句如鐵橛子。少室秤提不起。曹溪搖撼不動。有伎倆者。一任左扶右持。無伎倆者。不妨全體受用。喝一喝云。巴蓬集壁。去天一尺。

上堂。敲床拊按。邪法熾然。豎指擎拳。正宗平墜。忘言得旨。滯慙迷封。一句投機。離宮失殿。畢竟如何。喝一喝。

上堂。舉僧問國師。如何是本身盧舍那。國師云。與老僧過淨瓶來。僧將淨瓶至。國師云。却安舊處著。僧將淨瓶安舊處。復問如何是本身盧舍那。云古佛過去久矣。

雲門道。無朕迹。

雪竇道。直得一手指天。一手指地。爭得無。還會麼。雲在嶺頭閑不徹。水流澗下太忙生。

師云。古佛動地放光。可憐只麼蹉過。雲門千手掩之不能。雪竇千眼觀之不足。若會去。雲在嶺頭。若也不會。水流澗下。會麼。拍禪床下座。

上堂。拈主丈云。鱗皴主丈子。非長亦非短。東行西行處。十分著力。歸家穩坐時。一味不管。著力處是我同流。不管時吾之道伴。且道伴同流。是一是二。靠主丈云。見成公案。

上堂。龍蟠虎踞。今古嶷然。楚水秦淮。滔滔無間。問著因甚麼道不會。

上堂。舉僧問巖頭和尚。利劍斬天下。誰是當頭者。巖頭云。暗。僧擬進語。巖頭云。鈍漢。

師云。者僧一劍。擬取天下人頭。到巖頭面前。先折一命。直至而今不再活。

上堂。藏身處沒蹤跡。沒蹤跡處莫藏身。古人與麼說話。未出窠子。如今鍾山上把手。御街裏挨肩。與麼說話。還出得窠子也無。良久云。緩緩。

上堂。舉馬大師示眾云。凡有言句。是提婆宗。以此箇為主。師頌云。玉轉珠回著眼看。有相干處沒相干。只將此箇以為主。喝一喝云。一劒倚天星斗寒。

謝莊主上堂。進一步退一步。鑿頭鑿底無回互。以一機奪一機。沒便宜處討便宜。插鋤叉手田中事。是即擔泉帶月歸。記取話頭。臘八上堂。金輪殿上。捨重從輕。正覺山前。弄真象假。將無邊虛空。剗一孔籠。於一孔籠。顯示無邊虛空。盡大地窮未來。情與無情。把作一狀領過。不受他瞞底。同往大殿。展坐具。禮三拜。看伊面皮厚多少。

上堂。舉雲門云。十五日巳前。即不問。十五日巳後。道將一句來。自代云。日日是好日。

師云。蜀山楚水。江北江南。步步穩密。念念相諳。前三三後三三。眨上眉毛早不堪。畢竟如何。參。

上堂。凜凜孤風藏不得。倒騎角虎出山來。大唐國裏人無數。嚙酒嚙糟喚不回。喚得回。笑容未動。牙爪先開。有捋虎鬚者麼。喝一喝。

掩室和尚忌燒香。笑密庵巧。喜松源拙。掃臨濟喝。折德山棒。自謂不躡前蹤。又道拋三放兩。自謂無法與人。又道開口不在舌頭上。阿呵呵。者老漢。今日被我點檢了也。還有不甘底麼。禍不入謹家之門。遂插香。

上堂。舉僧問古德。如何是佛。古德云。清談對面。非佛而誰。

師頌云。偃蹇蒼髯十萬本。參差翠玉數千竿。風敲月戶三秋冷。雨打茅堂六月寒。

上堂。德山一棒。臨濟一喝。家貧難辦素。事忙不及草。三千里外見譎訛。未免蝦跳不出斗。卓主丈一下。喝一喝。

上堂。是句亦割。非句亦割。辜恩負義漢。聞與麼道。便與麼去。未免落在第八。何故。水雲月色疑無地。花柳春風別是村。

上堂。舉僧問陳尊宿。以一重去一重。即不問。不以一重去一重時如何。宿云。昨日栽茄子。今日種冬瓜。

師云。籠中白鶴。意在雲霄。網底遊魚。龍門難度。睦州老人。賴遇者擔板漢。

端午上堂。今朝端午。不欲効先作採藥去。只據見定用底。亦能殺人。亦能活人。如何是見定用底。喝一喝云。只與麼去。和骨頭換却也不定。

解夏上堂。結夏解夏。靈山舊制。鵝以瓶拘。魚以網繫。拈主丈。卓一下云。風雷變化在今時。霄漢振飛何更擬。有麼。再卓主丈一下。

上堂。舉僧問五祖。一大藏教。是箇切脚。未審切箇什麼字。祖云。八囉娘。師云。東山老人。雖則滿口鄉談。不妨奇特。看來却是類格切。何以見得。別國却為親。

住建康府蔣山太平興國禪寺語錄

侍者 祖定 編

師於嘉熙二年。九月十九日。在徑山受請。

無準和尚。引座云。寶公寶山之寶。非青黃赤白等色。亦非大小方圓等相。三賢莫辨。十聖那知。是故。公亦祕惜。若非其人。未易分付。今日石溪。不涉安排計較。突然在前。無心而得。既得之已。亦不以為奇特。眩曜於人。是則故是。爭奈我此千百衲子。虛心久矣。皆欲一見。是以鳴鼓集眾。懇懃虔請。願陞此座。於香煙起處。放此寶光。令我一眾。因此寶光。獲見此寶。同得受用。盡未來際。永無退失。然雖恁麼。更有一事。不得不疑。或有箇沒意智漢。不識好惡。犯眾出來道。蔣山蔣山。不得將常住物。作自己人情。吾姪却須自作支遣。莫教累及老叔。恐人無憑。先此奉白。

師拈帖云。羅籠得住。以此却不住。呼喚不回。以此却又回。且諍訛在什麼處。度帖云。惱亂春風卒未休。

指法座。天下徑山。第一導師。所踞之座。千百衲子。常共圍遶。盡大地人。仰之不及。因甚今日。新蔣山却入一分。快便難逢。乃陞座。

僧問。本自無心有所求。無邊寶藏自相投。誌公和尚遙招手。人在凌霄暗點頭。學人上來。願聞法要。師云。五峰煙冪冪。雙澗水泠泠。進云。記得寶公大士。令人傳語思大和尚。何不下山教化眾生。目視雲漢作什麼。此意如何。師云。三臺須是大家催。進云。思大云。三世諸佛。被我一口吞盡。何處有眾生可度。又作麼生。師云。一撥便轉。進云。當初若是和尚。未審如何祇對。師云。劔去久矣。僧禮拜。

師乃顧視大眾云。還知麼。五峯峭峙。雙徑岿巍。非其人不可到。親到者乃方知。我觀此會。千百龍象。無一不是親到者。且二千年前。靈鷲真規。何異今日。還辨明得麼。還透得過麼。若也辨明

得。透得過。不妨江之南北。浙之東西。嶮布危分。恢疆拓土。忽被徑山不放過時如何。相逢不下馬。各自奔前程。

敘語不錄。

復云。適來堂上尊叔。指出寶公寶山之寶。對眾分付。且令放此寶光。供養大眾。庶因此光。獲見此寶。與麼提掇。照用齊顯。與奪雙行。一點瞞諸人不得。諸人分上。語默動靜。轉轆轤地。還瞞得堂頭。一點也無。可謂此寶放光。交相照映。若教小姪。頭上安頭。不免犯將常住作自己人情之誠。却有一事。不容不疑。徑山門下。忽有箇出來緩緩道。與麼放光。總是說底。畢竟寶在什麼處。却又如何支遣。良久云。泊乎錯下註脚。

入院踞方丈。顧視大眾云。山僧已是一杓兩杓。潑你諸人了也。有攢眉便回者。脚跟下自領一頓。苟或遲回。待獨龍崗點頭。為你說破。

拈帖。衲僧家。尋常鼻孔遼天。去住自在。為什麼。剛被這箇捩轉。度帖云。却煩維那。為我分雪。

陞座。拈香祝聖罷。遂就座。

僧問。記得保壽開堂。三聖推出一僧。意旨如何。師云。金將火試。進云。保壽便打。又作麼生。師云。不可放過。進云。三聖道。恁麼為人。非但瞎却這僧眼。瞎却鎮州一城人眼去在。[吃-乙+小]。師云。為人須為徹。進云。保壽擲下主丈歸方丈。又且如何。師云。象王行處絕狐蹤。進云。新蔣山今日開堂。有何垂示。師云。主丈未到你喫在。進云。可謂今古應無墜。分明在目前。師云。放過一著。僧禮拜。

師乃云。圓悟一關。全無肯路。把定則雲橫嶽立。斫額不容。放行則地闊天開。橫身有分。此猶是諸方共用底。須知更有放行處把定。通幽有徑。到者還迷。把定處放行。竹戶松窗。靄然和氣。所以杖頭刀尺。裁剪臨時。袖裏風雲。開遮在我。新蔣山與麼告報。諸人不得與麼流通。何故。太子巖高風月異。一回親到始應知。復舉適來禪客。問。保壽開堂三聖推出一僧。保壽便打。聖云。恁麼為人。非但瞎却這僧眼。瞎却鎮州一城人眼去在。壽擲下主丈歸方丈。

師云。江西頂髓。濟北眼睛。非具通天作略底。莫能擔荷。又非作略通天底。莫能成禡。雖然。未免吾宗掃土而盡。拈主丈云。古人且置。今日合作麼生。遂靠主丈云。近見不如遠聞。

當晚小參。曉披北山雲。暮宿北山雨。來為北山人。須辨北山主。舉拂子云。若已過圓悟關。昇寶山堂。入正傳室底。自然與山中主人。面面相看。春風和氣。敢問寶公大士。未剖面門之前。為甚描也描不成。畫也畫不就。要知落處麼。風行草偃憑誰委。水滴冰生

只自知 復舉。寶公大士云。大道只在目前。要且目前難覩。欲識大道真體。不離聲色言語。乃豎一指云。這箇是色。拍禪床云。者箇是聲。說底是言語。大道真體。在什麼處。急須著眼看仙人。莫看仙人手中扇。

上堂。簷頭滴滴。分明歷歷。好片祖師心。無端已狼籍。只如觀世音菩薩。將錢買胡餅。放下手。却是一塊生鐵。誘訛在什麼處。接雪峰癡絕和尚書上堂。客從京都來。手持福建信。說道。石門巖嶮鐵關牢。何似蟠龍萬仞高。無角鐵牛攔不住。却登象骨鼓波濤。大眾。雪峰毬子棍也。退步斫牌者誰。

上堂。是不是。非不非。交肩過。携手歸。南泉不出方丈。為什麼在莊喫油糍。今兮昔兮同一時。知音知後更誰知。

上堂。舉僧問投子。定慧等學。明見佛性。此理如何。投子云。打水用桶。舀粥用杓。又南泉問黃蘗。定慧等學明見佛性時如何。蘗云。十二時中。不依倚一物。始得。師云。問頭一同。答處各異。參黃蘗底。須是見投子。見投子底。須是參黃蘗。若一穿穿過。蔣山主丈子。未點頭在。

上堂。道遠乎哉。觸事而真。聖遠乎哉。體之即神。百丈遭喝。三日耳聾。水潦被踏。起來大笑。何似一指頭禪。一生受用不盡。喝一喝云。俱抵來也。

謝冬齋秉拂上堂。香積世界。以香飯作佛事。娑婆世界。以音聲為道場。我此一眾。不離本處。歷四十二恒河沙國土。親到上方。飽飫眾香。頃刻之間。經二千一百餘年。還至本處。聽演妙法。忽被多口老淨名。道其施汝者。不名福田。供養汝者。墮三惡道。又作麼生。只向道。慚愧慚愧。

上堂。鍾阜龍盤。石城虎踞。牛首橫前。方山傍住。正傳閣上。一觀不覺雙眉陡聚。何故。秦淮一帶西流去。

上堂。舉青原和尚。僧問。如何是佛法大意。原云。廬陵米作麼價。

師頌云。廬陵米價沒高低。直下承當已是遲。多少牙人并販子。却來升合較毫釐。

上堂。拈主丈。卓一下云。七佛已前只與麼。又卓一下云。七佛之後亦復然。卓一下。片雲生晚谷。孤鶴下遼天。

上堂。心王如不動。六國自安寧。其或咬定牙關。翻轉面具。利刀斫斷。大斧鑿開。又如何道得不涉功勳句。

聖節滿散上堂。仁王一卷經。舒卷甚分明。諸佛及眾生。無非受持者。與麼說話。正是序分。如何是正宗分。良久云。有星皆拱北。無水不朝東。

上堂。舉僧問廣德。如何是佛。德云。畫戟門開見墜仙。僧問悟空。畫戟門開見墜仙。意旨如何。悟空云。假饒親見釋迦文。智者咸言不是佛。德云。悟空古佛。豈止羊二十口。

師云。二古佛。一人斬新建立。一人倒底掀翻。且道。建立底是。掀翻底是。若也定當得出。豈止羊二十口。

上堂。沒譎訛處最譎訛。美玉無瑕貴切磋。幾度渾崙提不起。鼠肝虫臂總由他。復云。彩奔覲家。

上堂。十一十二。無處回避。十四十五。充塞寰宇。者邊那邊。或去或住。一箭上紅心。黃金如糞土。

上堂。事無一向。智有千差。有時丁一卓二。有時放兩拋三。若向丁一卓二處見伊。伊不在丁一卓二處。若向放兩拋三處見伊。伊不在放兩拋三處。忽有箇出來道。你口勞勞地底[吃-乙+小]。只向他道。莫錯認定盤星。

上堂。拈主丈云。四七二三。天下老和尚。因甚麼向這裏納敗。卓一下云。不是標名虛事禡。如來寶杖親蹤跡。

浴佛上堂。風磨湛湛真空體。雨洗如如法界身。大地山河并萬象。今朝與佛共生辰。且道。是那箇佛。低聲低聲。

結夏上堂。以大圓覺。為我伽藍。漫天網子。身心安居。平等性智。罩住了也。還有透得出底麼。喝一喝。

上堂。舉睦州問僧。什麼處來。僧云。那邊筍。州云。老僧屈。僧云。和尚即得。州云。檐枷過狀。劈脊便打。

師云。這僧據虎頭捋虎鬚。竟莫逃虎口之厄。

雲峯云。睦州何用繁辭。那邊筍。劈脊便打。

斬釘截鐵。不無雲峯。擒縱之機。還睦州始得。

上堂。說時默。默時說。處處投機。門門合轍。正是虛空裏釘橛。須信虛空便是橛時如何。喝一喝。

上堂。阿呵呵。昨夜三更時。鷄足崑低頭假寐。惺惺石呼云。主人翁惺惺著。自倒還自起。便乃舉頭。只見西天數息繫念。東土危坐搖頭。被巖頭叢公喝云。何不嚏眠去。咄。泊合瞌破鍾樓。

謝兩班上堂。大廈非一木可支。巨舟須眾手可濟。眾手既集。亦復同心。南北東西。無往不利。以手指右邊云。截流一句子。更看把梢人。復云誰。

上堂。久晴不雨則旱。旱固可憂。久雨不晴則澇。澇亦可憂。不旱不澇。尤為可憂。既不旱澇。憂箇什麼。不曾下得春時種。空向田頭望有秋。

上堂。舉鹽官喚侍者。將犀牛扇子來。者云破也。官云。扇子既破。還我犀牛兒來。侍者無對。師云。清風動地。投子云。不辭將出。恐頭角不全。師云。却與侍者出氣。雪竇云。我要不全底頭

角。師云。重處偏墜。石霜云。若還和尚即無也。師云。何不早道。雪竇云。犀牛兒猶在。師云。猶欠蹄角在。保福作[○@牛]相。師云。身似脚不似。雪竇云。適來何不將出。師云。恰是。保福云。和尚尊年。別請人好。師云。[跳-兆+孛]跳作麼。雪竇云。可惜勞而無功。師云。也好穿却。復云。鹽官索一犀牛兒。得一犀牛兒。引得眾角森然。尾巴齊露。其間皮毛同異。骨骼高低。總被雪竇無星秤尾。缺畫尺頭。分寸錙銖。秤量俱定。只有些子誦訛。抑不得已。

復說頌云。犀牛扇子破多時。全暗全明。問著元來總不知。最為親切。無限清風與頭角。成群作隊。盡同雲雨去難追。鼻繩在我手裏。大眾若要清風再復。頭角重生。何獨雪竇門下。彼一時此一。時。有能平展家風。自然古今不墜。扇子既破。還我犀牛兒來。莫有清風步步者麼。良久云。雲月溪山面面殊。

上堂。我有一句子。待秦淮流向東。即向汝道。便下座。

上堂。舉雲門示眾云。人人盡有光明在。看時不見暗昏昏。作麼生是諸人光明。自代云。厨庫僧堂。

師云。高舉慧炬。助佛光明。却向厨庫僧堂裏著到。

上堂。四月十五。雲龍風虎。掃蕩檣槍。肅清寰宇。五月十五。松巒竹塢。明月作龕。白雲閉戶。即今六月十五。又作麼生。喝。毒蛇橫古路。

山前行道上堂。山前田地誰為主。喜見靈苗戰晚風。將謂年年求歲稔。由來歲歲願年豐。且年豐歲稔。是同不同。向田頭田尾行一遭。驀然踏著也不定。

解制上堂。四月十五日。結却布袋頭。拈主丈云。主丈子。卷卷攣攣。轉仄無路。今日解開。主丈子作麼生。卓一下云。旱天施雨澤。平地鼓風濤。

上堂。舉乾峰示眾云。法身有三種病二種光。一一透得。始解歸家穩坐。

師云。三種病二種光。即不問。且如何是法身。不識廬山真面目。只緣身在此山中。

開爐上堂。密密綿綿細著工。從來此室不通風。庭前三尺齊腰雪。身在靄然和氣中。為什麼明招道。箇裏風頭稍硬。且歸暖處商量。喝一喝云。不得瞌睡。

上堂。雨從何來。風作何色。有人於此代一轉語。可謂饑饉劫中飲食。焦枯境裏雲雷。山僧作一頭驢。馱米歸來。別甌炊香。供養有分。忽有人道。下語即不辭。馱亦不無。且米在什麼處。只向他道。太無厭生。

謝冬齋秉拂上堂。於食等者。於法亦等。於法等者。於食亦等。法食雙運。平等普熏。解空因什麼。被淨名所呵。兩彩一賽。

上堂。舉僧問香林。如何是室內一盞燈。林云。三人證龜成鱉。師頌云。風前敲落珊瑚枝。白玉鞭頭直下垂。要識香林家住處。水晶宮殿草離離。

臘八上堂。我佛入深山。六載冷相守。中夜一舉頭。南辰對北斗。於此眼皮穿。一場成漏逗。普觀大地人。此事皆具有。至今二千年。公案宛如舊。不見趙州曾有言。修行變作不唧[口*留]。

上堂。直上覷直下覷。七佛已前。閑家潑具。喝一喝云。少室鐵牛。黃梅石女。

元宵上堂。百丈下堂句。雲門顧鑿咦。進前叉手立。端的許誰知。若也知去。譬如一燈傳百千燈。燈燈無盡。若也未知。切忌向燈影裏走。

掩室和尚忌燒香。這老子。虎據甌峯。十有二年。目光電卷。嘯韻風生。有入其穴。斂其目。編其鬚。収其尾。騎之而不得下者。過在阿誰。悔不慎當初。

上堂。舉疎山垂語云。老僧咸通年已前。會得法身邊事。咸通年已後。會得法身向上事。雲門問。如何是法身邊事。山云。枯椿。如何是法身向上事。山云。非枯椿。門云。還許學人說道理也無。山云。許。門云。枯椿豈不是明法身邊事。非枯椿豈不是明法身向上事。山云。是。門云。法身還該一切也無。山云。作什麼不該。門遂指淨瓶云。法身還該這箇也無。山云。闍黎莫向淨瓶邊會。門遂作禮。

師云。山僧當時若見。也只以手拍一拍云。笑倒傍觀。復頌云。法身向上法身邊。會得咸通無後先。一箇矍來一箇跛。擔為一擔更無偏。

上堂。古古今今路。朝朝暮暮行。因甚者一搭子踏不著。無邊香水海。百億須彌盧。撮來如粟粒大。因甚見不到。良久云。只為分明極。翻令所得遲。便下座。

上堂。立足於萬仞懸崖之巔。方有撒手之理。分身於三尺露刃之下。方有斷命之時。有斷命之時。有撒手之理。方言絕後再甦。欺君不得。而今莫有絕後再甦底麼。喝一喝。

上堂。平懷常實事同風。正在昏昏夢寐中。扶起脊梁重猛省。莫教蹉過五更鍾。眾中或有箇出來道。已蹉過了也。只向他道。一釣便上。

謝知事上堂。一句子。有時坐斷乾坤。籠罩今古。有時風高月冷。海晏河清。有時變化晦明。興雲致雨。今日總拋向面前。切不得世諦流布。

上堂。凭欄拭目舊山川。疊疊峰巒帶曉煙。不是夢中論夢事。今朝正是普通年。豎起一指云。以此為證。

上堂。舉趙州云。苦沙鹽大麥醋。菽黍米飴蠶蒿苳。又云。裋無襠袴無口。頭上青灰三五斗。師云。趙州老人。賣弄不少。

退院上堂。白髮垂垂一葉身。今年貧似去年貧。住山不與山為主。水石煙雲也笑人。

住平江府虎丘山雲巖禪寺語錄

侍者 宗茂 光玉 編

入院。踞方丈。與麼也在我。不與麼也在我。明眼漢。擔主丈。遶天下橫行。為什麼。透這些子不得。喝。

拈府帖。舉帖云。二千年前。靈山付囑品。二千年後。吳地流通分。度帖云。却煩維那。普告大眾。

陞座。拈香祝聖罷。遂就座。

垂語云。一尋秋水逼人寒。幾度臨崖著眼看。不動鋒鋸提得去。早知傷手犯波瀾。莫有不犯波瀾底麼。

僧問。昔日鍾山頂上。慣釣鯨鯢。今朝海湧峰頭。大開爐鞴。正恁麼時。祝 聖一句。作麼生道。師云。祥光生六合。瑞氣遶乾坤。

進云。古人道。據虎頭収虎尾。第一句下明宗旨。如何是第一句。師云。虎頭虎尾一時収。僧禮拜。

師乃云。佛未出世。祖不西來。一人人鼻孔遶天。壁立千仞。泊乎蘇州有常州有。是第二句。江南無江北無。是第八機。直饒截斷吳松。拓開海湧。正在虎丘門外。只如跨虎丘門。陞虎丘堂。入虎丘室。見虎丘人。摩捋虎鬚。雍容談笑。却又是阿誰分上事。莫言深遠無人到。滿目青山皆故人。復舉乳源和尚示眾云。西來的的意。也不易舉。時有僧出。源便打云。而今是什麼時節出頭來。

師云。盡道乳源恁麼提唱。如虫禦木。殊不知。這僧未出頭時。已落他陷穽了也。

當晚小參。教中道。見見之時。見非是見。見猶離見。見不能及。且道。見箇什麼。古人道。知而無知。不是無知。而說無知。知箇什麼。與麼則語默動靜。不墮見聞覺知。見聞覺知。不離語默動靜。所以圓悟禪師。舉拳問隆祖云。見麼。隆祖云。見。圓悟打一拳云。頭上安頭。隆祖大悟。且道那裏是它頭上安頭處。者裏見得。頓超知覺。獨脫見聞。處處全彰。頭頭顯露。千車共轍。四海一家。虎頭虎尾。一時収却。又如何轉側。江上青山殊未老。屋頭春色放教遲。復舉乾峯示眾云。法身有三種病二種光。一一透得。

方解歸家穩坐。雲門云。庵內人。為什麼不見庵外事。乾峰呵呵大笑。門云。正是某甲疑處。乾云。子是什麼心行。門云。也要和尚委悉。

師云。把手同歸者。琅琅笑語新。移身藏北斗。舉步入南辰。少室殘冬雪。武林三月春。轆轤千萬偈。頑石兩眉伸。

謝普門首座。留兩班上堂。白雲舉雪竇頌云。偶續靈峰照夜燈。遽泛鐵舡下滄海。承天此日也隨例。泛一隻鐵舡。文殊普賢。招頭把柂。觀音彌勒。打篙搖櫓。山僧贏得坐地看楊州。

師云。白雲祖師。清白傳家。古今榜樣。虎丘喜有見成舟楫。招頭把柂。打篙搖櫓。一一見成。惟是諳水脉別波瀾。坐舡頭者。捨普門而誰。山僧亦不敢端坐看楊州。何故。舡上無散工。

上堂。知之而行。見之而止。對面白雲千萬里。言中定旨。語外明宗。一重一重復一重。良久云。斯門寂寂無關鎖。清坐不知誰與同。

上堂。舉石霜在滄山。篩米次。滄山云。施主物。不得拋撒。石霜云。不敢。滄山乃拾起一粒。你道不敢。者箇是什麼。霜無語。滄山云。你莫輕者一粒。千粒萬粒。從者一粒生。霜云。者一粒。從什麼處生。滄山呵呵大笑。遂告眾云。米裏有虫。

師云。滄山慈悲心安在。非惟兩度放過。又且掘地深埋。當時若是臨濟門下。管取別有長處。

謝道舊上堂。三十年前。得一轉語。不在天台南嶽。便在江西湖湘。有時千思萬思。思之不來。三十年後。不復思矣。却又在前。且道是什麼一轉語。清風來故人。

上堂。摩竭陀國。少室峰前。盡力道不得底。一時分付阿誰。良久云。塞壑填溝猶自可。風吹日炙可憐生。

浴佛上堂。舉世尊初下生來。一手指天。一手指地。云天上天下。惟吾獨尊。後來雲門云。我當時若見。一棒打殺。與狗子喫。貴圖天下天平。

阿呵呵。一場好笑。且笑箇什麼。未出胞胎事已蹉。出胞胎後轉誑訛。韶陽主丈頭邊眼。供佛燒香不在多。

謝兩班上堂。舉道吾問雲崑。大悲菩薩。用許多手眼作麼。崑云。如人背手摸枕头。又陸巨大夫。問南泉。大悲菩薩。用許多手眼作什麼。泉云。如國家用大夫作麼。

師云。二尊宿。一人理上主持。一人事上施設。未免各有偏枯。有問虎丘。大悲菩薩。用許多手眼作麼。即鞠躬云。全火祇候。

上堂。天高地迴。海闊山遙。秋風襲衣。主丈[跳-兆+孛]跳。只如萬里無寸草處。還有人道得麼。看脚下。

上堂。初三十一。上上大吉。中九下七。有口掛壁。雙林傅大士。儒履道冠。蔣山梁寶公。剪刀曲尺。笑倒生公臺畔石。

上堂。有句無句。如藤倚樹。樹倒藤枯。毒蛇橫路。咄咄咄。縮頭去。

上堂。舉琅琊云。汾陽先師道。汾陽門下。有西河獅子。當門踞坐。但有來者。即便咬殺。作何方便。入得汾陽門。見得汾陽人。琅琊者裏。也有踞地獅子。若有來者。即自喪身失命。作何方便。入得琅琊門。見得琅琊人。師云。二尊宿。起模畫樣。只要控人入路。山僧也有箇方便。不用入其門。見其人。只消吒沙地。哮吼一聲。壁立千仞。便乃踞其窟穴。拔其爪牙。還有恁麼者麼。拍禪床一下。

上堂。十五日前。處處逢渠。問著。為什麼道不知。十五日後。拍拍是令。問著為什麼道不會。正當十五日。龍蛇易辨。衲子難瞞。舉拳云。且道。山僧手內是什麼。參。

臘八上堂。昨夜三更。文殊普賢二人。在善法堂前。一云。大覺世尊。今日成等正覺。一云。世尊從曠劫已來。成等正覺。如是二人。分辨不已。被王老師。各與二十主丈。一時趨出。雖然。官不容針。也有一問趙州道。棒教誰喫。喝。只知問過。不知正令已行。

上堂。揀擇於是非句外。呈露於啐啄機先。總是草窠裏輓。莫有透關底麼。老僧罪過。

上堂。諸佛機。祖師意。百草頭。雙眉底。不可得而一。不可得而二。趙州關即且置。雲門曲作麼生。一堂風冷淡。千古意分明。元朝上堂。劉右司施法衣囑云。清惠公所製。遇陞座說法一披。大眾。座已陞。衣已披。法作麼生說。但得雪消去。自然春到來。州府散 聖節陞座。(問答不錄)五須彌盧之高。未足為高。以其高可窮。四大海水之深。未足為深。以其深可測。虛空法界之量。不足為廣。以虛空法界之量可量。世界微塵之數。不足為多。以世界微塵之數可數。遂舉拂子云。如是之法。不可窮。不可測。不可量。不可數。如是之法。既如是。聖人之壽亦如是。要會如是之法麼。以拂子擊禪床云。如是如是。

因雪上堂。五九四十五。太陽開門戶。一點微雲何處來。散作人間三日雨。曉來忽推窗。所見非常處。白玉作樓臺。爛銀為國土。鹽官王老師。歡喜無著處。拈起須彌槌。擊動虛空鼓。清音聞遠近。雅韻貫今古。法眼和一通。聽之猶莽鹵。古人有言兮。千年田八百主。

掩室和尚忌拈香。最初機。末後句。有准繩。沒規矩。豈可錯承當。豈可錯分付。

遂舉香云。若道有分付。辜負先師。若道無分付。亦是辜負先師。有道得者麼。插香云。寥寥此日一爐香。鐵作心肝也斷腸。

上堂。即心即佛。黃葉作黃金。非心非佛。蝦跳不出斗。不是心不是佛不是物。喝一喝云。劔去久矣。

上堂。初五初十。鐵蛇鑽不入。有也莫將去。無也莫將來。雖然南嶽自南嶽。天台自天台。那更峨嵋對五臺。撫禪床下座。

上堂。斬關之用。截鐵之機。若非作家。不免傷鋒犯手。平高就下。拆半裂三。雖是作家。亦未免拖泥帶水。只如春雷一震。蟄戶自開。因甚却道。龍無龍句。

上堂。有所說野干鳴。無所說獅子吼。山僧恁麼道。正是野干鳴。畢竟如何是獅子吼。眾中有麼。出來哮吼一聲看。如無。拈主丈云。主丈子代一轉語。卓一下。

即翁首座相訪上堂。仰山夢往天宮說法。雖則惺惺。未免落在第二。爭似即翁在靈山。與老僧交承第一座。其所說之法。諸人知麼。今古應無墜。分明在目前。

上堂。舉大慧問無著。古德不出方丈。因甚到莊喫油糍。師云。探竿影草。無著云。和尚放某甲過。却與和尚道。師云。興波作浪。大慧云。我放你過。師云。騎賊馬趕賊。無著云。某甲也放和尚過。師云。賊在賊在。大慧云。油糍響。師云。窮教到底。無著便喝。師云。鯨吞海水盡。露出珊瑚枝。

浴佛上堂。舉藥山浴佛次。問遵布衲云。只浴得者箇。不浴得那箇。遵云。把將那箇來。山休去。

師云。藥山休去。直得三十二相。八十種好。一時現前。然雖如是。也好與一杓。

上堂。舉演祖云。夫為善知識者。驅耕夫之牛。奪飢人之食。驅耕夫之牛。令他苗稼滋盛。奪飢人之食。令他永絕飢虐。

松源師翁云。雖然逼到萬仞崖頭。放身捨命。須是你當人。自肯始得。既是驅耕奪食。如何得苗稼滋盛。永絕飢虐。

師云。松源恁麼道。大似計窮力盡。將諸人作死馬醫。殊不知。長空雨散雲收後。一段風光屬當家。

上堂。虎丘家風。內空外空。十分富貴。十分貧窮。有時揚聲止響。有時詐啞佯聾。猶是平常小脫空。且如何是大脫空。良久云。六耳不同謀。

上堂。閏月十五。風生庭戶。三十二大人相。啾啾唧唧。餓吵窮煎。千百億隨類身。去去來來。朝朝暮暮。牛溲馬溲。十倍增光。明月夜光。分文不直。井樓上轆轤。幸自轉轆轤地。路傍試劔石。分身兩處看。有恁麼會。滴水難消。

雲谷藏主至上堂。山僧四十年前。收得時新一物。而今道伴相訪。只得拈出。且道是什麼物。青山門外白雲飛。楊柳溪邊引客歸。莫恠坐來頻勸酒。自從別後見君稀。咦。

上堂。三條椽下。七尺單前。瀕瀕洞洞底。而不知有寂寂寥寥。寂寂寥寥底。而不知有瀕瀕洞洞。忽若靜鬧兩忘。是非不及一句。試道看。

蓋法堂上堂。大慈悲為室。諸法空為座。三世諸佛。共盡法界眾生。同居此室。同處此座。各務本事。轉大法輪。只如玉泉仰面數屋角。德山背身著草鞋。又作麼生。老矣難禁風雨夕。聊將片瓦為遮頭。

上堂。千說萬說。不若親面一見。高聲召大眾。眾舉首。乃云。有眼無耳朵。六月火邊坐。

淳祐丙午。八月初一日。在寺受靈隱請。拈勅黃。示眾云。諸人還知麼。黃金殿上輕招手。佛地位人齊點頭。今日落在微僧手中。却請對眾說破。

陞座拈香云。此一瓣香。恭為今上皇帝。祝延 聖壽。萬歲萬歲萬萬歲。就座問答畢。乃云。此段風光。無在不在。天地以之覆載。日月以之照臨。佛祖以之流慈。君王以之敷化。故我聖天子。皇圖丕闡。睿澤滂流。山林枯槁之餘。亦預沾濡之數。誤蒙 聖恩。補靈山虛席。自慚衰朽。豈堪是任。因思瞎堂叔祖。松源師翁。皆自此山。而遷彼處。方四十年。今微僧得踵前躅。一門三世。如斯際遇。豈偶然哉。此生他生。何以云報。舉拂子召大眾云。誓傳西祖不傳旨。仰祝南山億萬春。復舉太宗皇帝問僧。甚處來。僧云廬山臥雲庵。帝曰。臥雲深處不朝天。因甚到此。僧無語。雪竇代云。難逃至化。

新靈隱。快便難逢。別一轉語。臥雲深處不朝天。因甚到此。只奏云。今日親奉 天顏。便下座。

辭眾上堂。勅書來自九重天。寶墨琳琅色尚鮮。移取崑間枯樹子。和根植向鷲峰巔。須知心自無心。豈墮去來之轍。境不自境。那形彼此之端。海湧峰飛來峰。携手同歸。生公臺韜光庵。交肩共語。正恁麼時。還著得別之一字也無。拍禪床一下云。珍重雲山。不勝戀戀。

住臨安府景德靈隱禪寺語錄

侍者 仁安 應儼 等編

入院。指三門。外息諸緣。心行無路。入得無門之門。猶較昔日三步。喝一喝。靈蹤不在猿啼處。

佛殿。以香指佛云。者老子。有彌天之過。累及平人。卒無了日。我儂雖不入你保社。以不平報不平。放過又爭得。便插香。

拈 勅黃。髻中珠。只者是。如優曇花時一現爾。顧視左右云。要知端的麼。坐斷意根。方能側耳。

拈疏。雲興泉湧。玉轉珠回。且道。是隨波逐浪句。是截斷眾流句。試請辨看。

拈松源和尚衣。大庾嶺頭。黃梅夜半。爭之不足。讓之有餘。而今公案見成。不免將錯就錯。捧起衣云。敢問此衣。白雲傳來。松源留下。明什麼邊事。惱亂春風卒未休。便披衣。

松源和尚。住靈隱日。欲付此衣。垂三轉語。而無契者。遂留塔所。囑云。三十年後。有我子孫。來住此山。當以此衣付之。守塔小師。宗禮藏主。付衣。後一日云。衣有所付。吾見先師無愧矣。遂書偈而化。

陞座拈香。此一瓣香。恭為今上皇帝。祝延 聖壽。萬歲萬歲萬萬歲。皇帝陛下。恭願。金輪統御。華藏十三重世界。盡入提封。玉葉騰芳。大椿八千歲春秋。永嚴 聖筭。

次拈香云。此一瓣香。奉為 大丞相國公。 樞密相公。 大參相公。 洎 合朝文武百官。增崇祿筭。伏願。高扶舜日。共扇 堯風。舟楫斯民。金湯佛氏。

次拈香云。此一瓣香。奉為 判府安撫詳定尚書。洎合府官僚。資陪祿筭。伏願。高超元凱。下視龔黃。襲千載之雅風。鎖萬邦之春色。

又拈香云。此一瓣香。奉為前住天上雲居。次住紫金峰頂。掩室先師大和尚。用酬法乳之恩。遂就座。

僧問。昔年麻谷訪南泉。振錫三回自遶旋。只聽聲聲言不是。誦訛一句請師宣。師云。公案見成。進云。記得麻谷到章敬。遶禪床三匝。振錫一下。卓然而立。意在於何。師云。針筍不入。進云。章敬云是是。又作麼生。師云。未是好心。進云。又到南泉。遶禪床三匝。振錫一下。卓然而立時如何。師云。胡孫打筋斗。進云。南泉為什麼道不是。師云。徐六擔板。進云。麻谷云。章敬道是。和尚為什麼道不是。南泉云。章敬則是。是汝不是。誦訛在甚處。師云。殺人刀活人劍。進云。又道此是風力所轉。終成敗壞。南泉具什麼眼。師云。老老大大。進云。三十年後。專為流通。師云。不得錯舉。進云。只如今日。開堂祝 聖一句。如何話會。師云。萬年松上一枝藤。僧禮拜 師乃云。教中道。我本無心。有所希求。今大法王寶。自然而至。月上座。豈是有心。今 君王之寶。自天

而下。大眾要識大法王寶麼。左邊擊拂子云。只這是。要識 君王之寶麼。右邊擊拂子云。只者是。靈利漢一見便見。乃知大法王寶。即君王之寶。君王之寶。即大法王寶。所以松源師翁自虎丘。持此寶。登此山。求此人。兩手分付。今三十餘年。成不了公案。山僧亦自虎丘來。又付以法衣為信。若然者。今日不免為他了却。舉拂子云。有心用處還應錯。無意求時却宛然 復舉。本朝太宗皇帝。有僧朝見云。陛下還記得麼。帝曰。甚處相見。僧云。靈山一別。直至如今。帝曰。以何為驗。僧無語。師云。太宗高垂天鑿。一拶當機。者僧淵默雷聲。所供是實。雖然如是。未能坐斷天下人舌頭。微僧今日借水獻花去也。靈山一別直至如今。以何為驗。遂起身鞠躬叉手云。即日恭惟。聖躬萬歲。

當晚小參。心同虛空界。示等虛空法。證得虛空時。無是無非法。為甚却道。古交如精金。百煉色不回。今交如暴流。倏忽生塵埃。禪月大師。只見錐頭利。不見鑿頭方。且如山僧。去春與諸公相別。今復際遇。可謂一會靈山猶儼然也。若非松柏歲寒之操。精金不變之交。安能如是。豈不見。臨濟示眾云。我欲建立黃蘗宗旨。誰為我成禱。時普化克符二人。出問訊下去。次日上問。昨日和尚道什麼。濟便打。二人便禮拜。阿刺刺。臨濟恁麼建立。二人恁麼成禱。也大遠在。山僧無一法可建立。却要諸人大家成禱。且道成禱箇什麼。八月秋何處熱 復舉楊岐再參慈明。便問。幽鳥語喃喃。辭雲入亂峰時如何。明云。我行荒草裏。子又入深村。岐云。官不容針。更借一問。明便喝。岐云。好喝。明又喝。岐亦喝。慈明連下兩喝。岐便禮拜。

師云。一人跨三脚驢。一人騎三角虎。三家村裏交肩。萬仞崖頭移步。雖然。漆桶相揩。爭柰二俱話墮。喝。

謝新舊兩班上堂。泛鐵船下滄海甚易。拈燈籠掛露柱即難。以其難者。土曠人稀。相逢者少。以其易者。前梢後柂。皆得其人。且道。行看東南。坐觀西北。又作麼生。以主丈。卓一下云。眾眼難瞞。

上堂。於三七日中。思惟如是事。阿呵呵。者老漢敗闕了也。還有人點檢得出麼。若點檢得出。不妨白日青天。其忽未然。切忌開眼作夢。

上堂。一言道盡。滴水難消。千眼頓開。墮坑落漚。臨危不悚。未見其人。既去復來。置而莫錄。降茲已往。宜善知非。如更云云。利劍不斬。更有一人響。且居門外。拍禪床下座。

上堂。昨夜三更。文殊跨五臺。普賢騎峨嵋。登天台入南嶽。與羅浮支提共會。在你諸人眼裏耳裏。話東家杓柄短長。西家鍋子大

小。只見諸人紙被蒙頭。都不采覽。依舊各自散去。驀拈主丈卓一下云。自覺年來身老大。各宜安分過殘生。

上堂云。龍吟霧擁。虎嘯風生。正落今時。家常茶鉢。妙峰孤頂。因甚七日不逢。擬心追求。已在他山之上。且道過在什麼處。拈主丈。卓一下。下座。

上堂。舉僧問雪竇。如何是雪竇正主。雪竇云。何不問雪竇山中人。僧云。恁麼則把定乾坤去也。雪竇云。出門惟恐不先到。當路有誰長待來。

師云。問處有准的。答不負來機。召大眾云。還見雪竇正主麼。青山對面少人識。徒看白雲空卷舒。

天基節上堂。微僧陞此寶座。以虚空為口。萬象為舌。講一遍仁王壽量品。又恐上下天竺講師。聽得將謂攙行奪市。不免且解箇題目。以拂子。擊禪床云。一彈少室無私曲。盡是千秋萬歲聲。

元正上堂。新年頭佛法。鏡清道有。明教道無。二俱失利。須是決之於拄杖子始得。遂拈拄杖云。新年頭佛法是有耶。拄杖子不答。是無耶。拄杖子亦不答。有無新舊。一時拈却時如何。卓拄杖一下云。巡堂喫茶。

上堂。簇簇上來。却之不回。簇簇下去。留之不住。於斯立片時。瞬目不揚眉。且如何是百丈下堂句。有甚近傍處。

上堂。橫按拄杖。召大眾云。莫有透得者裏過底麼。朝三千暮八百。翻手雲覆手雨。若透未過。今不是古。古不是今。試[跳-兆+孛]跳看。卓拄杖一下。

掩室和尚忌拈香。巴陵三轉語。南源女人拜。人貧智短。馬瘦毛長。靈鷲峰頭一炷香。

上堂。二僧卷簾。一得一失。兩堂下喝。賓主歷然。畢竟誰是主誰是賓。那箇得那箇失。良久云。野老從教不展眉。且圖家國立雄基。

上堂。舉黃魯直太史。參晦堂。晦堂請魯直。講二三子以我為隱乎。吾無隱乎爾。不契。及遊山。聞木犀香。却問魯直云。還聞麼。魯直云。聞。堂云。吾無隱乎爾。魯直忽然契悟。

師頌云。渠儂家住白雲鄉。南北東西路渺茫。幾度欲歸歸未得。忽聞巖桂送幽香。

上堂。眼中物。物中眼。雪峰輓三箇毬。睦州擔一片板。恁麼會去。無事不辦。便下座。

上堂。大僊心。休莽鹵。三十三。錯分付。細推窮在何處。只知昨日雨今日晴。而不知今日晴昨日雨。靈雲陌上桃花飛。翻憶玄沙未徹語。

謝秉拂斡齋上堂。法不可說。離語言文字故。法不可求。離見聞覺知故。昨夜兩堂首座。不可說而說。汝等諸人。不可求而求。是以四事供養。爭敢辭勞。萬兩黃金。亦合消得。山僧恁麼道。莫有兩指夾鼻者麼。自云。誰敢。

承天和尚遺書至上堂。設有一法過於此者。我亦見之。如夢如幻。是故短蓬和尚。覺斯夢境。因之為出沒之場。知彼空花。因之為修習玩具。末後一句。坐斷千差。還知落處麼。尊貴位中留不住。肯為林下守株人。

上堂。秋風襲衣。兄弟東去西去。山僧有一轉語。舉似相送。第一不得錯聽。第二不得錯會。第三逢人不得錯舉。三處無過。猶是謗老僧。莫有免得底麼。拈拄杖卓一下。

松源和尚忌拈香。未見此老人已前。上是天下是地。既見此老人之後。山是山水是水。一別五十年。恩怨通身是。恩則且置。怨箇什麼。沒量大人。擡脚不起。累了兒兮累了孫。惱亂春風何日已。

上堂。常在途中久不歸。可怜庭戶草離離。青山門外忽相見。問著剛然道不知。且道知而道不知。不知而道不知。這裏有三十棒。若也未分。山僧自領。

上堂。舉僧問多福。如何是多福一叢竹。福云。一莖兩莖斜。僧云。學人不會。福云。三莖四莖曲。

師頌云。此君面目甚分明。曲曲斜斜是幾莖。但得一回親見後。不隨風雨聽虓聲。

上堂。日月照臨不到。天地覆載不著。劫火壞處彼常安。萬法泯時全體現。隨流不變。鬧處常寧。一道恩光。阿誰無分。古人以此為事貫帶。事既如此。理作麼生。古人瞞山僧不得。山僧也瞞諸人不得。向官不容針處。道將一句來。便下座。

上堂。作麼生。是什麼。獅子當門。猛虎據坐。千人萬人。一箇半箇。石火電光中。掣斷黃金鎖。擬議依然還蹉過。

送故舊歸古渝上堂。山蒼蒼。水茫茫。直下是。非相當。整三玄戈甲。淬三要鋒鋌。舉意非他物。回眸即故鄉。好將馬祖舊遊地。題作渝州選佛場。

謝秉拂冬齋上堂。舉天親菩薩。升兜率內宮。謁慈氏。聞一座說法回。已經三年。無著問云。內宮慈氏。說什麼法。天親云。只說這箇法。惟是梵音清雅。令人樂聞。

師云。宛爾不同。昨夜首座說底。豈不是者箇法耶。都寺設供。豈不是這箇法耶。忽有人問。者箇是什麼法。只向道。藕絲孔裏騎大鵬。等閑挨落天邊月。

上堂。一九二九。相逢不出手。今冬和氣可人。山僧出手。與諸人相見去也。若合掌太僧生。若叉手太俗生。畢竟作麼生相見。以手

點空三下云。一二三。

鑄鍋上堂。若論此事。如大冶烹金。鼓扇烈火。千煅萬煉。去盡頑鑛。純是真金。然後入範模。鑄成大器。豈不見。百丈再參。被馬祖震威一喝。三日耳聾。黃蘗聞之。不覺吐舌。當恁麼時。不喚作大爐鞴鑄成。則不可。若喚作大爐鞴鑄成。則壓良為賤。然雖如是。即今莫有不受烹煨底麼。喝一喝。下座。

上堂。雲門一曲。臘月二十五。驚起陝府鐵牛。撞倒石霜角虎。時節既相當。因緣難莽鹵。莫有善酬唱底麼。拈拂子云。山僧自歌自唱去也。以拂子擊禪床。下座。

上堂。古人用底今人用。今人為底古人為。但一處譎訛。不是川僧咬蛇定。被浙僧扛鼓。我且問你。譎訛在古人分上。在今人分上。相見無言情意足。不愁別後見君稀。

元宵上堂。盡大地是諸人自己。總萬象是自己光明。因什麼動轉施為。撈天摸地。山僧今日。因齋慶讚。點盞孤燈。助發光明去也。南高峰對北高峰。

上堂。臨濟道。我有時奪人不奪境。有時奪境不奪人。此為中下之機。若遇上上人來。人境俱奪。人境俱不奪。全體作用。只如中下之機。與上上根全到。又如何相見。良久云。如王秉劔由王意。似鏡當臺要絕觀。

謝練塘和尚上堂。德山入門便棒。徹底老婆心。臨濟入門便喝。慈悲成古倒。靈隱門下。又作麼生。玉笛一吹雲外曲。知音知後更誰知。

上堂。舉僧問洞山。寒暑到來。如何回避。山云。何不向無寒暑處回避。僧云。如何是無寒暑處。山云。寒時寒殺闍黎。熱時熱殺闍黎。

師云。洞山門下。正偏五位。回互旁通。正位雖正却偏。偏位雖偏却正。畢竟如何是無寒暑處。喝一喝云。莫瞌睡。

上堂。是日前機。非目前法。有時放兩拋三。有時斬釘截鐵。只如古人道。登於九仞之上。吾亦與之俱。困於九淵之下。吾亦與之俱。明什麼邊事。良久云。不惟荒草裏。又更入深村。

謝後堂首座上堂。舉趙州會下。二僧相推。不肯作第一座。院主白州。州云。總教伊作第二座。主云。教誰作第一座。州云。裝香著。院主裝香了。州云。戒香定香慧香。

師云。趙州老人尋常道。諸方難見易識。我者裏易見難識。點檢將來。也是和麩糶麵。當時待他道裝香著。只向他道。正是第二座。還有不甘底麼。

青苗上堂。舉東山和尚云。山前一片閑田地。叉手叮嚀問祖翁。幾度賣來還自買。為憐松竹引清風。靈源和尚。下箇註脚云。理得山

前地。安閑即祖翁。乾坤無外界。松竹有清風。

師云。二大老。只知松竹清風之樂。而不知稼穡之艱難。山僧效顰去也。人人有一坐具地。占斷猶來自祖翁。四界打量量不盡。及時耕種待秋風。

上堂。峭峻門庭。平白道路。擔板睦州。面壁魯祖。不問南來北來。東去西去。須信長年不出戶。

上堂。纔有是非。紛然失心。汝等諸人。開眼則心念紛飛。閉眼則夢魂擾擾。且如何免得。良久云。無端無端。

上堂。坐在千聖頂頭行。在三途底裏。不涉萬緣。不守自己。直饒與麼不與麼。猶是玄沙道底。

上堂。舉王常侍訪臨濟。同至僧堂前。常侍云。者一堂僧。還看經麼。濟云。不看經。侍云。還坐禪麼。濟云。不坐禪。常侍云。畢竟教伊作什麼。濟云。總教伊成佛作祖。侍云。金屑雖貴。落眼成翳。濟云。將謂是箇俗漢。

師云。門內有君子。門外君子至。常侍現宰官身。與臨濟激揚此事。即不無。點檢將來。猶欠一著。且道在常侍分上。臨濟分上。具眼者。試點檢看。

上堂。摩竭掩室。分明戴角擎頭。毗耶杜詞。豈是卷旗收陣。清機歷掌。明鏡當臺。一句作麼生。赤脚踏霜雪。方知徹骨寒。

上堂。袖頭打領。腋下剗襟。皆是尋常裁剪。只如放下剪刀曲尺。又向甚處摸索。良久云。南山雲起北山雲。

上堂。昨夜冷泉亭。會前後諸亭來謁見。山堂以風和日暖。跨東西澗。昇南北峰。觀海門之潮。掬西湖之月。忽聽三更三點。不覺懨懨而散。為甚如此。迴而更相涉。不爾依位住。

上堂。舉東山演祖。一日上堂。作手勢云。闔弄闔弄。是什麼。自云。雷乃發聲。

師云。東山恁麼道。也是春行夏令。

佛涅槃上堂。若以色見我。以音聲求我。是人行邪道。末後以手摩胸。告眾云。汝善觀吾紫磨金色之身。今日即有。明日即無。者老子。兩處露影。一處橫身。且道前頭底是。後頭底是。

上堂。春山青春水綠。獨立危亭看不足。李花白桃花紅。一色同中又不同。知音惟有寒山子。拊掌歌笑臨春風。

上堂。閏二月十有五。靈山有語今分付。心洞十方。通今貫古。途路未歸人。朝朝復暮暮。不醉桃花村。定入杏花塢。何如相喚復相呼。飛來峰下喫茶去。

上堂。舉大愚和尚云。大家相聚喫莖蠶。喚作莖蠶。入地獄如箭射。

師云。既是喫莖蠶。為什麼。不喚作一莖蠶。這裏東咬西嚼。忽然咬著。入地獄如箭射。

上堂。大眾。堂堂相貌。鼻直眼橫。喚什麼。作無形段金剛大士。飢飡渴飲。困臥健行。又喚什麼。作無位真人。眾中有箇出來道。長老且莫放憨。只向道。明日不得普請。

上堂。不貪香餌味。可謂碧潭龍。舉拂子云。莫有躍浪衝波。呈頭角底麼。

上堂。舉大通智勝佛。十劫坐道場。佛法不現前。不得成佛道。師頌云。修行作佛人無數。捏目無非是亂花。十劫坐來還懨懨。不圖打草要驚蛇。

上堂。恁麼恁麼。鼻直眼橫。不恁麼不恁麼。三頭八臂。恁麼也得。不恁麼也得。鈍鳥棲蘆。困魚止灤。恁麼也不得。不恁麼也不得。若教頻下淚。滄海也須乾。

上堂。拈拄杖示眾云。靈山布一箇漫天網子。道得道不得。總在這裏。只如羅籠不住。呼喚不回底。又作麼生。卓一下云。一網打就。

上堂。重關未關。百匝千重。萬戶俱開。七穿八穴。只如萬戶未開時如何。良久云。將謂山河俱隔礙。往來只在一微塵。

因雪上堂。六載青山。少林半夜。住明白裏。不在明白裏。示一色邊。不滯一色邊。塞壑填溝。普天匝地。只如片片不落別處。龐翁便掌。又作麼生。夜深各自知寒冷。莫待齊腰三尺深。

上堂。舉滄山侍立百丈。夜深。丈云。看爐中。有火也無。滄山云。無。百丈自去。深深撥得少火。夾起云。你道無。者箇[妳-女+口]。次日遊山次。丈云。將得火來麼。山云。將得來。遂拾一枝柴。吹兩吹。度與百丈。丈云。如虫禦木。

師云。滄山老人。自別靈山之後。三為國王。打失話頭了也。却向者裏。錯認定盤星。轉見沒交涉。今日開爐。火種有無。不免自家點檢。遂舉拂子吹云。偶爾成文時節至。且非依樣畫葫蘆。

謝後堂并化主上堂。分第二座於兜率內宮。公案見在。取一鉢鉢於香積世界。清規宛然。眾目所觀。若為證據。良久云。月色靜中見。泉聲幽處聞。

上堂。一非一。二非二。仰面不見天。低頭不見地。恁麼說話。澀[泳-永+盾]中有些分曉。一即一。二即二。仰面見青天。低頭亦見地。恁麼說話。分曉中有些澀[泳-永+盾]。大眾且道。澀[泳-永+盾]底是。分曉底是。良久云。收歸上科。

淳祐十年。六月廿一日。在寺受徑山請。捧勅黃。謝恩畢。上堂云。旃檀林裏老檀樹。飽閱風霜不記春。自謂摧頽已無用。又霑雨露一番新。

辭眾上堂。緣會此山。前後七載。荷諸道舊。相共扶持。粗成保社。會聚巾鉢。實倍於前。如幻機緣。幸成于後。雲樓峭峙。月殿峩峩。二塔鼎新。五亭復舊。藏典缺而再備。像設壞而重新。是皆有所自來。山懷豈忘知感。自愧老不知止。復有雙徑之行。不容回互者。

天子之命也。今則庚暑正熾。專使促行。不免與合山尊眾。湖海禪流。暫爾相別。各宜護持。初無離合之殊。豈有去來之相。復云。雲樓月殿瑠璃地。無住無依一片心。莫謂相逢又相別。他年再見只如今。

臨安府徑山興聖萬壽禪寺語錄

侍者 永珍 祖森 等編

入院。據方丈。與麼來者。以左手拍禪床云。過者邊立。不與麼來者。以右手拍禪床云。過者邊立。與麼不與麼。又作麼生。花須連夜發。莫待曉風吹。

陞座。拈香。祝聖罷。遂就座。

僧問。鶴書來自九重天。象駕崢嶸別冷泉。雙徑烟雲俱改觀。請師一句祝堯年。正與麼時。願聞法要。師云。帝與九齡夢。嵩呼萬歲聲。進云。記得僧問百丈。如何是奇特事。丈云。獨坐大雄峰。此意如何。師云。誰敢斫額。進云。者僧便禮拜。又作麼生。師云。也好膽大。進云。百丈便打。此僧還甘也無。師云。放過不可。進云。古人且置。今日若有人。問如何是奇特事。和尚作麼生對。師云。你莫要捋虎鬚麼。僧禮拜。師云。放你三十棒。

師乃舉拂子。示眾云。我此法印。為欲利益世間故說。山僧行脚五十年。住持三十載。未嘗動著。今日既到凌霄頂[寧*頁]。雙徑禪林。與諸人把手同歸。正在此日。以拂子擊禪床云。諸人如是見。如是知。如是信解。如是護持。則山僧入院。一場佛事。功不浪施。堪報不報之恩。以助無為之化。又擊拂子云。且置是事。

復舉。佛照和尚。住此山日。孝宗皇帝詔問。世尊入山。修道。六年而成。所成者何事。佛照奏云。將為陛下忘却。師云。孝宗倒腹傾腸。金湯佛氏。佛照抱頭撮脚。覲面當機。則不無。畢竟所成者何事。從前汗馬無人識。只要重論盖代功。

上堂。召大眾云。山僧自靈隱來登此山。得與諸人相見。一無所有。只提得一瓶東西礪水。數片南北山雲。今日拈來。平等供養。或有箇道。甚處青山無此物。何須特地當人情。只向道。莫恠輕微。久立。

上堂。我有一語。在在處處。提起分開。放下捏聚。兩手持來。一手分付。江西曾有言。拍禪床云。以此箇為主。

上堂。舉馬祖。一日令智藏。馳書上徑山。山接書開見。一圓相。乃於中下一點。封回。國師聞得乃云。欽師猶被馬師惑。後來雪竇云。雪竇見處。也要諸人共知。祇者馬師。當時畫出。早自惑也。師云。江西清平世界。輕動干戈。徑山。行陣久經。不勞餘力。南陽。忍俊不禁。也入一分。雪竇。一代拈提宗師。到者裏。却作初行脚時語。也是杭州紙貴。

謝兩班上堂。觀音大士。一身有八萬四千。母陀羅臂。美則美矣。若做箇偏衫子。向甚處著許多袖口。爭似徑山自有眾務。各出隻手。自然無事不辦。雖然富嫌千口少。

謝監收上堂。八月初一。好箇消息。積雨報初晴。新涼生八極。禾稻滿田疇。催人早收拾。一顆顆一粒粒。宜愛惜。莫教遍地成狼籍。直待去年今年。官租私租。一時還畢。不妨一飽忘百飢。鼓腹謳歌度殘日。且道歌作麼生謳。快活快活。

山鄉歸上堂。一月相拋不出門。幾經花縣幾烟村。桑麻影裏炊香早。松竹陰中笑語溫。幽磬朝離迎白日。疎鍾晚泊送黃昏。捲旗收陣歸來也。誰是知恩與報恩。

上堂。十月十有五。敗葉堆雲。寒風推戶。明窗下東司頭。東行西行。總是提持處。參玄人須記取。古人有言兮。百歲光陰。切莫虛度。

浴佛上堂。黃面老爺。自法界藏身。流出正體智。從正體智。流出後得智。從後得智。流出大悲心。上從兜率下降閻浮。如河如漢。如山如丘。入生死海。逆生死流。以法為城。以慈為舟。惺惺寂寂。優優悠悠。半合半開。雙放雙收。被人喚作麻三斤。乾屎橛。西天老比丘。或折他殿宇。或一棒打殺。可謂恩大難酬。多事皆因強出頭。今日誕辰。不肖孫。間說偈言。空手把鋤頭。步行騎水牛。人從橋上過。橋流水不流。動地清風來未休。咄。下座佛殿別聽因由。

端午上堂。月五日亦五。那堪時正午。採藥藥最靈。問疾疾即愈。因思七佛師。曾被善財悞。信手拈來。瞞瞞盱盱。隨手發去。莽莽鹵鹵。何如審脉察色。細切濃煎。使其一服。通身冷汗如雨。自然佛病祖病法身病。眾生顛倒病。都無棲泊處。不然。被李胡子張道婆。呪土書符。未免欺汝。山僧別有一方。普施大眾。令一箇箇。安樂而去。卓拄杖一下。咄。

舉乾峰示眾云。舉一不得舉二。放過一著。落在第二。雲門出眾云。昨日有人。從天台來。却往徑山去。

師云。乾峰舉話。雲門著語。不是覲面之機。亦非隔身之句。檢點將來。只解同生。不能同死。千載之下。莫有同生同死底麼。試出頭看。

啟建天基節上堂。(時拜左右相)賢明宰輔聖明君。好語山中喜得聞。願飲淳風餐至化。五香敬作一爐焚。

元正上堂。拈拄杖云。拄杖子我且問你。如何是新年頭佛法。卓拄杖一下。此外別有奇特事也無。卓一下。春煦發生無硬地。假饒鐵樹也開花。又卓一下。

滿散聖節。清淨慈門剎塵數。共生如來一妙相。以大願力出世間。示梵玉身宣正法。三十六旬有六日。惟有此日最吉祥。稽首慇懃一瓣香。萬歲千秋為壽考。掩室和尚忌燒香。聞名於紫雲之前。渾家富貴。識面於甌峰之後。徹骨貧窮。只知驅耕奪飢。未許移厨換竈。一回飲水。積恨填膺。如斯漏洩家私。何啻減師半德。便插香。

上堂。三十年來尋劍客。甚生氣宇。幾回葉落又抽枝。訝郎當漢。自從一見桃花後。作麼生。直至如今更不疑。可惜坐在者裏。我此一會七百餘眾。心憤憤口悱悱。還有見此不平者麼。拍禪床一下云。各自頂省看。御書傳衣石谿四大字至。上堂。宸奎飛下九重天。鳳舞鸞翔墨色鮮。水石山雲最佳處。慇懃一炷玉爐烟。

上堂。祖師道。山上有鯉魚。井底有蓬塵。須信千年桃李核。依然仁是舊時仁。豎拂子云。大眾何似生。便下座。

上堂。舉拂子云。敲空作響。以拂子擊空云。阿爺爺。阿爺爺。擊木無聲。又擊禪床云。喚什麼作聲。便恁麼去。猶較生公半月程。明堂大禮。天使降香祈晴。陞座。祝香。所冀明堂大禮天色晴霽者。伏願。性空智日。佼舜日以長明。覺地慈風。仰皇風而永扇。乃就座。

有僧出問。諸佛說不到處說一句。句句朝宗。諸佛行不到處行一步。步步踏著。且如何是諸佛說不到處底一句。師云。文彩已彰。進云。如何是諸佛行不到處底一步。師云。清風匝地。進云。記得僧問福昌和尚。金烏未出時如何。昌云。眾人皆仰望。其意如何。師云。好箇話頭。進云。出後如何。福昌云。萬國盡觀光。又作麼生。師云。公案見在。進云。正恁麼時。如何祝贊。師云。願將清淨教。長奉聖明君。僧禮拜。

師乃云。舉花微笑。單傳見性之宗。面壁忘言。直指安心之要。當機分付。豈涉思惟。覲面承當。不容擬議。是以一人應運。千佛同源。如優曇花。時一出現。塵塵顯瑞。剎剎斂氛。譬如東方日輪騰空。清淨光明。無幽不燭。凡在區宇。悉荷照臨。皆由一念感通。自然萬善同會。正當恁麼時如何。舉目碧空淨如洗。金烏飛上玉欄

干。輒有一頌。尊臨四海聖明君。步步毗盧頂上行。自己法身只者是。巍然千古振佳聲。

上堂。入理深談。古人說了也。門庭施設。古人用了也。鳥道玄路。古人行了也。針筒線袋。古人棄了也。且道今日又作麼生。釣竿斫盡重栽竹。但得金鱗心便休。

上堂。佛法世法。拈向一邊。祖意教意。靠在一壁。只如久雨不晴。畢竟衲僧皮革。向甚處晒眼。以拂子指云。嗚那裏。

結制上堂。五峰對峙。雙徑迂盤。去王舍城。甫近百里。有大叢林。海上第一。水雲萬指。走使千人。以寶祐改元。四月既望。遵靈山舊典。同此安居。息念熏修。克期取證。眾中忽有箇不墮眾數底。出來撫掌呵呵大笑。又且如何理論。喝一喝。只恐不是玉。是玉也大奇。

中夏上堂。大眾。九十日克期取證。今已中夏。前四十五日。昨日已去。後四十五日。今日方來。諸兄弟。於其間。所修所證。所得所悟底。是有是無。是正因是邪解。出來併却咽喉唇吻。道一句。離却見聞覺知。發一機。道一句。使天回地轉。發一機。使鬼哭神號。山僧要知。免得背地裏埋冤。有一夏空過之嘆。良久云。有麼。不許夜行。投明須到。

上堂。舉崔相國。問國一祖師云。某甲欲出家參禪。得否。祖師云。出家乃大丈夫事。非將相之所能為。

師云。發千鈞之弩。用七札之箭。國一祖師。又似倚勢欺人。猶幸崔相國。度量恢洪。談笑自若。後二百年。石門舉似李都尉。尉不覺中此毒。乃作頌曰。參禪須是鐵漢。著手心頭便判。直趣無上菩提。一切是非莫管。徑山今日不免土上加泥去也。自家冷暖自家知。莫管他人是與非。說未到時行得到。無端辜負兩莖眉。

上堂。舉密庵和尚示眾。拈拄杖云。迷時只迷者箇。卓一下。悟時只悟者箇。迷悟兩忘。糞掃堆頭。重添塹[土*(天/非)]。

師云。密菴老人。年老心孤。不覺泥裏水裏。引得後代兒孫。說迷說悟。末後雖然救得一半。猶在門外。

上堂。涅槃心。差別智。一非一。二非二。自古諸上賢。曾未達斯理。舉拂子云。直饒恁麼會得。也是烏龜行陸地。擊禪床。下座。

上堂。然燈之前。六六三十六。然燈之後。九九八十一。數目甚分明。因甚數不出。數得出。弄到彌勒下生。依舊杳無消息。遂舉拂子云。者箇響。

水鄉歸上堂。溪山送別出門日。雲水相迎得路時。七佛軌儀持鉢去。滿船載得月明歸。

上堂。車麟麟馬蕭蕭。行人弓箭各在腰。正與麼。龍驤虎踞。霧擁雲屯。選甚偃月長蛇。管取百戰百勝。安南拱手。塞北歸降。且如

何。說箇功成豎賞一句。清風生五竺。杲日麗真丹。

日本僧。馳本國丞相問道書至。上堂。五髻峰頭望海東。煙重重又水重重。同人相見論心事。又得西來一信通。且道西來意。作麼生通。拈拄杖。卓一下。

上堂。舉南陽國師。三喚侍者。侍者三應。師云。有是父有是子。國師云。將謂吾辜負汝。却是汝辜負吾。師云。如在靈山。親聞此語。雪竇云。國師三喚。點即不到。師云。雲生嶺上。侍者三應。到即不點。師云。月轉波心。將謂吾辜負汝。却是汝辜負吾。謾雪竇一點不得。師云。試道看。雲門云。作麼生是國師辜負侍者處。會得也是無端。師云。結舌有分。雪竇云。元來不會。師云。來也來也。門云。作麼生是侍者辜負國師處。粉骨碎身未足酬。師云。又與麼去。雪竇云。無端無端。師云。步步追隨。投子云。抑逼人作麼。師云。低聲低聲。雪竇云。垛根漢。師云。看脚下。興化云。一盲引眾盲。師云。以己妨人。雪竇云。端的瞎。師云。利動君子。法眼云。且去別時來。師云。敗也敗也。雪竇云。瞞我不得。師云。被瞞了也。玄沙云。却是侍者會。師云。那裏是會處。雪竇云。停囚長智。師云。隨邪逐惡。趙州云。如人暗中書字。字雖不成。文彩已彰。師云。路轉深村。雪竇便喝。師云。好一喝。有人問雪竇。雪竇便打。師云。猶較些子。復云。山遙海闊。月白風清。一曲沒絃琴。幾人相共賞。山僧把不定。山邊水際打一遭。滿眼滿耳。總是希聲。要窮端的麼。年老心孤德不孤。平常三諾對三呼。聲前將謂吾辜汝。句後那知汝負吾。會也無。斯文不在者之乎。

佛海禪師號至。謝恩上堂。祝聖罷乃云。道出常情。禪超數量。禪超數量。作麼生參。道出常情。作麼生學。語默不及處。文彩未彰時。便領略得去。如天普蓋。似地普擎。如雨露之滋霑。如日月之照燭。九州四海。悉稟威靈。草木虫魚。咸承恩力。臣僧生緣西蜀。學慕南宗。八十年渴飲飢食。一萬里瞻風撥草。濫叨巨剎。皆荷國恩。自惟林間枯槁之餘。獲被天上徽猷之號。如斯際遇。實謂希逢。只如知恩報恩一句。又作麼生道。天高群象正。海闊百川朝。

復舉太宗皇帝。因僧朝見。僧云。陛下還記得麼。帝曰。甚處相見。僧云。靈山一別。直至如今。帝曰。以何為驗。僧默然。輒伸一頌。靈山一別二千年。聖世重逢豈偶然。細掬清泉揩老眼。豁開雲霧見青天。

上堂。寶劍出匣。孰敢當鋒。聖箭離弦。誰堪嚙鏃。機先坐斷。不妨水滴冰生。句下承當。未免灰飛火亂。以平報不平者。豈無一箇半箇。以不平報不平者。直是罕逢。撫禪床云。幾擬黃金鑄子期。

上堂。明頭來。咄。暗頭來。咄。四方八面來。咄咄咄。總不與麼
來時如何。頭枕天台。腳踏南嶽。

上堂。雲漫漫。水漫漫。往來一致。高下同觀。炊無米飯。飽不來
人。甚易。喫粥了也。洗鉢盂去。還難。難難。冬不寒臘後看。

石溪和尚語錄卷上

石溪和尚語錄卷中

秉拂

清涼冬節秉拂

鷲嶺未曾拈花。少林何曾面壁。巧盡拙露。法出姦生。黃梅半夜。碓觜開花。南嶽庵前。磨磚成鏡。至於胡揮亂喝。瞎棒盲枷。點檢將來。大似隔靴抓痒。一錯百錯。錯到如今。一家不管一家。新官不理舊事。況我清涼門下。雲深火冷。水滴冰生。從來紙撚無油。秤鎚純是生鐵。無提掇處。迥不通風。只與麼放去也。跛跛挈挈。百醜千拙。収來也。拳拳攣攣。如癡如聾。山重重水重重。煙濛濛雨濛濛。自南自北。自西自東。風從虎兮雲從龍。又誰管你深三尺闊三尺。今年冬去年冬。冬至寒食一百五。精金火裏看通紅。喝一喝。

舉僧問香林。如何是室內一盞燈。林云。三人證龜成鱉。頌云。室內孤燈只自知。人流須辨截流機。遼天一鏃三關外。玉兔金烏不敢飛。

焦山冬節秉拂

千佛祕印。列祖玄關。諸方爪牙。衲僧巴鼻。豎起拂子云。總在者裏。喝一喝云。一不得正眼覷著。二不得放過。六耳不同謀。隻手都分付。若也承當得起。擔荷得行。驅將去用將去。直使浮玉山頭。滔天白浪。海門國裏。輓底蓬塵。楊子魂驚。石翁膽仄。以拂子劃一劃云。無端徹底老婆心。擲地金聲如瓦礫。然雖如是。且道。君子道長一句作麼生。良久云。禍不入謹家之門。舉為山問仰山。仲冬嚴寒年年事。晷運推移事若何。仰山進前叉手而立。為山云。情知你答這話不得。香巖云。某甲偏答得這話。為山如前問。香巖亦進前叉手而立。為山云。賴遇寂子不會。頌云。一竿絲線兩金魚。不犯清波意自殊。斜拽簑衣遮盖後。空餘明月滿江湖。

焦山結夏秉拂

觀大海者難為水。遊聖門者難為言。既入海門國。復陞海雲堂。無一滴可助其深。無一言可資其辯。與麼與麼。且圖順水流舟。不與麼不與麼。又見逆風把柁。與麼中不與麼。斷篷推月上楊州。不與

麼中却與麼。等閑撥轉還歸那。截流香象。透網金鱗。還瞞得他。一點也無。若是稍諳水脉底。好於一漚未發已前。乘大願船。張堅密帆。隨清淨流。入無為海。直得九江合派。百谷朝宗。水月齊觀。風雲一致。是謂踞菩薩乘。修寂滅行。九旬之內。功不浪施。子細點檢將來。何異煞瓜棲蘆。困鱗止灤。引得跛脚阿師。手中扇子。忍俊不禁。[跳-兆+亨]跳上三十三天。築著帝釋鼻孔。東海鯉魚打一棒。兩似盆傾。阿呵呵。六十甲子。都亂了也。德雲走過別峰。善財忽移初步。海雲老凍[身*農]。把不定輓在千波萬浪中。眼不見鼻孔。嘿自念言。我住此國。一十有二年。觀察思惟。大海以為境界。幸自可憐生。今日無端一時打失。時有同行木上座。知其底蘊。雖則邪法難扶。只得出來合掌讚善。驀拈拄杖。卓一下云。弄潮須是弄潮人。舉東山云。狗子雖然無佛性。也勝猫兒十萬倍。夜來堂頭云。老東山雖狡獪。點檢將來。元不會。謂言狗子無佛性。何翅勝猫十萬倍。師云。恁麼說話。大似肥處添瘦處減。殊不知。東山老人。慣得其便。

蔣山冬節秉拂

我此法印。如塗毒當軒。吹毛在匣。擬者亡聞者喪。在所游方。未嘗妄通消息。一期狹路相逢。詎可囊藏被盖。良久云。噫。未動舌頭。早被獨龍岡說了也。圓悟關說了也。寶山堂說了也。圓悟關寶山堂則且置。畢竟獨龍岡說箇什麼。莫有聽覽得分明底麼。還是拂子始得。舉拂子云。客從西州來。手持東州信。報道仲冬嚴寒。日南長至。玉泉皓老。一條布裩。直至如今。依舊赫赤赤地。霜天月冷夜更寒。江國春風吹不起。阿呵呵。好箇無孔鐵鎚。便恁麼去。平地上無數。如何過得荊棘林。靈利底。善別端倪。和座子不消輕輕一踏踏翻。東西南北。甚處得來。佛及眾生。總須乞命。然於衲僧門下。遠之遠矣。秉拂上座。恁麼提唱。莫有傍不甘底麼。喝一喝云。泊合停囚長智。舉疎山問雲門。得力句道將來。門云。何不高聲問。山便高聲問。門云。早間曾喫粥麼。山云。如何不喫粥。門云。亂叫喚作麼。夜來堂頭云。大小雲門。向疎山面前。失却一隻眼。秉拂上座。今夜向鷹爪邊。奪兔去也。大小疎山。向雲門面前。失却一隻眼。

蔣山結夏秉拂

聲前一路。千聖莫窺。面門一思。千手莫掩。二千年前。先覺仰之不及。向彷彿處。做箇圈子。呼為圓覺伽藍。大似開眼做夢。使人於中。踞菩薩乘。修寂滅行。也莫壓良為賤好。二千年間。總是隨麩底。西天禁足。東土護生。南洲經行。北洲宴坐。自謂無空闕處。殊不知。正是金屑翳目。還出得他圈子也無。二千年後。列在鍾山堂上。將錯就錯。依樣畫將來。且圖寒山子水牯牛。隨隊於九十日內。渴飲飢食。謹初護末。且與麼過。莫教昏昏。瞌睡時。被鍾聲咬破七條打一番轉。撞倒僧堂。磕碎佛殿。直得盡大地人。眼橫鼻直。一布袋子。盛將去則不無。忽鏡容大士。擘破面皮。呵呵大笑云。好勞勞攘攘一場。依然只在他圈子裏。喝一喝云。寐語作麼。

舉南泉問黃蘗。定慧等學。明見佛性。此理如何。蘗云。十二時中。不依倚一物始得。泉云。莫是長老見處麼。蘗云。不敢。泉云。漿水錢則且置。草鞋錢。教什麼人還。蘗休去。師云。二大老。功高名著。故當議論於朝堂之上。因什麼却作諸生几案間語。泊乎倒轉舌頭。便見風行草偃。黃蘗休去。喚他作陷虎之機。未夢見在。

蔣山解夏秉拂

道得道不得。聖諦廓然還不識。金陵肯再來。九年空面壁。知有不知有。一顆圓珠明已久。擘開老面皮。一場還漏逗。顧視大眾云。要見鏡容碧眼二大老麼。一夏九十日。渴飲飢食。健行困臥。枕天台踏南嶽。揖峨嵋凭五臺。風吹不入。雨洒不著。總不離這裏。因甚麼擡脚不起。喝一喝云。放行了也。天台自天台。南嶽自南嶽。峨嵋自峨嵋。五臺自五臺。溟鵬九萬。遼鶴三千。亦不出這裏。因什麼下脚不得。喝一喝云。總若透得。放過不放過。盡在蔣山手裏。何故。客聽主裁。

舉僧問雲峯。西天以蠟人為驗。此土以何為驗。峰云。鐵彈子。師云。雲峰一彈子。直得五天蠟人。悉皆消殞。苟非渾鋼打就底。也莫羸心好。

靈隱冬節秉拂

靈鷲一峰。面目全露。冷泉滴水。公案現成。有時恁麼。海闊山遙。風清月白。有時不恁麼。波翻浪湧。電擊雷轟。千姿萬態。顯晦隨機。然則多虛不博少實。近見絕勝遠聞。馬師瞬目揚眉。石霜咬牙嚙齒。敲床豎拂。合水和泥。於斯暗合明投。總是暫時岐路。

直須群陰剝一陽生。枯木寒藤。自知冷熱。則且置。只如方丈老人道。德山棒頭低。臨濟喝聲小。意在於何。良久云。手執夜明符。幾箇知天曉。

舉僧問石霜。如何是祖師西來意。霜咬齒示之。僧後問九峰。先師咬齒意作麼生。峰云。寧可截舌。不犯國諱。又問雲蓋。蓋云。我與先師。有甚怨讎。

師云。石霜用處。命若懸絲。不得二子併力扶持。未免一生有屈難雪。

小參

石谿佛海禪師住建康府報恩禪寺小參

侍者 住顯 等編

冬節小參。欲識佛性義。當觀時節因緣。且喚什麼。作佛性義。以何為時節因緣。又作麼生觀。只麼搆得去。晷運推移。何曾動著。陰陽往復。初無間然。所以為山問仰山。仲冬嚴寒年年事。晷運推移事若何。仰山進前叉手。香巖叉手進前。至於左提右挈。暗合明投。略露目前機。且非目前法。應時應節。照古照今。報恩與古人。門戶一同。出入各異。雖然。跛跛挈挈。且無一點虛棄底時節。無一點落地底工夫。長老即是諸人。諸人即是長老。成就夢中佛事。顯揚自己光明。可謂時節既至。其理自彰。苟或不然。山僧辜負諸人多矣。

舉洞山冬夜。與泰首座喫菓子次。乃問。有一物。上拄天。下拄地。黑似漆。常在動用中。動用中収不得。你道過在甚處。首座云。過在動用中。山云。侍者掇退菓卓。

師云。新豐老人。頭正尾正。千載之下。威風凜然。報恩不道無。只是無侍者。掇退菓卓。若也未辨端倪。却須爛嚼細嚙。

歲夜小參。僧問。年窮歲盡時如何。師云。眼橫鼻直。進云。開先道。依舊孟春猶寒。又且如何。師云。相隨來也。進云。喚作田地穩密得麼。師云。訝郎當漢。進云。東村王老夜燒錢。又作麼生。師云。箭過新羅。僧禮拜。

師乃云。新年頭舊年尾。塵劫事只如是。東村王老夜燒錢。張公喫酒李公醉。覷面當機。透頂透底。要知被裏穿。須是同床睡。光孝門戶。雖則東撐西拄。寂寂寥寥。較之以斷薪續禪床。何啻十萬里。阿呵呵。是不是。不是冤家不聚頭。動地清風來未已。

舉僧問雪竇。如何是教外別傳一句。竇云。看看臘月盡。僧云。恁麼則流芳去也。竇云。啞子喫苦瓜。

師云。把定處放行。放行處把定。乳峰老人。經事多矣。有問報恩如何是教外別傳一句。只向他道。來日是元朝。恁麼則流芳去也。種禾却生豆。

結制小參。即心即佛。無端帶鎖擔枷。非佛非心。還同避溺投火。拈了也不落意思。一見便見。已是二頭三首。輕輕踏步向前。何啻新羅國裏。況是畫窠書朱。使人順朱填墨。錯誤了也。還甘也無。且從他旃檀鬚林。獅子窟宅。五百七百。長期短期。震法雷擊法鼓。布慈雲洒甘露。咄。淨地上不得狼籍。

舉巖頭參德山。纔跨門便問。是凡是聖。山便喝。巖頭便禮拜。洞山聞云。若不是豁公。也大難承當。巖頭云。洞山老漢。不識好惡。錯下名言。我當時一手擡一手搦。

師云。久嚮周金剛。一條白棒。佛來祖來。例不放過。因甚今日一場懨懨。洞山大似眼熱。即且置。那裏是一手擡一手搦處。具超宗異目者。試辨看。

解制小參。映眼時若千日。萬象不能逃影質。直下捻定。眼不見鼻孔。又作麼生。放過一著。且圖淨盡打併。勿令剗去又生。切切提持。莫使斷而復續。與麼語話。雖則乳氣。忽地。眼裏耳裏。回避無門。正是暫時岐路放手放脚處。那裏泊在。雲門大師道。直得山河大地。無絲毫過患。猶是轉句。不見一色。始是半提。須知更有全提時節。全提則不敢。莫有不見一色底麼。眾生只是未曾觀。何得自輕而退屈。

舉翠嵒示眾云。一夏與兄弟說話。看翠嵒眉毛在麼。保福云。作賊人心虛。長慶云。生也。雲門云。關。

師云。翠嵒把髻投衙。抱賊自首。能酬唱善抑揚。則不無。保福長慶。門庭施設。跛脚阿師。較些子。與麼批判。看報恩眉毛在麼。冬至小參。塵塵爾。剎剎爾。築著磕著。無處回避。因何普眼三度入定。徧觀三千大千世界。而不見普賢。莫是用時即有。覓之總無麼。更有不識好惡底。教他於靜三昧中起一念。便見普賢於空中。乘六牙香象。似此捏目。還端的也無。者裏若無些子骨氣。未免抱賊叫屈。報恩不曾泥裏洗土。使人向沒依倚處轉步。推尋絕思量時。起疑體究。逐日量柴數米。窮煎餓炒。只與麼過。有甚掩處。若是錢不露陌。銀不露白。又誰管得。何故。來朝冬至一陽生。舉明招示眾云。者裏風頭稍硬。歸來暖處商量。僧隨至。招云。纔到暖處。便乃瞌睡。以拄杖一時趕散。

師頌云。昭昭心日色塵裏。晃晃色塵心日間。直下裂開猶是鈍。那堪隨步萬重山。

結制小參。說法不應機。總是非時語。諸人面前。若說三玄三要。二主二賓。五家十家。千門萬戶。刮磨把定乾坤眼。點發包羅今古心。盡是殘羹餽飯。抑不獲已。略露些子。且非七佛靈蹤。列祖命脉。屈指云。一二三八九十。十語九中。不如一默。無端兩杓三杓了也。若道低頭不顧。三十年後。中箭還似射人。管取好笑。舉僧問趙州。某甲有疑時如何。州云。大疑小疑。僧云。大疑。州云。大疑東北角。小疑僧堂後。

師云。見之甚易。識之甚難。也是慣得其便。

結制小參。渾崙一句。古今共舉。四角六張。三尖五露。有時拋向人前。迥絕毫釐。有時攝入一塵。充塞寰宇。謂具三玄三要者。觀體全真。謂分五位君臣者。宛轉回互。是則是。可惜許。爭似咽喉窄。不能為你吞。板齒礙。不能為你吐。阿刺刺。樂中苦。三山點頭回。秦淮逆流去。莫道當機不分付。忽有人問。九夏賞勞。又作麼生。良久云。分明記取。

舉臨濟問僧。甚處來。僧云。定州來。濟拈棒。僧擬議。濟便打。僧不肯。濟云。後遇明眼人去在。僧後參三聖。舉前話。三聖拈棒。僧擬議。聖便打。

師云。臨濟不得三聖。一生無雪處。畢竟者僧肯也未。喝一喝。除夜小參。平常道快與快與。看看臘月三十日到來。如老鼠上牛角。胡孫入布袋。伎倆盡岐路窮。正恁麼時。露柱吞却虛空。燈籠吞却露柱。忽然打箇翻車筋斗。從這邊驀過那邊。依舊孟春猶寒。咄。顛言倒語作麼。舉趙州訪茱萸。上法堂從東過西。萸乃問。作什麼。州云。探水。萸云。我者裏一滴也無。探箇什麼。州遂將拄杖靠壁而去。

師頌云。善法堂前探淺深。寒濤平地湧千尋。探竿靠壁出門去。也是貧兒拾得金。

解制小參。墮身異類。動必全機。石火光中。戴角擎頭。劔鋒影裏。生風起草。見之膽落。擬之喪軀。誰是當機。請急著眼。雪峯示眾云。南山有條鰲鼻蛇。汝等諸人。切須好看。

師云。嘗謂閩中尊宿。明鏡當臺。胡來漢現。元來蛇入竹筒。曲心猶在。

長慶云。今日堂中大有人。喪身失命。也是頭行尾隨。

玄沙云。用南山作麼。扶持不起。

雲門攬拄杖向雪峯面前。作怕勢。草裏翻身。可惜許。一條鰲鼻。渾家弄死了也。逗到乳竇峰前。欲令再活。乃高聲云。看脚下。自傷了也。當初有箇向七寸上一掐掐定。看他一火落作麼生。擲下拄杖云。石城東畔冶城西。也要諸人照顧。莫有向毒蛇頭上揩痒者麼。喝一喝。

舉印宗會下二僧。競風幡。一云風動。一云幡動。祖師云。不是風動。不是幡動。仁者心動。

師頌云。不是風兮不是幡。堂堂擺手出重關。可憐守待雞鳴者。猶在昏昏醉夢間。

結制小參。癡癡兀兀。莽莽鹵鹵。朝遊西天。暮歸東土。歷歷落落。精精明明。拈得鼻孔。打失眼睛。如是二人。了無回互。九十日中。如是而住。以圓覺為伽藍。以一乘為門戶。以寂滅為園苑。以妙有為玩具。正當此時。誰為莽莽鹵鹵。誰是精精明明。水滴冰生。草偃風行。堪與叢林作典刑。更有一人。不受軌則。眼觀東南。意在西北。又向甚處安著。良久云。重關曾巨闢。作者與同歸。舉汾陽問首山。百丈卷席。意旨如何。山云。龍袖拂開全體現。陽云。師意如何。山云。象王行處絕狐蹤。陽云。萬古碧潭空界月。再三撈攬始應知。

師云。首山平地上。扶持得起。汾陽死水裏撈攬將來。以拂子。劃一劃云。古人且置。莫有以不平。報不平者麼。喝一喝。

解夏小參。徹底放下。了無一法可當情。和座托開。纔有絲毫即是妄。便與麼去。永絕諸緣。內則了了常知。外則泠泠自用。只如九十日。潛行密用。明契顯符。免得免不得。且置。豎拂子云。此是山僧平生受用不盡底。諸人亦乃委知。幸因布袋解開。只得兩手颺却。擲拂子云。青山忽憶便歸去。塵世要看還下來。

舉定上座問臨濟。如何是佛法的大意。濟下禪床擒住。與一掌。便托開。定佇立。傍僧云。定上座何不禮拜。定方禮拜。忽然大悟。

師云。大寂門風四傳。而至臨濟。到者裏破家散宅。定上座悟去。且道得臨濟力傍僧力。

建康府能仁禪寺小參

冬至小參。難難。無處無從著眼看。靜夜譙樓更漏鼓。聲聲相喚不相瞞。易易。瞬目揚眉無不是。是則依然又不然。不然不然誰瞥地。難非難易非易。盤龍渴飲清溪水。只知天寒人也寒。不覺大家在這裏。既在這裏。畢竟是天寒人寒。良久云。果然在這裏。

舉臨濟會下二同參。一云。離却中下之機。請師兄道一句子。一云。擬問即失。云恁麼則禮拜師兄去也。云者賊。

師云。賓中主。主中賓。在窟獅子。互換嘖呻。相識如今能幾人。

除夜小參。臘月三十日巳前。竹戶蓬窗。滴水滴凍。只宜高處高平。低處低平。臘月三十日巳後。花衢柳陌。和氣春風。不妨肥馬

碌碌。瘦馬碌碌。正當臘月三十日。舊歲已去。新歲未來。坐斷兩頭。如何通信。良久云。太湖三萬六千頃。月在波心說向誰。舉僧問古德。年窮歲盡時如何。德云。依舊孟春猶寒。師云。雖是尋常匹似閑語話。不得作尋常匹似閑語話會。然後作尋常匹似閑語話會。會麼。孟春猶寒。

結夏小參。一句語具三玄門。一玄門有三要義。渾崙擊破與人看。眨眼白雲千萬里。且道是什麼一句語。喝。古人向官不容針處。和泥合水。私通車馬時。截鐵斬釘。徹底老婆心。費盡元陽氣。辜恩負義漢。就鉢盂裏。一匙挑上。一筋夾起。咬得破嚼得爛。噫。將謂將謂。元來元來。更說什麼一句兩句語。三玄三要門。咄。恁麼見解。滴水難消。苟或未然。九旬林下坐。終有月明時。舉南泉示眾云。文殊普賢。昨夜三更。相打每人與二十棒趨出院。趙州出眾云。和尚棒教誰喫。泉云。王老師過在甚處。州乃禮拜。

師云。此是王老師十八上。經驗底藥頭。和籠子分付了也。倘能濃進一服。管取換却頂骨。

解夏小參。一畝之地。三蛇九鼠。捏定則水滴水生。裂開則雲披月露。德山小參不答話。陣勢堂堂。擒縱在我。趙州小參要答話。馬前廝撲。拳踢自由。能仁有問即答。無問即休。不敢躡前人之蹤。趨近時之習。蓋一夏與二三友。麥飴菜羹。隨分而過。任他古佛與露柱交參。狸奴對燈籠共語。南山雲北山雨。人從浙東來。却往江西去。明暗機清濁句。是正是偏。是賓是主。看來總是閑家具。忽有箇道喚作閑家具得麼。乃舉手云。慚愧慚愧。只是未敢相詐。舉馬祖。僧問。如何是祖師西來意。祖云。近前來向你道。僧近前。祖打一掌云。六耳不同謀。黃龍南禪師云。古人尚乃六耳不同謀。如今諸方。聚徒五百七百。鬧浩浩地。禍事禍事。

師云。鄭州梨青州棗。知道地識酸甜者。宜指以示人。其柰癡語夾姦。轉見難辨。當初見他恁麼拈提。只向道。某甲不會。管取龍峰老人一場懺懼。

冬節小參。非風鈴鳴。我心鳴耳。刺腦膠盆。非風幡動。仁者心動。據欵結案。奇哉祖師無上心印。衲子微細命門。流落叢林。已千百載。既稱參玄上客。還曾子細也無。若喚作以機投機。將錯就錯。有什麼交涉。能向未形言語之前。著眼一覷。如印印空。不露文彩。若正興問答之際。掩耳不及。如印印水。波瀾競生。或翻身拄定。背手剔開。陰極陽生。冰消瓦解。如印印泥。不移絲髮。拈拄杖云。這一印又作麼生。卓一下云。好貸夜窻三十刻。胡床孤坐究根源。

舉招慶。一日與鼓山相會。慶云。家常。山云。太無厭生。慶云。且欵欵。山云。家常。慶云。今日又無火。山云。太鄙悋生。慶

云。便將取去。

師云。家常茶飯。豈在安排。鼓山一招便來。不合攙匙亂筋。使招慶郎郎忙忙。閉門拄戶。排遣不辨。能仁至節。謂是家常。太鄙悖生。謂非家常。太無厭生。畢竟如何。解使不由家富貴。風流豈在著衣多。

建康府蔣山太平興國禪寺小參

冬至小參。鼓聲息韻。燈燭交輝。山僧與諸上座。與麼相見。是第二頭。拋沙撒土。點兒落節。不與麼相見。是第三首。[馬*展]水[馬*展]泥。垛生招箭。平常日用。不涉安排。了了常知。泠泠自用。喚作妙峰孤頂。已_巳是轉腦回頭。離宮失殿。何況別峯頂上。徐步經行。寶山堂前。挨肩而立。合一狀領過。諸上座。要端的麼。天高一寸子。地闊一魚鱗。大海一滴水。乾坤一箇人。有聞與麼說話。直下肯去。正好朝三千暮八百。若也未然。切不得動著。

舉藥山命十人禪客。送龐居士。士指空中雪云。好雪片片不落別處。師便喝。全禪客云。落在甚處。士遂與一掌。全云。居士也不得草草。士云。恁麼稱禪客。閻羅老子。未放你在。全云。居士作麼生。士又與一掌云。眼見如盲。口說如啞。

師云。頭上漫漫。脚下漫漫。拄定即易。瞥轉還難。金剛寶劍逼人寒。不墮機鋒句外看。

結夏小參。宴坐圓覺伽藍。住持平等性智。胡蜂不戀舊窠。蛟龍豈臥死水。便與麼去。平地翻身。竿頭緩步。穩實處不妨巖嶮。巖嶮中自然穩實。負出負入。一任商量。讓祖作麼生。馬師是什麼。德山木上座。臨濟金剛王。又如何話會。喝一喝。鐵輪天子寰中勅。草店家風亦自殊。

舉龐居士頌云。十方同聚會。箇箇學無為。此是選佛場。心空及第歸。

師云。龐居士不妨抑已_己為人。當初不與萬法為侶底。在什麼處。點檢得出。誰登選佛之場。總若不然。却許心空及第。

解夏小參。身心一如。身外無餘。似石含玉。如淵藏珠。若然者。蕭蕭之翠竹。迎風巧演陞堂之偈。滴滴之芙蓉。承露全彰入室之機。是以一夏有口掛壁。也是略得邊事。無有空過不空過者。忽有箇出來道。去年貧未是貧。今年貧始是貧。意到不若句到。眼親何似手親。未可生理死水濱。噫。昔嘗聞此語。今喜見其人。

舉思大和尚。長夏坐禪。巍然不動。解夏日。侍僧白云。今日自恣也。乃嘆曰。佛在世日。證道者無數。去聖時遙。一無所獲。乃放身偃仰之間。忽獲眼根清淨。悉見三千大千世界。如觀掌中。

師頌云。嗟嘆聲中偃仰時。三千世界草離離。拈拄杖卓一下。若教老漢明斯旨。鼻孔從來向下垂。

除夜小參。深固幽遠。到者方知。覲露見前。用無不是。往往寢生死長夜。曾無省覺。臘月三十日作麼生。因記得子湖和尚。夜半在僧堂內。高聲叫云。有賊有賊。師云。蒿箭子。大眾驚起。師云。穿過了也。遂扭住一僧云。捉得也捉得也。師云。且待且待。僧云。不是某甲。師云。捧上不成龍。湖云。是則是。只是不肯承當。

師云。中九下七。者老漢。象席打令。直得盡大地人。至今眼子定動。只是賊證不全。被他當面諱却。也好放過。今正臘月三十日。夜斷不敢動著。待伊夢熟。不捉自敗。也好三十棒。何故。眨眼是明年。

舉僧問趙州。學人乍入叢林。乞師指示。州云。喫粥了也未。僧云。喫粥了也。州云。洗鉢盂去。

師云。只與麼舉一遍。供養大眾。更深夜闌時。寂寞無依處。試翻覆看。忽然築著磕著。却請布施一轉語。

結夏小參。按拄杖云。正與麼。覲露風規成險墮。不與麼。背手持來重勘過。總與麼。一句溫同彼我。總不與麼。出就鋒鏑孰敢挫。阿呵呵誰擔荷。百煉精金逢烈火。關重關撤雙鎖。明暗同時俱裂破。南北東西斫額時。依稀角虎當門坐。喝一喝。

舉風穴到南院。院便問。入門須辨主。穴云。一句請師分。院以左手拍膝。穴便喝。院以右手拍膝。穴亦喝。院舉左手云。者箇且從闍黎。舉右手云。者箇作麼生。穴云。瞎。院遂拈拄杖。穴云。作什麼。奪棒打却和尚。莫言不道。院擲下拄杖云。今日被這黃面浙子。鈍置一上。穴云。大似持鉢不得。詐道不飢。院云。闍黎莫曾到此間麼。穴云。是何言歟。院云好好借問。穴云。也不得放過。院云。且坐喫茶。

師云。風穴在廓侍者處。竊得箇暗號子。便入南院法戰場中打一遭。賓主不分。一場敗闕。當時使南院。具啐啄同時用。設使風穴全機。也須腦門著地。

解夏小參。舉仰山示眾云。我若舉禪宗。身邊要一人相伴也無。師云。低聲低聲。我若東說西說。則五百七百。爭頭向前。採取空拳誑小兒。都無實解。師云。低聲低聲。又問第一座云。不思善不思惡。正當恁麼時。作麼生。座云。是某甲放身命處。山云。何不問老僧。座云。正當恁麼時。不見有和尚。山云。你扶吾宗不起。師云。低聲低聲。復云。正當恁麼時。宗門爪牙。劔刃上事。嶮崖之句。嚙齧之機。又如何分付。或有聞與麼說。出來道。箇低聲低聲。又作麼生支遣。良久云。但有歲寒心。兩三竿也足。

舉仰山夏末。問訊滄山。滄云。子一夏不見上來。在下面作何所務。仰山云。開得一片畚。種得一籬粟。滄云。子一夏不虛過。仰山却問。和尚今夏。作得箇什麼。滄山云。日中一食。夜後一寢。仰山云。和尚今夏。亦不虛過。道了乃吐舌。滄山云。寂子何得自傷己命。

師云。互換之機。是他父子。家常茶飯。末後弄得太活。返成自傷。蔣山以古視今。一夏可謂不空過。何故。空王殿上鳴鶻。刺破西邊虛空。成箇窟籠。一夏只得剗東補西。使其仍舊。雖然爭柰者一縫何(此夏蓋佛殿)。

平江府虎丘雲巖禪寺小參

結夏小參。莖蘆北渡。明知飲恨吞聲。隻履西歸。曾未掃蹤滅跡。一花五葉。萬卉千葩。真丹覺苑。日日皆春。圓覺伽藍。時時是夏。安居禁足。何殊網底遊鱗。更說長期護生。未是拋籠俊翻。相逢不相笑。瞬目不揚眉。暗號潛施。明機雙扣。總不出這箇時節。為什麼有解有結。拍禪床云。湛盧纔出水。頑石也分開。

舉雪峯示眾云。盡大地撮來。如粟米粒大。拋向面前。漆桶不會。打鼓普請看。雲門云。盡十方世界。乾坤大地。色空明暗。以拄杖劃一劃云。百雜碎。師云。且道雪峰底是。雲門底是。初機須要參雪峰。久參須要見雲門。若見雪峯。不見雲門。未免在影子裏作活計。只見雲門。不見雪峯。未免一切處盲枷瞎棒。若見雪峰。又見雲門時如何。拍禪床喝云。獅子咬人。韓獹逐塊。

解夏小參。一夏以來。諸人密密用工處。山僧總知。山僧用處。諸人知否。初三十日。欲造箇無縫塔子。千方百計。請樣於南陽國師。師却持龕作亞。復求之於耽源。源又指東劃西。及觀雪峰玄沙底。又規模太奢。別處間有之。又被人先借去。中三十日。只得閉門自為。至今夕方莊嚴畢備。危層落落。寒影團團。到此未足以擬其高。珊瑚瑪瑙。瑪瑙珊瑚。到此未足以擬其富。諸人必須親面一見。第一不得立在兩邊。不得坐在中道。不得依倚一物。纔與麼便不與麼。利刀剪拂。赤手扶持。能如是。說甚七日尋之不逢。千年隨之不見。者些漏綻。見未到。畝諷訛。見得到。事還蹉。見也麼。時時背面煙霞遶。夜夜簷楹星月過。五須彌秤來二兩。四大海量起半蠡。阿呵呵。獻佛不在香多。

舉僧問雲門。如何是自己。門云。遊山翫水。師云。朝西天暮東土。翫水遊山。徐行欵步。是則不動道場。不是亦在裏許。誰為證明。拍禪床云。石霜角虎。

冬節小參。一冬二冬。叉手當胸。是則銀山疊疊。非則鐵壁重重。正恁麼時。除是眉生稜眼生角底。一築築住。一挨挨過。翻轉得起。驅駕得行。揀甚是句非句。明頭暗頭。百匝千重。不消一筭。直饒與麼。未可放過。拈拄杖云。住住。不得喚作拄杖子。卓一下云。又落在什麼處。虎丘今日。平地喫交了也。還免得人檢責麼。靠拄杖云。千金駿骨無尋處。且作尋常死馬醫。舉為山問仰山。天寒人寒。仰山云。大家在這裏。師云。天寒人寒。影草探竿。總在裏許。振鬣擺尾。水面依然平似砥。大眾者裏。好別一轉語。畢竟是天寒人寒。除夜小參。年窮歲盡。火冷灰寒。亦欲作箇家燕。管顧諸人。因思北禪烹一露地白牛。只知閉門取樂。不能與人同歡。老東山。邏羅招。邏羅搖。却能與人同歡。不知禮薄致怨。虎丘寂寥之濱。未免拔貧作富。拽轉百千香水海。滿盛百億須彌盧。遂以拂子指云。總在諸人面前。一任取性。良久云。者般滋味子。不許外人知。舉白雲端和尚。見楊岐問云。令師有悟道頌。試舉看。端遂舉云。我有神珠一顆。久被塵勞羈鎖。今朝塵淨光生。照破山河萬朵。岐大笑。歸方丈。端罔措。通夕不寐。次日咨詢是事。岐云。汝見昨日打夜狐者麼。端云。見。岐云。汝一籌。不及他。端大駭云。如何。岐云。渠愛人笑。汝却怕人笑。白雲於是大悟。師云。楊岐談笑之中。換了白雲心肝五臟。而白雲憤悶之際。挾了楊岐鼻孔眼睛。若在今時亦未可。何故。禍不入謹家之門。

臨安府靈隱景德禪寺小參

冬至小參。召大眾云。山僧騎鷲峰。走入江西去也。莫有相隨者麼。馬大師道。即心即佛。倚天長劔。逼人寒。非心非佛。踞地全威還返擲。不是心。不是佛。不是物。手握驪龍珠。擊碎驪龍窟。恁麼提唱。還當得麼。只要引你一步兩步。東行西行。庶幾冬齋。不致落寞。劔利底。眼角剔開。出來道。者般殘羹餽飯。莫拈出好。只向道。你甚處見古人。忽然水底火發。老僧只得放過。何故。行盡小溪路。始見騎鹿人。舉僧問古德。如何是實際理地。德云。南瞻部洲。北鬱單越。恁麼則事同一家。云猶隔海在。師云。問處赤心片片。答處不負來機。今有問靈隱。如何是實際理地。天長地久。海晏河清。恁麼則事同一家。自天祐之。吉無不利。除夜小參。問著不知。世尊是有密語。舉起便會。迦葉何曾覆藏。豎起拂子云。諸人喚者箇。作拂子。不唯自瞞。亦乃瞞老僧。不喚

作拂子。不唯瞞老僧。亦乃自瞞。不犯風影。直透青霄底。聞與麼道。便乃掀倒禪床。拂袖出去。果能如是。總合喫棒。何故。到江吳地盡。隔岸越山多。

舉趙州示眾云。老僧使得十二時。諸人被十二時使。

師云。多口阿師。得箇自受用三昧。便乃傍若無人。自不知漏綻處。拈拄杖云。靈隱拄杖子。長年只麼黑鱗皴地。說什麼使十二時。十二時使。顧左右云。諸人皮下。還有血麼。

結夏小參。道無橫徑。立者皆危。法無定形。狀之則失。拈槌豎拂。瞬目揚眉。邪法難扶。醜惡俱露。況是言中定旨。句裏明宗。一放一收。一問一答。或出入於知見戶牖。或遨遊於解會園林。總是撮影摩光。捫空追響。所以德山道。我宗無語句。亦無一法與人。獅子獨行。臨濟道。一切處不失正見。與釋迦老子不別。懶兒牽伴。是以入門便棒。入門便喝。且落在什麼處。九旬禁足親行到。兩浙江南自點頭。

舉雲門示眾云。古佛與露柱相交。是第幾機。自代云。南山起雲。北山下雨。東山云。雲門元來膽小。若是白雲。只對他道。是第八機。

師云。白雲可謂膽大。還免得第八機麼。

冬節小參。道出常情。不墮語默動靜。禪非意想。離却見聞覺知。離却見聞覺知。禪作麼生參。不墮語默動靜。道作麼生學。一般不識羞底。便道。描不成塑不就。擁不聚撥不開。真所謂猿猴探影。伶俐底。一聞此語。攢眉便回。坐斷千差。閉門甕裏撈明月。牢關一字。是處寒崑鎖凍雲。直得六陰剝一陽復。碓觜生花。冰河發焰。去年恁麼。今歲亦然。且道。來年又作麼生。喝一喝云。來年說破。

舉汾陽無業國師云。若一毫頭。聖凡情念未盡。未免墮驢胎馬腹。白雲端和尚云。設使聖凡情念淨盡。亦未免墮驢胎馬腹。

師云。既是聖凡情念淨盡。為什麼也墮驢胎馬腹。拈拄杖云。聖凡情念。盡與未盡。卓一下云。盡向者裏百雜碎。

除夜小參。據虎頭收虎尾。豈是俊流。騎賊馬趕賊隊。素非作者。超宗異目。格外清規。公案宛然。若為甄別。我觀黃蘗和尚於大雄峯頂。得見馬師大機之用。不覺吐舌。俊哉。殊使人疑著。及乎東行西行。却道。達磨大師來中國。惟說一性。惟傳一法。以佛傳佛。不說餘佛。以法傳法。不說餘法。法即是不可說之法。佛即是不可取之佛。乃本源清淨心也。苦哉著甚來由。後來義玄上座。問佛法的的大意。三度被打。六十拄杖。奇哉。救得一半。莫有隔山見烟。隔牆見角。不受人瞞底。出來道。長老你說也說了。用也用

了。我見也見了。只是不入者保社。可謂高懸慧日。大振玄風。只是拄杖子。未肯放過。何故。百煉精金火裏看。舉德山一日飯遲。乃托鉢赴堂。時雪峰作飯頭。見便云。者老漢。鐘未鳴。鼓未響。托鉢向什麼處去。德山便低頭歸方丈。峰舉似崑頭。頭云。大小德山。未會末後句。山聞乃喚問云。汝不肯老僧那。崑頭密啟其意。至明日陞堂。果與尋常不同。崑頭至僧堂前。拊掌大笑云。且喜老漢。會末後句。雖然如是。只得三年。師云。雙明雙暗。同死同生。則不無德山崑頭。殊不知。鼻孔落在雪峰之手。末後句則且置。且密啟其意。畢竟說箇什麼。參。結夏小參。是是。江國春風吹不起。不是不是。寶劍寒光燭天地。昨日與麼道。事不獲已。今日與麼道。理固當然。就上轉得去。如出窟獅子。擬前跳擲。早已翻身。哮吼一聲。壁立千仞。有甚近傍處。更說什麼。照用雙行。卷舒齊唱。總不與麼。錯認定盤星。官不容針。向第二第三。別作箇程限。顧視大眾云。莫有出窟獅子麼。

舉保福示眾云。塞却你眼。教你覷不見。塞却你耳。教你聽不聞。坐斷你意根。教你分別不得。地藏又道。不塞却你眼。見箇什麼。不塞却你耳。聞箇什麼。不坐斷你意根。分別箇什麼。

師云。二大老。一人把住。一人放行。放行則曲為久參。把住則援手初學。可謂打鎖敲枷。立地相待。拈拄杖云。且道。山僧拄杖子。又作麼生。卓一下云。有時聲色堆中坐。一句問渠渠不知。解夏小參。直下便是。一塵翳天。撩起便行。千車合轍。有佛處不得住。人從天台來。無佛處急走過。却往南嶽去。三千里外摘楊花。又作麼生。挂劍眉間。且道與洞山萬里無寸草。石霜出門便是草。相去幾何。總不得動著。山是山水是水。南北兩峰。屹屹爭高。東西雙磧。泠泠流注。時清道泰。野老謳歌。驀然狹路交肩。且道回互不回互。喝一喝。

舉僧問雲門。初秋夏末。前程忽有人問。作麼生祇對。門云。大眾退後。僧云。未審過在甚處。門云。還我九十日飯錢來。

師云。者僧。身在韶石。心走道途。被人打籌飯錢。便乃伏聽處分。過在什麼處。孟獲當年戰武侯。

臨安府徑山興聖萬壽禪寺小參

結夏小參。臨濟示眾云。今時學佛法者。須要求真正見解。若得真正見解。生死不染。去住自由。在今天下學佛法者。惟臨濟一家。敢問。如何是真正見解。莫是無位真人。面門出入麼。莫是隨處作主。立處皆真麼。莫是論劫在途中。不離家舍。常在家舍。不離途

中麼。莫是焚燒几案。卷衣便行。不是河南。便是河北麼。如斯見解。未出常流。更說什麼三玄三要。二主二賓。照用同時不同時。人境俱奪俱不奪。總是殘羹餽飯。今夏與七百兄弟。同此安居。譬如潛泉魚。鼓波而自躍。豈無一箇半箇。聞與麼說話。負不平氣。咬定牙關。出來掀倒禪床。庶知後五百年。臨濟真風不墜。有麼有麼。喝一喝。

舉臨濟因灌溪來參。濟見便[捅-用+]住。溪云領領。濟便托開。師云。窺鞭影而行。已非良馬。既登伯樂之門。且與放過。徑山今夏七百眾。可中若有見義勇為底。棒折也未放在。何故。未必今人愧古人。

冬夜小參。直指單傳。猶如瞌睡。旁提正案。又更嚙言。或時閉眼商量。或時開眼失笑。如忘忽憶。道是還非。雖然官不容針。也要擘條縫罅。乃舉拂子云。者箇從何而來。擊禪床云。落在甚處。掛拂子云。如今置也。覓得它蹤跡也無。於斯徹底惺惺。正是夢中說夢。不見僧問南院。從上諸聖。向什麼處去。戴角擎頭。院云。不上天堂。定入地獄。天回地轉。僧云。和尚作麼生。放過不可。院云。還知寶應老落處麼。十日並明。僧擬議。孤燈失照。院便打。不可放過。院復喚僧近前云。令合是汝行。又打一拂子。無面目漢。當此時節。喚作夢中作夢得麼。雪竇云。令既自行。且拂子不知來處。雪竇道箇瞎。且要雪上加霜。兩手扶不起。妙喜云。權衡臨濟三玄三要。須是南院。雪竇因甚道。拂子不知來處。妙喜也道箇瞎。且圖兩得相見。將身一處理。

師復云。南院豎亞臨濟一目。二老同出隻手。當面點開。徑山不敢別立玄關。也道箇瞎。且要古今無墜。還見節文麼。火燒荊棘三千里。鍊鑄浮圖十萬尋。

舉古德。僧問。如何是冬來事。德云。京師出大黃。

師頌云。京師出大黃。渾崙不覆藏。朝生金鳳子。平地快翱翔。

普說

蔣山告香普說

神光不昧。萬古徽猷。入此門來。莫存知解。奇哉古人。做箇模子。得如是顯露。如是明白。如是簡徑。如是親切。若一見便見。何必特地。成行成陣。進前退後。乍入叢林者。固是不知端倪。其久習者。合作麼生。還知麼。山僧道箇明白。已是晦昧了也。道箇顯露。已是蓋覆了也。道箇簡徑。已是煩絮了也。道箇親切。已是迂疎了也。如何免得此過。我此法印。徧一切處。無有空缺。徧一

切時。無有間斷。且道。還晦昧得伊麼。還蓋覆得伊麼。還迂疎得伊麼。若要親切。第一不得向肉團心上。妄自分別。妄自親疎。妄自人我。妄自勝負。纔與麼便不中。纔放下。便蕩蕩地。虛融淡泊。寂寞安閑。遇境逢緣。恰恰自用。到這裏。微有毫頭。即是染污。況思量分別。人我勝負。巧偽之心。希望佛祖妙道。此輩誠為可憐憫者。眾中有一輩兄弟。見長老陞堂入室。一味採他口頭所說。乃信意指摘。互相傳揚。以為實事。苦哉。何不銷鎔人我是非。為般若。今却轉般若。為人我是非。所謂醍醐上味。為世所珍。遇斯等人。翻成毒藥。而今著實論量。但一念知非。盡底放下。略暫回光。便同本得。從前思量分別。人我勝負。同時寂滅。還曾如此也未。直饒如此。只是未在。何不火急上門上戶。求箇倒斷。

豈不見。昔有一比丘。白佛。我於世尊法中。見處即是。證處未是。世尊當何所示。佛召比丘某甲。當何所示。是汝問我。世尊恁麼道。是指示伊。不指示伊。向曾著語云。綿綿密密著工夫。見處渾無證亦無。就口一呼隨應喏。眼橫鼻直背廬都。雖然猶未有倒斷。須是和模子。一擊百雜碎。始得。

又不見。曹溪云。不見一法存無見。大似浮雲遮日面。不知一法守空知。還同太虛生閃電。此之知見瞥然生。錯會何曾解方便。若能一念自知非。自己靈光常顯現。這箇為存知見者說。若渾未有見處。合作麼生。晦堂初參大愚雲峰。次謁黃蘗。往來久之。殊無入作處。因讀傳燈。至多福一叢竹因緣。忽然契悟。頓見諸老相為處。復詣黃蘗。南公一見便云。子入吾室矣。晦堂云。大事本來如是成見。何得教人千方百計討尋。南笑云。若不教汝討究自悟去。則成欺汝也。只如僧問。如何是多福一叢竹。曰一莖兩莖斜。僧云不會。曰三莖四莖曲。晦堂於此悟去。且道悟箇什麼。這裏捉敗古人。許你陞吾堂。未入吾室。著些子眼力看得出。鷄子何止過新羅。久立。

垓藏主為父母請普說

北山高處望鄉關。一度登臨一解顏。目力窮邊無限意。應難寫向畫圖間。雖然也要大家描邈。

僧問。父母非我親。誰是取親者。師云。開口見膽。進云。諸佛非我道。誰是取道者。又作麼生。師云。來也來也。進云。古人且置。今人事作麼生。師云。大斧從來斫不開。進云。便恁麼去時如何。師云。斫額望西川。僧禮拜。

師乃云。山圍水遶。家山面目宛然。地迥天高。母氏音容無間。趙州不願再見。回避無門。洞山十種不歸。築著磕著。騰今邁古。捨己從人。冷湫湫地。搆得完全。鬧閨閨處。還虧一半。莫有知恩報恩者麼。廣漢垓藏主。江湖上客。尊宿法社。如靈隱鍾阜。皆以板首延之。不就。只要韜藏眾底。養道過時。初與良崑沂首座偕行。良崑亦屢却名山之招。如是高尚。足可以抑躁進之風。今抽衣資齋僧。命山僧普說。以報四恩三有。父母劬勞。並無一言及己。不似其他。只了自家一箇。渾身不辨。更不有父母之懷。往往引古人。不願再見。十不歸之語。以藉口此。真可憐憫。且道十不歸不再見。二古佛意。在什麼處。行脚於此不可不諗。十二時中。果憂道業不辦。如二老說話。可謂知恩方解報恩。如三到九上。或勸登甌峰。乃有青山易得。知識難逢。之語。雪峰者裏。與十不歸。不願再見。語雖不同。意却一般。後於鰲山店上。納敗缺云。這裏未穩在。被人窮其底蘊。隨病發藥。方至大安樂田地。當初死在古德棒下。更不孜孜汲汲。一直造前。安有感發底時節。學者做工夫。欲了參扣大事。到此見自己亦是冤家。何況父母。其他之念耶。既如此專一。又須要師友琢磨。方成美器。雪峰得豁公一時為伊割去了。更闢一條路。令進此一步。且那裏是他闢底路。與麼說話。總是一盲引眾盲。然塗毒一搥。聞者皆喪。誠哉斯言。不我欺也。後來得一備頭陀。參未透時。每以飲食接氣。不捨晝夜。光侍者激之云。你參得禪。我打鐵船下海去。由此愈愈奮發。徧參諸方。纔上飛猿嶺。築著脚指頭。於忍痛不禁處。忽然摸著鼻孔。復回有二祖不往西天之語。雪峰深肯之。且渠得箇什麼。便生風起草。其證悟處。真箇親見父母未生時面目。便使人傳語光侍者。我參得禪了。你鐵船打了也未。貧兒思舊債。諸禪者。出一叢林。入一叢林。尋師擇友。扣實參究。親面一見。本來父母。闊步古人之前。再見不再見。歸與不歸。皆無不可。古人云。盡大地是自家入理之門。但泯志虛懷。於經行坐臥時。經行坐臥處著眼。於語言問答時。語言問答處著眼。拈匙把筯時。拈匙把筯處著眼。阿屎送尿時。阿屎送尿處著眼。不得住著。不得粘綴。不得等待。不得擺撥。放令蕩蕩地。閑閑地。虛明自照。不勞心力。於此無間斷。久久自然純熟。如是用心。亦可報劬勞萬分之一。適來禪客問。父母非我親。誰是最親者。此是九祖伏馱密多。生五十年。不行不語。父母頗厭之。忽見八祖來訪。遽起行數步云。父母非我親。誰是取親者。諸佛非我道。誰是取道者。敗也敗也。八祖云。汝言與心親。父母非我比。汝行與道合。諸佛心即是。外求有相佛。與汝不相似。欲識汝本心。非合亦非離。八祖將

錯就錯。即不無。且九祖五十年。不行不語。却在甚處。著到逗到。師資投契。父母愛念。不割自斷。父母劬勞。不報自足。有般兄弟。三二十年在眾。肚裏黑漫漫地。不知箇事是何宗旨。若然者。不敢望你識本來父母。識得自己亦得。恁麼切切。有不甘者。出來盡情掀翻。不獨與前輩。把手共行。抑使今日垓藏主。報父母難報之恩。一時了畢。復有一頌。父母非親親是誰。双眸炯炯帶双眉。含元殿上不相識。正是岷峨相見時。

天童西堂寮受牌普說

某連蹇之跡。歸棲方丈尊叔大和尚席下。得遂安閑。曷勝萬幸。適蒙鳴鼓集眾。令與兄弟。提撕話頭。某自救不暇。何暇及人。尊命甚嚴。辭不獲免。只得勉強。為初機兄弟。東敲西磕。則可。江湖龍象。並不煩垂訪。恐臨時追送不前。返成得罪。然此一段事。謂難則不可。謂不難則亦不可。謂其難則人人本有之物。不假他求。謂其不難。自拈花微笑以來。至於曹溪。甫千七百年。以歲月言之。則盡大地人。普請作佛久矣。何得人傳一人。不絕如線。曹溪藩籬一剖。宗說俱通。江西革變通途。機用雙舉。密契顯符。具大眼目者。不知其幾。今又五百年矣。目前交喪。一至如是。若言此事。上上根器。方可堪任。中下無分。上上根器者。果何人哉。一見便見。力行深造者是。初非生而能知。以般若種子。熏煉純熟故也。中下無分者。豈妙法有所不徧處耶。蓋不能力行。中道懈退者是。方今索寞之秋。正法眼破沙盆。幸得方丈尊叔。力扶持之。放大光明。照耀天地。有志兄弟。正好決烈向前。力行擔荷。若未有證據者。宜以先覺先知。為榜樣。方有人作分。所謂外息諸緣。內心無喘。心如墻壁。乃可入道。此亦少林畫出底。一箇模子。不可不知。曹溪使人善惡二法。都莫思量。自然得入清淨心體。此非模子裏。脫出底耶。岩頭大師。呼之為頂句。為正位。為得住。初機新學。不識此句。難為話會。

適來老和尚云。須藉師友琢磨。誠哉。不見雪峰三到九上。千辛萬苦。後到木上座手中。桶底子打脫。却向鰲山野店。滯殼迷封。誤認岩頭塗毒之聲。使從前鹽官色空義。洞山過水偈。悉皆動地放光。如是切磋琢磨。欸案具在。如雪峰。真天下後世。學此道者法。岩頭真天下後世。為師友者法。先輩示一機。垂一境。如按吹毛。如擊塗毒。見而耳聾。聞而吐舌。舉手搖拽。撫掌大笑。是皆喪於鼓聲中者。若工夫不專。念漏不絕。妄想夢事。交煎胸中。似此之流。縱有百塗毒聲。亦無如之何也。須是虛心。使方寸冷冷

然。了了然。方可於宗師言下。有受道分。若計較安排。要合他語。且喜沒交涉。室中所舉。如金圈栗蓬。饒你下得一轉語。乃平時學得底。更有副箭。亦是偶中。第三句下。有定亂之謀。有出身之路。正是萬里望鄉關。果能剔起眉毛。倍加精彩。如毒蛇當道。如猛虎出林。除非不放出。纔放出一咬便斷。有甚共語處。更須高高峰頂立。深深海底行。著眼於未具胞胎之前。轉步於日用現行之際。如風吹水自然成文。自己目前。一箭俱透。妙峰孤頂。正在此時。觸目風光。阿誰無分。只如德山木上座。臨濟金剛王。且拈向一邊。不是風動。不是幡動。諸人甚處。與祖師相見。遇掛牌時。試吐露看。

天童西堂寮結夏普說

乃撫禪床一下云。摩竭陀國。親行此令。還搆得麼。放過一著。就方便品中。借水獻花去也。釋迦老子道。止止不須說。我法妙難思。與麼告報。鼎鼎是說是不說。若道不說。收拾不上。若道是說。難思底法。在什麼處。

方丈老人云。釋迦老子。全身在草窠裏。扶持不起。恩大難酬。只如百丈涅槃和尚。問南泉。從上佛祖。還有不為人說底法麼。曰有。如何是不為人說底法。泉云。不是心。不是佛。不是物。丈云。說了也。泉云。某甲只恁麼。和尚作麼生。丈云。我又不是善知識。爭知有說不說底法。千手莫能遮。且道與釋迦老子。止止不須說。是同是別。豈不見。適來方丈舉。璨祖云。至道無難。唯嫌揀擇。但莫憎愛。洞然明白。言端語端。趙州云。纔有語言。是揀擇是明白。老僧不在明白裏。是汝諸人。還護惜也無。徹底老婆心。時有僧便問。既不在明白裏。護惜箇甚麼。忍俊不禁。州云。我亦不知。象王回旋。僧云。和尚既不知。為什麼道。不在明白裏。險。州云。問話即得。禮拜了退。風行草偃。

參學人。到此却須子細著眼。麤飡易飽。細嚼難飢。趙州道。纔有語言。是揀擇是明白。老僧不在明白裏。及乎者僧一問。因甚道不知。他十八上。謁南泉。值南泉臥次。泉問。近離甚處。曰瑞像。曰還見瑞像麼。曰瑞像即不見。只見臥如來。南泉乃起身。勘破了也。便問。你是有主沙彌。無主沙彌。曰有主沙彌。曰如何是你主。州曲躬云。即日恭惟。和尚萬福。勘破了也。此時不惟轉轉地。又能破家散宅。到這裏。被這僧一問。却道不知。莫是言中有響麼。參學人。若未到明白處。須是到洞然明白處。既到洞然明白處。須窮趙州。纔有語言。是揀擇是明白。老僧不在明白裏。及護惜之語。此公案。極有好處。雪竇以頌發明之。後來圓悟。為之擊

節。凡在叢林兄弟。那箇不知。又不見。初祖謁武帝。帝問曰。對朕者誰。曰不識。又僧問曹溪。黃梅衣鉢誰得。曰會佛法人得。和尚得否。曰不得。曰因甚不得。曰我不會佛法。初祖不識。曹溪不會。趙州不知。是同不同。所以堂頭老人。尋常苦口叮嚀。要諸人直下。休去歇去。忽然冷灰豆爆。契此時節。同報佛恩。今早陞堂。令某今夜對眾普說。自愧寸無所長。加以老懶荒唐。安足以副重命。唯望兄弟。各各具正知見。仍以願力扶持。以悟為則。一切時中。如單鎗疋馬。與百萬軍陣。對壘相似。久久志氣不敗。自然有箇倒斷。自然入魔入佛。入善入惡。以正知見故。不被移換。不失正念。謂之隨處作主。立處皆真。所以尋常室中。舉古人機緣。千差萬別。隱顯殊途。初無實法繫綴於人。只要控你入路。你未透得時。似銀山鐵壁相似。及乎透得。自己便是鐵壁銀山。初機兄弟。是有是無。是邪是正。總是把髻投衙。抱贓陳欸。無有是處。未免從頭一一為你剗却。待你伎倆盡岐路絕。翻身一擲。躍過太虛。當此時。止止不須說。與不識不知不會底。悉皆伏聽處分。何故。理能伏豹。

靈隱首座寮結夏普說

我有無絃曲。臨風試一彈。彈時甚容易。解聽却還難。所以教中道。止止不須說。我法妙難思。諸增上慢者。聞必不敬信。黃面老漢。經事多矣。又道。汝既慙懃三請。豈得不說。又恁麼去。今夜不是有條攀條。只緣病痛相似。顧視大眾云。莫有拂袖下靈山底麼。且置是事。某夙有深幸。得與現前清眾。依棲方丈老人坐夏。偶老人違和。今幸向安適。蒙尊旨。令與初機兄弟。說些細大法門。當此時節。只好布袋裏盛錐子。不出頭是好手。況此事。細如米末。冷似冰霜。總在當人分上。所以三千威儀。八萬細行。不出坐臥經行。於十二時。語嘿動靜。綿綿密密。無一毫空闕底道理。始有少分相應。如人學射。久久自然中的。所謂龍吞千載月。腦有夜明珠。僧無十年學。不獲聖法財。誠哉是語。凡出堂入戶。展鉢開單。屙屎送尿。古人並有明戒。一一要知。初機兄弟。目前病痛。却容易醫。惟久參自是之病。是為膏肓。却取難醫。蓋其未得謂得。未證謂證。一向高茆。殊不知。涅槃心。差別智。三玄三要。隱顯殊途。皆上祖門風。今時樞要。饒你金鎖玄關。一時透過了。者裏正是病。此病易識而難見。如善才謁文殊。大智洞明。一生參學事辦。何故又登妙高峰頂。七日不見德雲。此參學人。微細做工夫處。那裏是妙峯孤頂。誰為德雲。及乎相見。如何却在別峯之上。參玄上士。試指病源看。豈不見。保福長慶二老。向遊山翫

水處。泄此家風道。即此便是妙峰孤頂。一手分付。長慶云。是則是。可惜許。兩手承當。羅山云。若不是孫公。泊合髑髏徧野。將謂無人證明。好大哥。正好著眼看。後來雪竇頌云。妙峰孤頂草離離。拈得分明付與誰。不是孫公辨端的。髑髏著地幾人知。雪竇頌了。又恐人不能承當。別畫箇喻子。譬如擲劍揮空。莫論及之不及。斯乃空輪無迹。劍刃無虧。心心無知。即是妙峰孤頂。說甚善財七日不逢。直饒文殊親來。亦卒摸索不著。大小雪竇。錯下名言。這裏見得去。方知茗溪道。吾有大病。非世所醫。且道他是什麼病。後僧問曹山。山云。攢簇不得底病。名邈不著在。又問。諸佛有此病否。山云有。僧云。為什麼不病。山云。為伊惺惺。惺惺亦是病。僧云。眾生有此病否。山云有。僧云。為什麼不病。山云。眾生若病則非眾生。一回飲水一回噎。僧云。和尚有此病否。山云。正覓起處不得。孤然不倚。曹山若無起死回生之手。識其所證。與伊發藥。則未免儻儻侗侗。打作一團。且道。茗溪之病。與江西日面佛月面佛。德山阿爺爺。相去幾何。

又如明招獨眼龍。謂深師叔。有什麼藥。相救相救。深云。只恐和尚。不解忌口。招云。眼子烏律律地。遂轉面而臥。且道。深師叔過在什麼處。近有以堂頭違和。心甚不滿者。因為舉。玄沙和尚。誤服毒藥。通身紅爛。有問。如何是清淨法身。沙云。膿滴滴地。天衣懷禪師。亦有此病。作頌發明之云。滴滴通身是爛膿。釣魚船上顯家風。時人只看絲輪上。不見蘆花對蓼紅。天衣玄沙。二古佛也。且道是色身病耶。法身病耶。是佛病。是祖病。是禪病耶。與前七日不見者。是同耶。不同耶。還攢簇得也無。還覓得起處也無。從朝至暮。窮到藥病相治。正是譎訛處。藥病相忘。至大安樂田地。正在別峰之外。亦未是放下時節。何故。黃面老漢。為三界大醫王。猶有語病。今夜因行掉臂。略為點出。教中道。深固幽遠。無人能到。既是無人能到。爭知深固幽遠。不知深固幽遠。惟我能知。日用現前。無人能到。眾中一人半人。聞山僧與麼道。大不肯去時如何。慚愧慚愧。久立。

徑山告香普說

阿呵呵。青天白日。有迷路者。子細看來。是誰之過。七百年前。故紙堆中。有箇永嘉大師。一日於不可思議境界。鑽得頭出。徑往曹溪。求印證所解。纔跨門。遶禪床一匝。振錫一下。卓然而立。奇恠。甚處學得這消息來。曹溪曰。夫沙門者。具三千威儀。八萬細行。大德自何方而來。生大我慢。這漢做許多伎倆。祇喚他底作我慢。不妨減人威光。永嘉乃接口道。生死事大。無常迅速。更不

再勘。祖曰。何不體取無生。了無速乎。將錯就錯。永嘉云。體即無生。達本無速。未在。祖曰。如是如是。冬瓜印子。然後具威儀相見。須臾告辭。祖曰。返太速乎。永嘉云。本自非動。豈有速耶。祖曰。誰知非動。永嘉云。仁者自生分別。泊不問過。祖曰。子甚得無生之意。永嘉云。無生豈有意耶。翻身獅子大家看。祖曰。無生無意。誰為分別。永嘉云。分別亦非意。敗闕至此。祖曰。善哉善哉。少留一宿。祖師可謂騎賊馬趕賊。老眼撥開。是則是。可惜放過。當時他道。生死事大。無常迅速。這裏和聲便打。管取別有生涯。免他一生墮在醋缸裏。後作證道歌。打頭便道。絕學無為閑道人。不除妄想不求真。果然坐在這裏。至今禪人相見。便道。生死事大。無常迅速。也是依樣畫貓兒。中間祖師編辟詣實之款。甚是頭正尾正。今時纔到結角羅紋處。又却憊憊。是汝諸人。果能造詣。如永嘉老漢乎。果能以生死。為事大乎。只要十二時中。究明自己。向聲色頭上坐。聲色頭上行。無[糸*糸]毫之念。別處著到。了取無量劫來未了底一段公案。何患不與永嘉同參耶。況此事。三歲孩兒也知是本有之事。在靈山。謂之單傳。到少林。謂之直指。單傳傳自家本心。直指指自己本性。恁麼說話。且看山僧眉毛在麼。每見學般若兄弟。有其名而無其實。是皆根性未具。氣力未充。不能以前輩為榜樣。不求師友琢磨。一向驕心。不覺蹉過。其過在久拋家舍。流浪他山。歲久月深。遂成胡越。惜哉。有能一念回光。便同本得。始知黃面老子道。天上天下。唯吾獨尊。噫。此語元來。不落在別人分上。山僧慶元間。在松源師翁室中。見一兄弟。纔見舉話。便云合取狗口。松源休去。老僧退問一兄弟。合取狗口。其意如何。云天上天下。唯吾獨尊。彼時老僧。便插得一脚。雖未免錯認定盤星。然更不疑。色見聲求。是行邪道之語。敢問。既不許色見聲求。如何明得自己去。如何徹見本性去。疎山本仁和尚云。尋常不欲向聲前句後。鼓弄人家男女。何故。要且聲不是聲。色不是色。意在鉤頭。僧問如何是聲不是聲。仁云。喚作色得麼。穿却鼻孔。如何是色不是色。仁云。喚作聲得麼。換却眼睛。僧禮拜。仁云。且道為你說答你話。若檢點得出。許於佛法中。有箇入處。分疎不下。後來雪竇云。本仁也是奇恠。要且貪觀天上。既非聲前色後。從什麼處入。應庵云。雪竇盡其神力。無插手處。只如道既非聲前色後。從什麼處入。往往十箇有五雙蹉過。還知應庵落處麼。一箭落雙鷗。前輩恁麼。互相提唱。不妨綿綿密密。控你今人入路。兄弟既名參學。若不於此子細用心。與古人相見。將來生死岸頭。將何抵擬。山僧却有方便。不見僧問趙州。學人乍入叢林。乞師指示。州云。喫粥了也未。僧云。喫粥了也。州云。洗鉢盂去。僧於此有省。雲門云。且道趙州有指示。

無指示。若言有。趙州向伊道什麼。若言無這僧為什麼便禮拜。真如喆禪師。室中常舉此話。見學者擬下語。便以手掩其口云。歇去。且道。真如意作麼生。徑山又不然。有下語者。一任下語。只是不得動著。何故。如人上山。各自努力。

法語

示圓上人

見成公案。豈籍言詮。佇立寄私。垛生招箭。若夢遊區宇底。未免荏苒彷徨。拋家失業。驀忽惻然鼎省。翻得起來。却又不一頓。刀刮水洗。心頭隱隱。似記似忘。敗闕愈甚。圓上人。拖夢南來。欲求一句。以助其省發。予便欲舉須彌槌。擊虛空鼓。又恐不能呼之。蓋睡未稔去去不能自己。於穿雲渡水時。平步失落。則眼子自開也。此時方可探南山虎穴。透鰻井龍門。先捏定他喉嚨。勿使轉側。方可拔其爪牙。戲其頭角。不尔。遭他一口。喪盡平生。雖曰善因。而招惡果。

示源侍者

昔藥山訪道南嶽。始聞與麼不與麼惣不得之語。如蚊子上鐵牛。逗到一物不為。閑坐則為。又似箇水上胡蘆子。按也按不住。只管皮膚脫盡。不知真實猶存。引得隨波逐浪者道。我在藥山三十年。單明此事。種禾却生豆。試點檢。他敗闕在什麼處。

九上三到。桶底子打脫。在木上座手裏。因何却向鰲山店上。滯殼迷封。中夜聞豁公搥塗毒之音。返令鹽官色空義。洞山過水偈。動地放光。是曾郎久參事慢之過耶。

西竺初祖。呼二祖謂曰。倒却門前剎竿著。八字打開。兩手分付。何故。湧泉道。我四十年。猶有走作。香林道。我四十年。方打成一片。

不出飛猿嶺。目貫九天。不下釣魚山。氣吞四海。備公回公。異代殊方。一狀領過。十八上破家散宅底。因甚老不休歇。無乃徒費草鞋錢耶。若道百城烟水。何往何來。萬里江山。脚頭脚底。恐正是岐路。

說禪浩浩地。還知栽田博鉢喫底消息麼。栽田博飯喫底。還知說禪浩浩地底道理麼。若不容易放行。何止一理二義。濮江源侍者。索語歸鄉。遂將陳橘皮五片奉贈。歸到家山。切忌咬嚼。不惟無味。又乃刮刷人胷中爾。

示圓闍梨

百尺竿頭。溪橋那畔。蹇驢失步。已眼頓開。乃說偈言。我有明珠一顆。久被塵勞關鎖。而今塵盡光生。照破青山萬朵。噫茶陵郁山主。甚處去來。尋常搖鈴擺鐸。彈舌作梵時。豈非明珠放光耶。逗到手蹉脚跌。阿地聲中。面目全露。二頭三首。何其後時。圓闍梨善能細細參詳。古之今之。間不容髮。然於一切處。以直心為道場。直行作佛事。直語真懺悔。直用善加持。否則妄自欺。佛祖所不與。別言有長處。非我能知之。知是切切復切切。不免茶陵一笑耳。

示徹侍者

吾教意。如塗毒鼓。一搥遠近聞者皆喪。聞者喪則固是。如聾人何。雪峯問德山。從上宗門中事。如何傳授。山打一棒云。道什麼。次日雪峯請益。德山道。我宗無語句。亦無一法與人。存公聞之。胷次豁然。如桶底子脫。其他大眼目宗匠。示一機垂一語。有聞而耳聾。見而吐舌。或拊掌一笑。或舉手搖拽。或橫身而趨。或雙膝自屈。是皆喪於鼓聲中者。此無他。蓋志氣等齊。心念專一。在在處處。能全體放捨。全體承當。全體卷舒。全體受用。如立足於須彌頂[寧*頁]頭。除是眼子不開。眼子一開。則左右前後。四大神洲。日月星辰。山河大地。皆吾脚跟底一物耳。若立處不高。未免遠近高下。區區往來。墮身岐路。無有了底時節。殊勝之士。有正因具正信。辦殊勝身心。親殊勝師友。以歲月崖將去。何慮所作不辦。不與前輩大老。同此事耶。若三明兩暗。半前二後。謔謔[言*空][言*空]。紛紛紜紜。骨董袋裏。頭出頭沒。希一念相應。雖百塗毒聲。亦無如之何也。作是說者。是第二頭。信是說者。落第三首。或聞之。如風過樹頭。如水澆頑石。我信是人已於空王佛。所證是三昧。豈易得也哉。福城了徹侍者。久在北山會中。辦此道。訪西城索語。以為警助云。

示念禪人

非風鈴鳴。我心鳴耳。非風幡動。仁者心動。奇哉。此華竺祖師。打草驚蛇杖子也。曾洗耳拭目於其間乎。二千年前。十萬里外。總在于今。舉足下足。吾一家山也。映耳奪目。吾一自己也。百千萬億。吾一親屬也。五十二三。吾一知識也。初無華竺彼此之殊。曷有吳蜀去來之異乎。稍若佇顧。華自華矣。竺自竺矣。江山風物。

面面縱然。市井樓臺。頭頭嶽立。微風淅歷。幡動鈴鳴。眼見耳聞。千手莫掩。當此之時。還瞞得他。一點也無。先聖不云乎。我今為汝。保任此事。終不虛也。念禪人侍其親教老子歸鄉。想無拊背之勞。喜書此以贈。

示深禪人

吾鄉深禪人。北山會中衲子。每訪西城。勞問孤寂。一日浩然欲歸。遽爾來別。適子登北山正傳閣。閱古大隋。蓋龜於木禪庵。老香林。證龜於水晶宮。有大千壤。隨他去。臘月燒山。等語。聲蓋天地。光照今昔。而不可掩。噫伎倆不如帳樣。是二老者。挾南宗而西泝底樣子也。其後蹈二老覆轍者。莫知幾何。或歸隱家山。不與世接。人莫得而淺深之。又不知其幾何。且古之今之。或去或留。在彼在此。道之所在。初無間然。但於去留彼此之時。而無絲毫頭許。容於其中。則朝東吳暮西蜀。江山萬態。風月一家。拄杖頭邊。無空過者。深禪人勉之。

示思禪人

是法。非思量分別之所能解。參玄上客。喚什麼。作是法。這裏著一轉語。坐斷古今舌頭。使一切人。不落思量分別。悉皆能解。稍若遲回。且向思量分別裏作夢。

不見瀉山道。以思無思之妙。返思靈焰之無窮。思盡還源。性相平等。理事不二。真佛如如。入理深談。即不無瀉山。鼎鼎喚什麼作真佛。佛有假耶。這裏又著得什麼一轉語。免使性相理事。思與無思。纏作一塊。無出頭處。

不然。更看仰山葛藤。思而知。落第二頭。不思而知。落第三首。超宗異目。即不無仰山。且思而知。知箇什麼。這裏著得什麼一轉語。免教落在二頭三首。

官不容針。報恩向葛藤上。枝蔓去也。思而知翳却眼。不思而知瞎却眼。翳却眼則平地青霄。瞎却眼則牛行虎視。這裏雖則落草之談。要且麤糲易飽。細嚼難飢。思上人勉之。

示照寂巖

廣漢照寂巖。凜祖庭後彫之操。而遽然言歸。余力挽之。因為舉竺土二十七祖。般若多羅曰。震旦雖闊無別路。要假兒孫脚下行。此偈是一重漫天網子。於日未浴時。將真丹世界。四方八面。一罩罩

定。凡古今悟宗之士。皆透其網子不得。何獨一金雞一馬駒耶。後之著身叢林者。有畢世懵然。不知有。知而不行。行而未詣者。十之八九。祖庭搖落。宗社荒涼。昔之旃檀叢林。甘露園苑。今則荆棘參天。狐兔交道。得非坐曲彙木牀。任大法者之過耶。非出一叢林。入一叢林者之過耶。昔江西鞭牛駕車之後。引領西顧。被鄰舍婆婆。舉簸箕一築築回。和八十四人善知識眼孔。一時定動。若其不爾。則秤鎚沈井。不復有震威一喝。而至三日耳聾者。寂巖以為何如。寂巖不答。拂衣而行。余曰。善為道路。

示達州惠禪人

衲僧家。拄杖頭邊眼正。草鞋跟底風生。出一叢林。入一叢林。一人所在。半人所在。因行掉臂。看風使帆。是則與之拓開。非則與之剗去。若也未閑弓矢。却須行帶耳輪。蒲團禪板。在在良朋。栗棘金圈。時時美味。師友檢責。歲月揩磨。失脚踏翻。面目全露。或拗折拄杖。或拈起簸箕。萬古江山。一朝風月。步步踏著。處處逢渠。兀爾坐忘。蕭然自得。電光石火。眨眼猶遲。青天怒雷。掩耳不及。諸方老宿。各擅家風。特立獨行。傳家有法。楊岐之見慈明。東山之見白雲。心跡皎然。班班可攷。行脚高士。不以古聖為則。不扣自身實參。是謂盲無慧目。隨波棄源者。思之。

示泉都莊

黃梅八月負春。牛頭逐日運米。或畚田。或扶犁。或擔鋤。或按鑿。破柴供爨。汲水澆蔬。至於近代。作磨頭。充直歲。是皆古佛。一日不作。一日不食。放光動地底樣子。余雖不才。亦嘗試之。今住小院。得吾泉兄二三執事。一往直前。不圖使人感嘆。抑亦成就大丈夫。合為底事業。望始終勉旃。使無愧於古人也。至禱至祝。復說偈以餞之云。佛法徧在一切處。一切處求不可求。鼓腹臺前成現句。牧童也解倒騎牛。

示渙侍者

象骨老人有云。出嶺年登三十二。入閩已是四旬餘。攷其十餘年間。幽燕受具。徧歷禪會。三到九上。聞色空義於鹽官句下。同叢公邃公。久侍德山。有不及見濟北之嘆。至於中途。頂笠墮水。不顧而行。未嘗聞滯在一隅也。因知展轉南方。歷百十城。參五十三知識。垂範後學。不吾欺也。柰何去古未遠。風規頽甚。雖曰南

詢。實無其實。誠哉可悲。渙侍者。既以青山易得。知識難逢。為懷。捨一寶山而不登。復何之焉。去去勿滯於此。空手去空手回之語。洗耳以俟。

示清禪人

學道如初。成道有餘。若始勤終怠。則前功棄矣。常聞徑山無準在眾時。嘗請益於掩室先師。師謂之曰。我學道。別無長處。只是志不敗。凡學此道者皆然。何獨先師也。若是著身江湖。其不敗之志。當愈久愈勤。若是數十年程限歸鄉。其不敗之志。吾莫能知之。天彭德清禪人。久依北山艱難之際。處心泰然。來清溪求一言。為辦道之助。昔巖頭為點發新學菩薩正眼。擘破面皮。豎亞一目。已曾見之。不在言也。苟或未見。今雙徑場中。有一導師。坐大道場。披戲衫搥塗毒。以現是相。宜往觀之。

示宗侍者

天上天下。唯吾獨尊。黃面老子。最初出胞胎時。漏泄家風之語。豈是自謂耶。後來橫身擔荷者。呼為傳言送語。或拆其屋云。有我不用你。或一棒打殺。與狗子喫。貴圖天下太平。總是賊過後張弓。參玄上士。於最初八箇字下。橫點頭。方具正知見。前無去人。後無來者。動容周旋。無落地底道理。宗侍者索語。登徑山。主賓相見時。忽若被伊動拄杖子。便與一喝。使這老漢知道親從蔣山來。

示心侍者

昔李王為則監寺開堂。有僧問云。龍吟霧擁。虎嘯風生。學人知是出世邊事。為什麼不會。則云。會取好。其僧拂袖歸眾。時法眼呼而謂曰。適來問話。許汝具一隻眼。大王前。何不禮拜蓋覆。教汝吐血去。阿呵呵。衲僧氣宇。高揖釋迦。不拜彌勒。真正建立宗旨。豈可曲順人情。這僧較些子。法眼怜兒不覺醜。千古為繁林笑具。今有抱是病者。豈是不為人蓋覆而然耶。後生輕薄而然耶。却當觀罪福皆空。何處安著。是身夢幻。病自何起。我自不立。受病者誰。如是細思。至思不及處。眨上眉毛。拊掌一笑。則從前法眼之記。其僧之問。則監寺之答。與自家今日之病。皆一夢耳。山僧擘老眼書此。正是開眼作夢。更好一笑也。

示徹首座

橫說豎說。不知有向上一竅。與麼道。曾夢見也未。觀其大雄峰頂。再捋虎鬚。黃蘗山頭。甘受是報。與夫叢公以德山未會末後句。玄沙以雪峰脚跟不點地。臨機著著不隨準繩。徹底老婆。堪作何用。衲僧巴鼻。格外風規。文彩班班。照映今昔。所謂金翅擘海。玉象截流。開猛焰芙蓉。飛紅爐瑞雪。洒洒落落。直下點頭。央央庠庠。決定無分。如是結錄。迅雷不及掩耳。分付明巖。急急祕却。

示喜長老出世祥符

拈花示眾以來。單傳密付。的的相承。東西三十三傳。而至曹溪。打開門戶。宗說齊施。南嶽磨磚。馬師一喝。逗到栽松鑿頭邊。受吾宗大興之記。大覺棒下。薦得先師三頓喫六十拄杖底道理。至一人指南。遇大風即止之識。悚懼中。乃瞬青蓮目。不墮悄然機。龍袖拂開。象王行處。微雲四斂。十日並明。豈是光影中。依語生解耶。深村荒草。把手共行。金圈栗蓬。普惠來學。不三世而檀郎出。又三世而得破沙盆。至我放龔師翁。開口不在舌頭上。明機雙扣。暗號潛施。我王庫中。無是刀也。齊眉共躡。宜細詳之。異日超宗。不妨拊掌一笑。別峰云。得箇方丈子。方是參禪時節。喜長老赴三衢祥符。臨別書此以贈。

示南泉化主

我此法門。號無盡藏。福德智惠神通門。奇特中奇特。殊勝中殊勝。譬如大寶聚。世間眾妙之寶。珍珠瓔珞。象犀珂貝。無不具足。有大長者。端位其間。四面八方來探寶者。與之不禁。於彈指頃。經百千萬億劫。空往實歸。莫知其幾。所謂大富長者。即是如來。凡根器猛利者。不歷化城。直登寶所。化城暫住之理。蓋其持正見。護正念。純以質直無妄之心。涉夢幻真實之境。求無貪想。施無厭心。覲面相逢。拊掌一笑。自然頭頭合轍。句句投機。轉正法輪。現寶王剎。此即化緣分上事。若更撥開向上。發明真光。照自家父母未生時。是什麼面目。於此薦得去。非獨世寶。出世間底。盡在乎是。先聖謂阿難曰。汝今持鉢。當依七佛儀式。曰如何是七佛儀式。世尊呼阿難。阿難應喏。世尊曰。持鉢去。噫。靈山一會。千載儼然。句下點頭。亦未為可。紹盧都寺。往泉南。謁有

緣檀那。歸與黃面老瞿曇。作大佛事。書此以餞行。所謂投機句子。盡在汝邊。滿載歸來。為我說破。

示海上人

少林門下。第一希有。殊勝之士。具決烈過量。超宗異目。方可堪任。小智小德。輕心慢心。一脚進前。一脚退後底。決定無分。觀可祖甚生標格。立雪斷臂。無可入作。逗到覓心無心。諸緣頓息。八十翁翁入場屋。豈小兒戲事。後八傳而至江西。又十一傳而至東山。江西則全機大用。革變通途。東山則魯語巴歌。復回逸轍。是二老者。皆川客也。東山又得一檀郎。父子雙暗雙明。網羅天下英俊者。十之六七。於中如密印。如文殊。如佛海。與夫圓悟。首見玉泉浩。又皆眉之土產也。綿綿至今有力荷擔者。天下共知之。後之來者。聞其風而不求其道。雖同出同處。而各親其親。與麼稱少林門下。吾不與也。

海禪人。忽以師老告歸。余囑之曰。昔古靈拊背。古佛放光。若不示以百丈門風。亦未足呼為報師恩德。幸思勉之。所謂少林門下。超宗異目底消息。俟玻璃江水逆流。却來為你註破。

示憲藏主

我宗無語句。亦無一法與人。恁麼揭示。如按太阿。如搥塗毒。俊衲聞之。必然吐舌。以其有此風骨。具此體裁。便能直下披襟。何獨一曾郎也耶。近與一蜀客。火爐頭夜話。拈一影草示之。客倒轉話頭云。佛法不渡普水者。以普人不知有。而不加信耶。以普人日用現行。一一天真。而不假外料耶。抑別有微意耶。況佛法徧一切處。窮一切劫。天人群生。皆承其力。工巧伎藝。見行此事。何言不渡普水耶。余熟視之良久。客翻然曰。我得之矣。佛法何獨不渡普水。亦不登德山之門。不入鶴林之室。不立洞山之前。不上趙州之口。不出雲門之面。語未終。急和聲止之曰。住住。此去歸鄉幾程可到。客愕然不覺吐舌。余高聲呼童添炭。恰轉二鼓。客乃東普憲藏主。從武林南山社中來。錄此贈別。

示應禪人

天彭應禪人。辭金陵之北山。往見武林之北山。來此相別。輒口占一偈。贈之曰。我曾誤喫冷泉水。苦毒傷心老未忘。今日又非前日比。宜探深淺不宜嘗。禪人不諾。乞別轉語。為某做工夫道伴。然

參禪做工夫。前輩大有納敗闕底樣子。往往聞得爛熟了。略不以為緊要。今又土上加泥。彼此無利益。宜自向前。禪人又不退。復為舉。備頭陀有云。達磨不來東土。二祖不往西天。若是眼腦稍乖底。不犯風瀾。一見便見。則芻次紛紜。不待掃而自淨。但能猛省著精彩。一切時一切處。放下莫教斷續。久久自有倒斷。若一念斷續。即是落處。依草附木。所謂暫時不在。如同死人。何待臘月三十日。若以為不然。問取飛來峰北高峰。必然為你點破。作是說已。錄以與之。

示德侍者

慧日侍者德禪人。游金陵。訪石溪於清溪蘭若。東語西話。一切皆見成三昧。從作家爐鞴中來。真所謂龍生龍子。鳳產鳳兒也。臨別云。豈無一語。余告之曰。所謂見成二字。冷冷自然。纔知之。是頭上安頭。不知是斬頭覓活。況加周由者也耶。去去。切不得漏泄此話。北磻老人。聞知唾罵石溪猶可忽。若更把不定。木上座用事。宜自當抵。重說偈以發老人一笑云。北磻磻邊纔緩步。石溪溪畔又移身。俊哉龍鳳親生子。何必南陽令斬新。

示元上人

衲僧家。脚頭脚底。這邊那邊。如火燒水。不留朕迹。也是平常行履。久參新學。入此門來。身在夢鄉。成就夢事。聽人寐語。或自嚙言。以謂惺惺。點頭自肯。硬不信有眼子豁開底一解。璨祖云。眼若不睡。諸夢自除。心若不異。萬法一如。豈欺我哉。元上人。來此一年餘。每每入室。只與舉庭前栢樹子話。未嘗輒易之。使其只就一處頂省。被伊一向坐斷山僧舌頭。更莫如之何也。霜風吹面。愛日可人。忽思移床。了知殘夢。故書此予之曰。非雙徑更漏鼓子。無能為汝倒斷。

示規知客

三界擾擾。六趣昏昏。識心達本。故號沙門。先聖一聞此語。便捨金輪萬乘尊榮之寶。逾城出家入山。前後十二年。忍飢受寒。無他。為成此道故也。八十翁翁舞。只為教兒孫。末後拈花。付授正法眼藏。人傳一人。至二十八傳。達磨大師。香至王幼子也。辭其鄉井。十萬里。泛重溟來此。求大乘根器。無他。為傳此道故也。賊無種相鼓籠。一花五葉之後。兒孫滿前。繼繼繩繩。而至今日。

於中諸大老。棄衣冠富貴。入此門來。一生飲食接氣。脇不沾床。書名傳中。班班可考。無他。為學此道。明自己。脫生死輪回故也。有志之士。既已披削。當從前輩大老。求箇樣子。發大心。秉慧劍。將愛網親羅。一揮揮斷。尋師友。以警發為期。時中切宜著精彩。如握弩機。審然後動。自然萬不失一。所謂高高峰頂立。深深海底行。轉步於未具胞胎之前。著眼於日用見行之際。紅爐飛雪。烈火藏冰。久久自當有證。自規知客。相會於獨秀峰前。甚有意參扣。以時節未至。疑情未能釋然。余謂曰。我今為汝。保任此事。終不虛也。

示明講主

我宗無語句。亦無一法與人。志氣相并之士。入此門來。如刀林劍刃上行。不容擬住。猛省著力。向一句下轉得去。胸次自然虛豁。如趙州青州布衫話。便是樣子。等閑地遭人。編辟將來。不勞餘力。被他轉去。所謂我若向刀山。刀山自摧折。若也未能如此。且觀亮公參江西。周金剛到龍潭。良遂見麻谷。此三尊宿。如青天白日。掣電光中。聊露半面。不是眼倒生筋。安可一見便見。胸中洒然。從前知見。者也周由。瓦解冰銷矣。余嘗扣一當仁云。許多江山。無一處不到。那裏是亮公隱身地。明暗色空。無一不見。那裏是德山見處。十經五論。無有不知。那裏是良遂知處。此三箇老凍[身*農]。見己眼[睺-日+王]耳熱。英靈衲子。請代一轉語。庶幾拋下有學之學。直入無門之門。使吾蜀佛法。廢而復興。當立地以俟。廣安可明講主。南來行脚。徧扣禪宗。一日過劍池乞語。書此以贈。

示海禪人

海禪人罷講來南。相處逾年。略不顧西家米如圓珠。飯若堆雪。一味枯淡。誠志與氣齊之士。何患不超然獨脫無依。受用自在田地。臨別為點破。周金剛平生漏逗。口欸數段。奉錢。宜高出他一頭地。作將來帳樣。云。一毛吞海。海性無虧。一芥投針。針鋒不動。唯我知之。低聲低聲。且南方破魔窟穴。搜魔種類去。窮諸玄辯。若一塵置於太虛。竭世樞機。似一滴投於巨壑。伎倆盡也。且探大瀉虎穴。騎虎頭収虎尾去。汝但於心無事。無事於心。自然虛而靈。空而妙。若絲毫許。言其本末。皆為自欺。呵呵。將謂到那裏。後三十年。卓牌鬧市。據一白棒。佛來也打。祖來也打。好箇當門老虎。有甚近傍處。中間親到龍潭。紙燈吹滅時。一處誦訛。

兩處敗缺。余通身是口。亦不能拓開。海禪人。宜觀之。是何標格。

示秀上人

余年三十。方再南。聞空叟有言。三十行脚。此事休也。初得此語。心甚不平。過二聖座元。几案間。見窮谷語。舉雲門話墮。於光明寂照中。便有歇泊地頭。及登甌峰。旬日間。趨隊入室。先師舉。達磨葬在熊耳。因甚隻履西歸。余對以一點水墨。兩處成龍。復一日龍袖拂開。面目全露。遂塚根四載。然後江之南北。浙之東西。親師友。味甘苦。動轉施為。未嘗向背。今又三十年。尚未能依稀彷彿。信知此事。大不容易。休也二字。真吾之一知識也。秀上人。天資純粹。西城兩年。寂寥道伴。喜聞南山老石田。遷北山。予謂之曰。青山易得。知識難逢。正摳衣之時也。故書許多醜拙。無他。幸緊著手脚。以悟為期。不然坐在無事甲中。後三十年。不一彈指。可不惜哉。

石溪和尚語錄卷中

石溪和尚語錄卷下

題跋

跋龍王請佛十六應真圖

阿耨達池龍王請佛齋。老僧亦預其數。此賓頭盧開士。策眉示人之語。能向伊策眉處薦得。則龍宮一會。至今儼然。若向伊語下知歸。宜與畫工。一狀領過。如曰不然。則今日凡應人天供者。決定別有長處。

跋觀音頌軸

忠南圭禪人。出示贊偈一卷。余方閱半偈。見善財謁觀自在於海岩之間。一鷲不啼。風景悄如。終閱之則相與理融。境與神會。曾不覺知。如是之相。是心手相親之士。以妙蓮華六萬餘言。縷而成之也。奇哉。諸禪人。覩是相而作是贊。余讀是贊。而覩是相。於一四句中。了然無餘矣。嘗謂得句不若得意。得意不若得句。使句意俱得。難矣哉。敢不加額頂戴。扣齒贊善。此今日大光明法幢也。若夫得無所得於句意之外者。又非筆舌所能形容爾。

跋諸方拈古

古今機緣。千姿萬態。出沒卷舒。隱顯莫測。諸方宗師。於其痛處針錐。使英偉衲子。知有向上巴鼻。出狐兔藏伏之窟。登龍象蹴踏之場。非無益也。若未具眼腦。不免貽矮子看戲之誚。崑頭曰。若論戰也。箇箇力在轉處。以兵家擒縱殺活之手。據款結案。學者於此。尤宜諗之。蓋兵家用處。惟世智奇謀者得。吾宗中雖世智奇謀。恐亦無分。以其勝負得失未忘也。有志之士。凡閱此集。宜融通勝負得失之心。見諸老凍[身*農]於機語未形之前。則醯羅之目。塗毒之音。自當有證。

為承天真藏主跋諸老墨蹟

先輩愈遠。聲跡愈新。或得其片言隻字。一展玩時。面目見在。此無他。道德行解。所致然也。真藏主。近獲諸老墨蹟。凡十數家字。意各不同。同宣此義。就中深愛。自得翁年已高。其字體。如七八歲。憑几案時所書。學道守嬰兒行。翁得之矣。

近歲緩於道。急於字。學者宜審思之。

題遯庵與明首座書後

遯庵一代偉人。此書拳拳。為乃翁妙喜老人。辨末後事。有不敢坐視之語。可為天下法。令人一見三嘆。視今時師弟子之間。猶路人者。可不媿哉。

偈頌

寄蔣山癡絕和尚(并沂良嵩)



急水上旗翻五色。飛流中毬輞百花。相逢相笑勿相笑。人途在中未到家。

[○@一]沒絃琴三弄五弄。無孔笛一聲兩聲。明月浮空天似水。長安歸夢恰三更。

和掃破庵塔(二首)

白[仁-二+(么 * 刀)]繫中第一尊。硬將明越作台溫。將頭撞破虛空後。又把金針鎖細痕。

平林風靜塢雲輕。一掬寒泉薦客情。會與此山重有約。何妨一日一經行。

送楊尚書

萬里江山圖畫開。錦帆歸去記重來。好於彷彿烟雲裏。添箇翩翩駟使催。

送李國史

父翁伯季忠清節。凜凜同班立聖朝。次第到孫孫又子。老僧屈指日非遙。

示上元主簿

單提一字趙州無。三尺吹毛也不如。萬別千差齊斬斷。白雲不敢犯清虛。

送趙鳳臺知府

五月寒雲濕不飛。臨辭無語思依依。此心不許江山隔。時聽除音來竹扉。

損翁

明知為學日有益。不知為道又如何。但覺家貧身漸老。聰明不及舊時多。

送一默翁入浙

有佛處不得住。鐵鞭擊碎珊瑚樹。無佛處急走過。澄潭不許蒼龍臥。三千里外莫錯舉。剔起眉毛眼卓堅。與麼則不去也。百城烟水難圖畫。摘楊花摘楊花。未容眨眼早忘家。趙州舌本懸千日。石火電光追莫及。紙燈吹滅便知歸。落在吾家第二機。翻身倒握烏藤去。千聖羅籠不肯住。何時砥砒障頽波。大扇真風滿寰宇。

送寂照庵歸蜀

錯向南來猶自可。歸鄉一錯更難追。果然到底錯將去。三十六江流向西。

溪翁

水落曾知杓柄長。家風從此轉淒涼。有時浪起無風處。冷看截流人自忙。

[、/(、*、)]牛

衲僧命脉頂門眼。點著無端頭角生。猶幸家園田地穩。得深耕處且深耕。

和偃溪

謝郎無月夜撐船。不覺平沈偃水邊。隨手一篙盤得轉。渾家洗脚上床眠。

送金州禪人

磨磚大士眼[曠-黃+林]眯。歸去高聲喚醒伊。好箇打車消息子。無端錯付馬駒兒。

送達州惠禪人見徑山無準

面門角眼倒生筋。今佛誰為第一身。此去炷香三拜起。防他左語子扇人。

劔堂

平常不露鋒鋸句。凜凜風霜威自全。脚未跨門先照顧。那知已喪髑髏前。

無隱

望州烏石未相見。南嶽天台幾對談。引得廬山曾失笑。至今滿面是羞慚。

送僧過金山(掩室化後)

不見德雲閑古錐。淡煙寒日水漣漪。風行雷動他山上。也好低頭問訊伊。

無照

自怜一點不揩磨。開眼還同合眼過。莫道渾家全滯[泳-永+盾]。瞞他些子看如何。

清溪

咫尺曹源有路通。游魚何事自迷蹤。有聲為到不平處。一點塵泥斷不容。

送心非庵

是是金鱗猶滯水。非非獅子又翻身。蜀山佳處是非外。佛法憑誰作主人。

月潭

皎潔清光艷艷寒。幾回撈攏犯波瀾。憑誰說與寒山子。莫把吾心一樣看。

無象

澹泊虛閑未動爻。有何單拆與重交。太平時代合如是。卦子逢人莫亂拋。

送僧之浙東

踏不著處一搭子。爛如生鐵硬如泥。金陵尋徧無尋處。定在鄮峰東嶺西。

送僧過碧雲見北磻

老倒楊岐沒腦門。行藏駟劄許誰論。碧雲深處問端的。他是他家九世孫。

雪牛

露迴迴地趨不去。時復深村荒草行。一色皮毛都換了。荷擔須是者眾生。

鐵壁

天地為爐烹不破。不通風處却通風。自從透得歸來後。方見一重還一重。

送寅乙上人歸蜀

南方展轉扣西來。口欲談而擘不開。乙馬三寅領將去。溪邊婆子笑哈哈。

石門

雲鎖苔封勢嶮巖。也曾敲擊費輪槌。只緣人作不得處。忘却心行路絕時。

送知無見

百城煙水夜光寒。巾子峰頭曾細觀。轉得身來天已曉。目前贏得黑漫漫。

送祥上人之道場

虎錫高騰上虎崑。虎崑老虎氣耿耿。袖藏濟北爺兒手。不捋其鬚心不甘。

璞翁

隱密全真處。渾崙未剖時。從來只與麼。不用討瑕疵。

送悟上人入廣兼簡塗提刑

大地猶如一粒粟。而今此語付何人。時時撮向掌中看。吳蜀江山一樣新。

雪山

晝漫漫地夜漫漫。高下峰巒總一般。身在洞然明白裏。勿於明白裏頭看。

彭檢法號仍舊

者漢本來無面目。幾年向外空馳逐。驀然憶著便歸來。六六依前三十六。

玉侍者出世鹿苑

行海無風戒月孤。新開鹿苑舊規模。一千七百傳燈上。樣子分明見也無。

石鏡

堅頑豈是鑄成底。雨洗風磨只自如。勿謂全然不照燭。山精破膽已無餘。

慵衲

寒涕垂頤懶不収。肯將佛法挂心頭。針筒線袋也拈却。古毳從教爛壞休。

送覺上人歸隆興

八十四人善知識。亮公把手不同歸。知君家住江西上。休聽灘聲說是非。

南交

住在何方號阿誰。默然不答笑熙怡。知君不是北來者。下載清風合自知。

善禪人登徑山侍癡絕

三年共住不相識。眉目橫分鼻脩直。狹路逢渠何所之。欲上凌霄峰頂立。凌霄一峰插天高。餘峰起伏皆兒曹。我曾眇目察秋毫。三千剎海空勞勞。峰頂老人八十二。湛湛雙眸映秋水。戲笑怒罵警欬聲。總是吾家第一義。老人問汝來何從。進前叉手宜當胷。更看武步生清風。何愁老人無笑容。

無諍

拈花微笑爭端起。面壁安心鬧鋪開。數到老盧明上座。使人心識一時灰。

送日本合上人

夜來歸夢遶鄉關。滄海何曾礙往還。有問大唐天子國。為言覩史在人間。

鎮湯頭

甜似黃連微帶澁。苦如甘草略含辛。一回點過一回別。只恐難瞞無舌人。

方巖

烏雲屯了白雲屯。雲斂稜層四面分。平實嶮巖都坐斷。且無花雨落紛紛。

送僧之雙林

去到雙林見舊遊。眉彎新月眼橫秋。寒暄未舉宜先問。因甚橋流水不流。

無瑕

本體溫如又瑩如。擬心雕琢費工夫。自家寶藏只這是。切莫揩磨染污渠。

送鎮知客

海南一片舊田園。松竹迎風幸可憐。拂拭藤枝倚床畔。隄防人問祖師禪。

寄日本國相模平將軍

○徑山収得江西信。藏在山中五百年。轉送相模賢太守。不煩點破任天然。

送丁高士

霞服雲冠游上苑。芒鞋竹杖過幽扉。故山青草纍纍塚。羞見先生化鶴歸。

刺血寫法華

矮窻岑寂中。一字一點血。血盡筆禿時。止止不須說。

開諸方語

收拾殘花貼故枝。游蜂舞蝶謾紛飛。莫教嗅著無香處。慳儻還從舊路歸。

淨髮

頂門些子娘生髮。剗了還生卒未休。斜把金刀勾得著。一毫頭是一毫頭。

行者德山改名德止

吾宗一德山。天下同仰企。寥寥數百年。清風來未已。汝名今與同。初非犯其諱。人前一呼喚。不覺聳眾耳。易以艮為山。辭以艮為止。宜將止易山。只移一畫子。吾當尊前賢。不得不如此。

示天童幹延壽化士

家有良醫病轉多。無棲泊處取譎訛。水如藍也花如錦。依舊簷聲滴舊窠。

再刊大慧語

妙喜胸中流出底。重華天子手親書。大千俱壞此不壞。別板刊行亦聽渠。

明鑑先生

支干念二金釘子。變態無窮無盡時。盡大地人都釘定。先生知後更誰知。

水茶磨

機輪瞥轉已多時。苦澁分明只自知。輾輾放身隨浪輓。傍觀贏得眼如眉。

甜瓜

不惜渾崙次第僉。把將來語太無厭。而今一片落誰手。管取甜時徹蒂甜。

見性堂

髑髏瀝盡眼頭寬。炯炯圓明一顆寒。莫恠年來昏怛甚。鐘聲却被鼓聲瞞。

立雪方丈

少室門庭冷似冰。可師曾此一沉吟。夜闌各自知寒冷。莫待齊腰三尺深。

菩提橋

石頭一路平如掌。步步風波險處行。渡馬渡驢都莫問。等閑奪得祖師名。

一葦亭

長江一葦浪花開。合國咸知不再來。千古凭欄一惆悵。豈知脚下滑如苔。

寶華法堂

老蚌虛含素月胎。庭前花雨自成堆。吾將倒轉風雷舌。未必繽紛動地來。

見山亭

柳陌花衢爛熳游。不知日月去如流。擡眸忽見家山在。雙手難遮滿面羞。

讚佛祖

出山相

道無修證。入山何為。法無去來。出山何之。黃金屋宅草離離。天上人間說向誰。
六載入山緣底事。復緣底事出山來。毒心毒行人難見。但見春風笑臉開。

水月觀音

覺天無雲。性海無風。玉輪蘸影。金浪翻空。非惟觀世音。我亦遊其中。

思惟相觀音

春禽晝啼。秋虫夜吟。有耳皆聞。何獨觀音。如是而知。如是而覺。面目現前。超諸餘學。
燕語鶯吟。鴉鳴鵲噪。聲有差殊。聞無顛倒。聞性既寂。聲塵亦空。一點悲心。在處圓通。

開眼入定

六用如如體不分。耳能觀色眼能聲。而今老大宜安分。眼自觀兮耳自聽。

趙通判請贊觀音

輪數珠。泛蓮舟。覺天雲靜。性海風休。以悲為心。救眾生苦。以慈為眼。觀眾生憂。眾生何憂。憂忘內修。眾生何苦。苦於外求。故現宰官身。所說宰官法。不出乎盡忠孝。守名節。保祿位。教子孫。勿墜於箕裘。夫如是普門一十九類。楞嚴三十二應。熙怡微笑。唯唯點頭。公堂日永篆煙浮。誓與慈容同去留。

魚婦

左提魚籃。右搥衣袂。浩浩塵中。一聲活底。傾國傾城眼豁開。早已白雲千萬里。

馬郎婦

鏡裏精神。風前調度。手執蓮經。換人腸肚。錦鱗吞釣上鉤來。黃金骨已騰空去。

草衣文殊

草離離。髮垂垂。神出鬼沒。佛眼難窺。能坐毗耶之舌。而不能出女子之定。能行法王之令。而不能免迦葉之疑。五臺山勢峭巍巍。返擲還他獅子兒。

文殊

獅子吼無畏說。空處挨緊處捻。彼上人縮却舌。不二門都敗闕。五髻童真七佛師。却證烏龜成白鱉。

維摩

呵二乘彈十地。以強詞奪正理。問疾人根到底。語與默都不是。金粟如來居士身。盡大地人扶不起。

布袋

儻侗十圍腹。婆娑三尺軀。折拄杖攪無邊香水海。破布囊貯百億須彌盧。等箇人。唸哩唸哩。覓文錢。蘇嚕蘇嚕。天上無地下無。四明山色開畫圖。

放布袋而立。携布袋而去。他日下生來。別道一轉語。補處之尊。弄真像假。拋却內宮。來使奉化。回觀時。觸髅眼睛瀝未盡。緊靠處。布袋骨董放不下。放得下。未必遭人強描畫。

須菩提

倚杖而立。示真般若。手中冊子。云何抄寫。長老若不放下。疑殺後生尊者。

常宴坐。常危立。一片虛凝。萬境空寂。崑前花雨已狼籍。

豐干 寒拾

只解踞虎頭。不解収虎尾。你若訐露人。人也訐露你。出沒虎聲中。卷舒牛跡上。半是小兒嬉。半是大人相。執爨灰滿頭。掃地塵撲面。崑下細思量。一場不著便。道兮無貧。德兮有鄰。五峰雙磎。誰主誰賓。相靠而睡也。象王回顧。相呼而笑也。獅子嘖呻。噫。不省這箇意。修行徒苦辛。雙磎底五峰前。塊石上磨松煙。多無一兩字。少有三百篇。明明此意落誰邊。微風吹巖松鳴。聽愈好吟愈清。渾崙一句子。文彩甚分明。筆下如何寫得成。左手執卷。右手指示。覲露不覆藏。幾人知此意。回首臺山鎖寒翠。對面撫掌。兩鏡相照。雙磎與五峯。冷地齊失笑。喚作普賢還料掉。

達磨

面壁而坐。見成行貨。立雪求之。還同蹉過。須知罪犯彌天大。來泛一杯千頃浪。去携隻履萬重雲。自言傳法傳何法。故我思君亦恨君。萬浪千波一葦橫。翩翩隻影可憐生。老蕭若會截流句。楊子江頭放你行。

六代祖師

竺乾正眼。震旦心宗。一點水墨。兩處成龍。至今匝地生清風。諸緣息時。伎倆盡矣。了了常知。不是不是。莫被胡僧謾著你。無言說中。廣說信心。洞然明白。非去來今。風病因茲轉更深。古佛無心。知之者誰。雙峰點首。石女攢眉。錯付黃梅箇小兒。能與麼去。能與麼回。青松鬱密。白髮摧頹。嶺南消息幾時來。字則不識。宗說俱通。如風吹水。如日行空。破蕩箕裘是此翁。

寶公和尚

鷹窠大士。示現無方。生于宋代。老于齊梁。杖頭刀尺。隱顯全彰。巍巍堂堂。煒煒煌煌。至今坐斷獨龍岡。

北宗

菩提有樹鏡無塵。玉兔懷胎入紫宸。七百僧龍第一座。信衣推與負春人。

明上座

大庾嶺頭提不起。本來面目尚埃塵。南枝不放春消息。也是茫茫漏網人。

荷澤

荷澤元來不姓高。嶺頭一網竟難逃。爾曹若不論知解。知解無因到爾曹。

雪峰真覺禪師

出嶺超方。九上三到。一槌便成。未是性燥。誦過水偈。聞色空義。攪炒肝腸。睡不成睡。棒頭領旨。句下明宗。夜半鰲山。如鶴拋籠。象骨岩高。中有鰲鼻。千五百人。中傷者幾。三毬並鞦。大用全提。石火莫及。電光罔追。大地撮來。如粟米粒。今昔行人。看之不出。望州烏石。日炙風吹。萬福曾郎。眼戴双眉。

普化

者風僧。甚舉止。木鐸一搖。聲在人耳。邈吾真處。點著便行。咬生菜時。觸著便諱。明頭暗頭。拶著便轉。今日昨日。扶著便醉。或於道吾手裏。倒送鎗頭。或於臨濟面前。滿傾惡水。如斯伎倆。果能成禪人。建立黃蘗宗旨者耶。況其掣狂掣顛。有頭無尾。是皆不遜大仰之讖。盤山之記。末後若不向東門南門。西門北門。覓箇走路。定不免新婦子。老婆禪。小廝兒。撫掌笑你。邈得先師真。鼻孔不相似。大悲院裏歸。驢鳴較些子。

蜺子

師荒村古廟兮。人紺宇蓮宮。師紙錢堆裏兮。人瓔珞聚中。師撈鰕擁蜺兮。人打鳳羅龍。師鱸鮮枯槁兮。人玉食雍容。師與人隱顯各異兮。卷舒一同。為華嚴之弟兮。不入華嚴保社。為洞山之子兮。不紹洞山門風。欲遜其迹迹愈著。欲晦其名名愈崇。夫能謹初護

末。不恁他酒臺盤兮。人莫知師之所知。師獨樂其樂。樂亦無窮。果如是兮。安有今日。持短尺以量虛空。磨淡墨以邈虛空者哉。古廟爐灰冷。長江烟水寒。再三撈攬得。難上酒臺盤。

政黃牛

湖水湖山面面奇。烟雲風月總新詩。悠然句意不及處。也解將牛作馬騎。肩聳湖山瘦。眼明湖水秋。往來誰是伴。白鷺與黃牛。

郁山主

谿橋驢子失脚處。百尺竿頭進步時。頂踵一時俱換了。依前只是郁闍梨。騎驢過溪橋。一踏橋梁折。橋邊萬朵山。拊掌笑不歇。

言法華

褰裳登九重。走筆書十三。兩頭俱不住。臨去又圖南。

十六羅漢

飛錫五天雲冉冉。泛杯南海浪悠悠。一毫頭上輕收拾。不是冤家不聚頭。

過河尊者

前溪淥漲雨初晴。浮笠波心掌樣平。伎倆由來只如此。放教急急奔前程。

朝陽穿破衲

簷前負日暖烘烘。敗壞重加補綴工。盡大地人窮性命。都盧筭在一針鋒。

待月了殘經

數黑豆子老和尚。石上松根得意時。自憐末後一句子。只許天邊明月知。

船子和尚

機語相符句合頭。離鈎三寸已吞鈎。孤舟短棹都拋却。直得朱涇水逆流。

亮座主

心與虛空講未終。一呼回首一開容。勿言去後無消息。雲外西山翠掃空。

宗道者

一雙破草鞋。無跟又無耳。袈裟包不得。拄杖挑不起。只知赤脚下桐城。不免桐城人笑你。

靈照女

盡道家貧賣笊籬。潑天富貴許誰知。風前斂手一轉語。未必丹霞識得伊。

贊禪會圖

黃蘗掌沙彌

大機之用誰擔荷。斷際孤風不可追。濟北少年曾未委。風光太子已先知。

趙州不下禪床接二王

折脚禪床接斷薪。猶堪偃坐揖高賓。明知列土熏天富。難鬪他家徹骨貧。

國一見代宗起立

法地安然不動移。振身而立亦相宜。勿於起坐經行外。別討大唐天子師。

文宗嗜蛤蜊

一點悲心擘不開。鑊湯袞處笑盈腮。希奇之事朕深信。是與君王說法來。

莊宗中原之寶

搜索乾坤宇宙間。中原之寶祕形山。若非呈似老興化。往往人將作等閑。

李翱見藥山

千株松下謁癯仙。冷淡烟霞別是天。授與刀圭元不識。却來携手水雲邊。

裴休捧佛請安名

持來面目已全彰。出就呈機驗當行。千釋迦文萬彌勒。都盧攝入一身光。

韓愈請益大顛

去國迢迢路八千。歸心日夕九重天。當機不領到家句。且向途中快著鞭。

龐居士見馬大師

攪海鯨龍頭角露。出林老虎爪牙張。至今六合風雲裏。浩浩來登選佛場。

靈照對丹霞

靚露風猷第二機。電光石火較遲遲。丹霞去後無消息。又見牢關把定時。

說無生話

收拾山雲海月情。團欒鼻直眼眉橫。龜毛拂子兔角杖。敲得虛空曝曝聲。

靈照看日早晚

明暗雙雙機奪機。阿爺手裏覓便宜。果然老底能輕信。輸却日輪當午時。

龐大倚鋤而化

老子先行行不到。郎君末後太過生。倚天衡岳取深處。兩過寒光潑眼明。

讚東山五祖和尚

輓綉毬。打瓦鼓。半巴音半魯語。心膽傾面目露。不可描不可塑。故天下稱之。曰東山演祖。

寂崑忠和尚

師之出處。師之面顏。雲橫楚甸。雨過淮山。閱其語錄。見其作用。玉轉珠回。雲興泉湧。寂崑之道。莫能形容。我今贊之。持尺量空。

北礪和尚

調古風高。神清氣逸。聞一唯陞素王之堂。見微笑入空王之室。恢恢綽綽兮。以一而貫萬。寂寂寥寥兮。會萬而歸一。此豈非八十三。住龍床角邊。南山之淨慈。佛照之真子。北礪老賊者耶。

癡絕和尚

破蟄之雷。指南之龜。斫圓玉斧。刮膜金篋。噫。非師而誰。

廣福聰長老畫無準頂相請贊

這慈尊。曾自贊。煮不熟。燒不爛。有軟頑。沒思筭。秤須彌重四兩。量虛空闊丈半。更有白[仁-二+(幺 *刀)]不是處。付與無聞。從公理斷。

自讚

東林徹長老請贊

寒浦先零之姿。古崑後彫之操。雪滿顛一味寒酸。雲半肩十分枯槁。任緣去住也。隨處有餘。信手拈來也。用時恰好。雖云理絕思惟。其柰事關懷抱。倚天長劍用還磨。分付明崑徹長老。

虎丘惠長老請贊

萬里晴空。一聲霹靂。盡大地人。掩耳不及。浩浩清風生八極。

祥符喜長老請贊

三巖日煖經行地。雙徑風清宴坐時。昔不少年今不老。如何描邈使人知。

圓通師孫福長老請贊

虛空寥寥。吾之體也。萬象紜紜。吾之用也。青山白雲。吾之賓朋也。山色溪聲。吾之言論也。作是說者。畫師之所不能幻也。夫畫師所不能幻者。吾亦不知。吾之為誰也。故強名之。曰石谿老凍[身*農]也。

資壽溱長老請贊

寒浦先零之姿。古巖後凋之操。雪滿顛一味寒酸。雲擁肩十分枯槁。任緣而住也。觸處有餘。隨機而應也。無適不可。家法森嚴。鉗鎚糙暴。承當者誰。如溱長老。

西竺淨長老請贊

色見聲求。二俱不是。離聲色外。轉沒巴鼻。石火光中。掣電影裏。要見石谿。且莫瞌睡。

楊居士請贊

水中之月。鏡裏之形。一頂春雪。半肩秋雲。觀而無觀曰正觀。聞而無聞曰真聞。畫工作汝汝即我。居士識吾吾非君。是兮非兮分不分。贊之毀之徒云云。

小師正恭寫松源掩室并師山行圖請贊

父前行。子後隨。不肖孫。愚且癡。三昧門。各自知。入深村。草離離。風前翻憶老楊岐。
清空片雲。古潭萬象。飄然何來。湛然何往。識則不識。知而無知。鍊壁銀山。挨開者誰。

小佛事

石田和尚入祖堂

南北山中舊主人。風光占盡便翻身。故園理得閑田地。別立風規斬斬新。恭惟。北山三十四世。石田和尚。大坐靈山。分身寶壽。正當此時。去底是住底是。與其去也。澗水留連。山雲把斷。與其住也。難提招手。土主點頭。畢竟如何。一堂風冷淡。千古意分明。

枯椿和尚入祖堂

召大眾云。還知枯椿和尚落處麼。一生列列別別。崖崖柴柴。生鐵為面具。頑石作胸懷。逢春不變。有地難埋。卜居楊子江心去。惡毒聲名已上牌。指牌云。名牌在此。枯椿安在。若謂在在。猶隔天涯。不在不在。大似未曾齋。畢竟如何。千古祖堂風凜凜。莫言無位可安排。

無準和尚入塔

浙東山。浙西水。折拄杖頭。無風浪起。幾回負清墮。一笑同棲止。今日與誰論此心。萬象森羅齊側耳。徑山堂上。佛鑑禪師大和尚。剎萬年正續。為一代的傳。十有八年。坐斷五峰之頂。百千三昧。遨遊幻劇之場。暗號潛通。真機密付。雙收雙放。半合半開。方堪一義同心。未料兄弟十字。藏身處沒蹤跡。澄潭碧海臥泥牛。沒蹤跡處勿藏身。西嶺東山蹲石虎。炎天九夏。冰雪滿街。白日晴

空。迅雷撼地。正恁麼時。塔戶一開。人已還閉。一句作麼生道。時有白雲都盖覆。更無明月四山流。

癡絕和尚入祖堂

召大眾云。山中前主人。癡絕和尚歸來也。還見麼。良久云。昔年離太白山上靈山。一片白雲空往還。去年辭鄮峰登法華。高蹤何處不吾家。今朝雙徑相逢處。古篆烟銷日當午。此時誰主復誰賓。面面相看如是住。如是住。鳳棲何待梧桐樹。

逢庵源首座入塔

一條脊梁硬似鐵。七十餘年拗不折。落在鍾山爐鞴中。煨作炎天片片雪。欲以無絲袱子。斂而包之。我恐包之不能。欲向無縫塔中。散而藏之。我恐藏之不徹。畢竟如何。逢庵逢庵。君宜自決。

昭覺土庵圭和尚起骨

白刃攪蜀道。日月晦冥。而土庵無傷。劫火燎蜀天。虛空灰燼。而土庵不熱。三十載一去一留。而無去留之異。八千里在彼在此。而無彼此之別。正恁麼時如何。分破北山西嶺雲。夜深冷照峨眉月。

智回首座鎖龕

智不到處。全隱全露。回互旁通。還同染污。盡力跳得出。全身在裏許。一室寥寥竟日閑。更須鎖斷奔馳路。

淑副莊下火

鬧處番交。靜處插脚。偉哉淑副莊。舉火云。透過這一著。這一著那一著。開眼也著。合眼也著。

清上座下火

絕點純清。迥無邊際。如是病源。流注未已。夜來徹底盡掀翻。家家門前火把子。

吉州信上座下火

具決定信。信箇什麼。廬陵米價相應。直下更無兩箇。信位既爾。人位作麼生。擲下火把云。不得喚作火。

堅莊主鎖龕

堅密身。絕依怙。一一塵中。如是而住。堅莊主。一回把定牢關。管取月圓當戶。

榮上座起龕

枯者任其枯。榮者任其榮。二邊都不犯。一劔自風生。莫逐前時行處行。榮上座。却向甚處行。上馬見路。

覺上座下火

不憂念起。唯恐覺遲。覺亦是病。何藥可醫。都放下莫思惟。精金入火自光輝。

宗侍者下火

我此一宗。得之最難。得之猶易。傳之為難。難難。城西白雪陽春曲。今日分明為一彈。擲火把云。急著眼看。

理大師下火

理既如是。事作麼生。當機一喝。拂袖便行。如斯參到無參處。正好全身入火坑。

海維那下火

心徑綠苔生。海門紅焰起。四十四五年。只行到這裏。只這裏猶未是。勝熱婆羅門。火聚刀山。看你海維那。逢場作戲。

逕水頭下火

以火劃一劃云。只者一逕。踏著便是。幾回撥水求波。幾回撥波求水。夜半三更洗面時。無端摸著娘生鼻。摸著後如何。全身跳入火坑。要你無風浪起。

源侍者下火

攢簇不得底病。吶咀不及之藥。志源侍者。惟己自知。舉世良醫。不知落著。源侍者。自知底。都拈却。把火入牛欄。一著高一著。

印上座下火

去即印住。剔起眉毛眼卓豎。住即印破。上下四維都屬我。去住還同印破時。澄潭不許蒼龍臥。正恁麼時如何。天寒只宜向火。

選塔主下火

塔中主。誰委悉。眼卓朔鼻脩直。相共行不相識。謾道今年七十七。(以火打圓相云)還見麼。根選圓通。斯為第一。
石谿佛海禪師語錄卷下(終)

No. 1405-B 新添

降魔圖序(并引)

佛出世之初。魔外熾然。有千子鬼母。種類甚多。噉人子女。天上人間患之。佛於是。取其最愛之子。以琉璃鉢覆之。母既失子。啼哭徧尋。佛呼其來。指兒還之。鬼母役所部諸兵。將盡神力。鉢不能動。佛問。汝之愛子。與人之愛子。同耶異耶。鬼母悔謝禮拜。發願。自今已往。見人之子女。猶我之子女。或有求子女者。我當副彼所禱。纔發心已。鉢自揭開。抱子而去。法高一丈。魔高一丈。但邪正殊途耳。傳云。微有念生。即陰界所攝。魔宮鬼窟。雜處其中。昏昏長夜。合眼做夢。靡所不至。佛悲憐之。以大智光明。如日懸空。破彼幽暗。悉使開眼見明。捨邪歸正。畫師筆端三昧。幻出降魔圖。有深旨焉。觀此圖者。倘能頓見善惡邪正之念。未形之前。則孰為佛邪。孰為魔耶。苟或未然。亦宜自警。淳祐乙巳。重陽後十日。虎丘住山老僧。石溪心月。書于致爽。

書遜齋居士題後

昔之高人達士。如王逸少陶淵明。未嘗不入吾之保社。本朝東坡山谷諸大老。又出入遊戲者也。書樓遜齋居士。豪放奇偉。襟韻灑

落。莫年隱居飛來峯下。四海禪衲。重跡戶外。心月以粉榆之舊。復來冷泉。始終相與厚甚。居士戲笑怒罵。皆成文章。獨所題海上人世繫。於身後始得快觀。思居士。而不復見。其絕塵之韻。尚於此髣髴焉。淳祐庚戌。立夏日。石溪心月書。

滄洲叟。觀于苕溪之漁灣精舍。

時淳祐辛亥。中春丁巳。

開光明藏疏

大光明藏。橘洲曇少雲。秉史筆。勾索佛祖機緣。摭而為書。使學者。詳其旨歸。於宗門非小補也。然後人傳寫。爭寶之。而真贗相半。四明明禪人。校定元本刊行。須得同志之士。與賢士大夫。相助發揮之。重說偈曰。

佛祖親傳真命脉。橘洲筆底發淵源。郁乎光燄十萬丈。只貴知音一印傳。

寶祐乙卯。自恣日。徑山石溪 心月 書。

示無象

靜照禪者。過海訪此。未久。動容瞬目。吐露不凡。因作頌見示。可敬。倘跂步前哲。不患不與之把手同行也。僧問趙州。一物不將來時如何。州云。放下著。僧云。一物不將來。放下箇什麼。州云。放不下。擔取去。僧大悟於言下。且道那裏是這僧悟處。試著意看去。切不必理會得與不得。宜以悟為則。所謂不患不與前哲。把手同行。當立地以待搆取。照宜勉之。乙卯孟冬。徑山老比丘心月。

山偈奉餞九江純禪者歸東林受業

靈隱 石溪 心月

年來佛法帶譎訛。十卜 干千不較多。寄語東林略擡手。看伊眼腦是如何。

淳西中秋。書于靈鷲一峰。

靈隱老石溪。偈送純禪者。詞語出人意表。墨光輝耀今昔。佛法譎訛處。具眼腦者辨諸。

育王 德明 拜書

石溪十卜 千干。後世千干十卜。不是佛法譎訛。祇是千干十卜。
魯山 德儒 九拜
溪聲廣長舌相。晝夜時時流布。不是眼裏聞知。誰識者箇章句。
天童 雲岫 書

No. 1405-C 御書傳衣菴記

徑山興聖萬壽禪寺住持。石溪師心月。來見其里人。前史臣楊棟于餘杭普救寺。出書袖中請曰。心月蒙恩。宣賜 御書。勒之翠珉。乞文為記。臣棟讀其書曰。心月師掩室。掩室師松源。嘉泰壬戌。松源將亦寂於靈隱。時掩室住雲居。千里而遙。群弟子紛然。拈所傳衣。莫知所付。乃問四眾曰。沒量大漢。為什麼擡脚不起。又曰。開口不在舌頭上。有語即授衣。南北山禪衲千數。無一契者。乃囑徒弟宗禮曰。留真吾塔所。三十年後。當有的孫。來住此山。可以付之。

迨淳祐丙午。心月。自虎丘被 旨。繼其席。開堂之日。宗禮慧淵。從眾中出。捧衣宣言曰。師翁密有懸記。付囑如是。心月嘆曰。昔二十四祖。師子尊者。四世而傳二十有二人。然必以傳衣定正嗣。餘皆傍出。大陽延禪師。老無的傳。一日謂浮山瑯琊二師曰。吾道非遠即覺。對曰。吾二人皆有父母矣。大陽垂涕。乃以皮履布襪。遺浮山曰。汝為我擇人付之。後得青華嚴。大振曹洞一宗。彼顏面不覲尚爾。吾嘗依師于此。聞舉鐵餒餒。作麼生咬。吾擬對。師云。不是不是。心疑之。辭歸鄉。再來而師已矣。今得此。豈偶然哉。受衣之翌日。宗禮忽書偈別眾曰。吾事畢矣。端坐而化。事由是播傳。往往聞 天上。心月自遷徑山。即挈衣與俱。結茆藏之。以俟來者。壬子七月。菴成。內臣宣 上旨。以 御書傳衣石溪四大字。賜臣僧心月。臣僧懼抃。得未曾有。茲欲紀述之。以詒無窮。

臣棟曰。此 宸翰也。敢不謹記。昔夫子作春秋。吳用夷禮。則夷狄之。而世傳古篆。嗚呼吳延陵季子之墓者。以為夫子之所書也。夫季子所行。豈盡合於聖門。而聖人與之者。亦曰吳之賢人云爾。 殿閣風清。優游泮奭。肆筆而遂及此。與孔子之意。寧有異哉。雖然竊有感焉。佛生於葱嶺之西。無羲黃堯舜禹湯文武。以為之君師。無易書詩春秋。以牖其知覺。無五禮六樂。庶政百度。以節其情養其體。乃能自用其智之所及。謂宇宙之內。四體之中。有一事焉。至貴至重。名之曰寶。於百千萬眾。默付一人。次第傳授。以入中國。年歲浸久。支分派別。各有源委。綿綿延延。未嘗斷絕。夫所謂一事者。口不能道。而得者。心自知之。不得者。不

敢與。如月所敘無義語。是其機指也。其有棄民業。而學之者。癡坐飽餐。而不知求此事。則其徒相與。非而咲之。有劬身苦心。盡老而不得。則泣涕懊恨。往往以身為膏。無罪而節解。彼豈不知愛其身哉。以為吾學此事。而不知此事。虐枉此生。其痛憤之心。甚於然身截骨也。未暇問所學之是否。為人弟子。不當如是邪。易曰。聖人以此洗心。退藏於密。曰此者必有其事。曰密者。必有其處也。孔子曰。逝者如斯夫。又曰造次必於是。曰斯曰是。又必直指一事。明矣。孟子曰。若孔子。則聞而知之。夫子五百年之間。所聞者。謂何而知何事乎。韓昌黎亦曰。堯以是傳之舜。以是者。以何事也。況乎吾聖人之言。則又明白快截。無有所隱。非若無義語之善遁。然而彼之一事。其徒之傳之也。如彼此之一事。則誰當求之。誰當知之歟。由是觀之。則夫雲章之。所以被乎此者。其亦有以愧天下之為學者。不能求其師之所傳為何事。而皆不以為非。不能知其師之所傳。為何事。而皆不以為耻。書外之意。不言之教。是豈可以蠡測管窺哉。吾君之賜大矣。又不可以不記也。徑山以游火中微。石溪至賣衣鉢。買糧飽其眾。暮年償山門逋。六十萬緡。明年創大覺傑閣。數斥餘衣供役。景象復振。師俗姓王。世居眉青神之瀨。姥母楊氏。臣棟之族也。寶祐三年。四月壬午。朝散大夫。集英殿修撰。提舉江州太平興國。宮。賜紫金魚袋。臣楊棟謹記。并書。中奉大夫。試尚書工部侍郎。兼同修國史實錄院。同修撰。兼資善堂翊善。建陽縣開國男。食邑三百戶。賜紫金魚袋。臣蔡抗篆額。小師 臣僧 正知 立石

No. 1405-D 雲頂演和尚送石谿出關見雲居掩室和尚法語

道人行處。寸草不生。眼觀東南。意在西北。也是家常茶飯。有般漢。恰似殺人了。及乎推勘。硬不肯招認。忽然業鏡一照。冤家見前。當時口似匾擔。若也未能如此。不免挑囊負鉢。撥草瞻風。閉目藏睛。三二十年。向鬼窟裏作夢。不然。被無知阿師教壞。喚鍾作甕。鼻孔遼天。弟子與師。俱陷王難。月侍者。相從既久。一日謂予曰。近聞衲子輻湊雲居。亦願効瞎驢趁隊。可否。予謂之曰。僕雖在先師會中。與渠友善。但見其喫飯屙屎。鼻直眼橫。而不知其為何人也。汝若具眼。行自辨之。嘉定戊辰。季秋。紫雲演老書。

No. 1405-E

石谿未離雲頂行脚。未到處。要須到。既見雲居。開口不得處。要須道。執侍半年。如矢在弦上。知而不自發。至於龍袖拂開。如箭在的中。發而不自知。雖然早年見松源于北山下。是此話已行。若謂開得口後。方有此錄。腦後猶欠石溪一錐在。寶午夏五。住徑山。偃溪(黃聞)跋。

[CBETA 贊助資訊](#)

(<https://www.cbeta.org/donation/index.php>)

自 2001 年 2 月 1 日起，CBETA 帳務由「財團法人西蓮教育基金會」承辦，並成立「財團法人西蓮教育基金會」－ CBETA 專戶，所有捐款至 CBETA 專戶皆為專款專用，歡迎各界捐款贊助。

您的捐款本協會皆會開立收據，此收據可在年度中申報個人或企業的綜合所得稅減免。感恩諸位大德的善心善行，以及您為佛典電子化所做的一切貢獻。

信用卡線上捐款

本線上捐款與聯合信用卡中心合作，資料傳送採用 SSL (Secure Socket Layer) 傳輸加密，讓您能夠安全安心地進行線上捐款動作。

[前往捐款](#)

信用卡（單次 / 定期定額）捐款

本授權書可提供單次捐款或定期定額捐款之用途。

請於下載並填妥捐款授權書後，請傳真至 02-2383-0649，並請來電 02-2383-2182 確認。

或掛號寄至 10044 台灣台北市中正區延平南路 77 號 8 樓 R812 財團法人西蓮教育基金會收。

請在此下載 [授權書](#) (MS Word 格式)

劃撥捐款

郵政劃撥帳號: 1 9 5 3 8 8 1 1

戶名: 財團法人西蓮教育基金會

欲指定特殊用途者, 請特別註明, 我們會專款專用。

線上信用卡 / PayPal 捐款

PayPal 是一個跨國線上付款機制的公司, CBETA 引用其服務, 提供網友能在線上使用信用卡或 PayPal 帳戶贊助 CBETA 。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project .

相關收據開立事宜, 由於付款幣別為美元, 我們除了會依您所贊助之美元金額開立收據外, 另我們會依捐款當日公告匯率開立台幣收據, 此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

[線上信用卡 / PayPal 贊助](#)

支票捐款

支票抬頭請填寫「財團法人西蓮教育基金會」。

CBETA is part of Seeland Educational projects, any donation (ex- cheques, remittance, etc.,) please entitle to "The Seeland Education Foundation".
